

**NATIONAL ASSEMBLY OF
SEYCHELLES**

Wednesday 22nd June, 2022

The Assembly met at 9.01am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab pou sa Merkrede. Bonzour nou staff ki pe akonpany nou e bonzour tou telespektater e oditer.

Bon nou ava rebran travay. Mon annan 2 kominikasyon pou partaz avek zot. Mon pa pou donn mon *ruling*, mon pa ankor pare pou donn mon *ruling* lo *point of order*, Onorab Henrie, akoz i annan serten eleman ki mon bezwen konsidere ki mon pa ankor gannyen.

I annan 2 kominikasyon ki i annan referans avek sa e mon pou met sa de a latansyon bann Manm la e pou fer li antre dan rikord.

Premye i en demann pou *Right of Reply* lo lapar Minis Jean-Francois Ferrari e son let i lir koumsa;

Mr Speaker I will most grateful if you would allow me a Right of Reply in relation to a completely false statement, made by the Leader of the Opposition in the National Assembly this morning (an referans avek yer) June 21st, 2022.

The Leader of the Opposition stated not only one but twice, that I had recently been to La Réunion to meet with the representatives of the organisation named Club Export Réunion.

And that the meeting was held to discuss investment possibilities in Port Victoria.

He also stated falsely that I was accompanied by Minister Antony Derjacques. This is absolutely false and can in no way be substantiated because the trip never happened.

The only time I travelled to La Réunion was in 1998 when I did a transit stop at Saint Denis Airport.

I am asking for the Leader of the Opposition to withdraw his statement. And the claim made by himself that the alleged visit resulted in favored treatment for one specific investor in our country.

This is malicious, insulting and degrading and it is a clear

attack on my reputation as a member of the Government.

I am therefore also requesting for an equivocal apology from the Leader of the Opposition and this should be made in public and on air.

Signed J. Ferrari, (Minister)

MR SPEAKER

Lot kominikasyon i sorti kot *Seychelles News Agency*. E i lir koumsa,

Monsieur le Président de l'Assemblée Nationale je tiens a vos informer que suivant le propos qui ont eu lieu ce matin au sein de l'Assemblée Nationale, la Seychelles News Agency n'a jamais écrit d'article sur la tribution de l'apel d'offre pour une cale sèche flottante. (floating drydock)

Respectueusement Rassin Vannier, (Directeur)

Sa de kominikasyon i antre an konsiderasyon pou mon *ruling* e mon ava apel *Leader* Lopozisyon e osi demann demander *point of order* pou zot anvoy mon okenn soumisyon ki zot annan pou fer. E pou *Leader* Lopozisyon mon demann li spesifikman pou li anvoy mwan kopi okenn lartik ki'n fer referans avek dan Lasanble. Mersi.

Avek sa nou ava kontinyen deba lo Mosyon.

HON SEBASTIEN PILLAY

(Off-Mic)

MR SPEAKER

Onorab les mon dir ou mon pa pou rantre lo deba lo sa size. Ou kapab fer en pwen, me selman mon'n endike klerman ki mannyer nou pou prosede. Si ou annan ou pwen pou fer en soumisyon e ou ava konsidere konman parti mon *ruling*.

Yes ki pwen ki ou kapab fer la?

HON SEBASTIEN PILLAY

Mersi Mr Speaker. Mr Speaker premyerman mon annan avek mwan *video* sa mon kestyon yer, *ok* dan mon kestyon okenn ka mon pa'n mansyonnen ki *News Agency* in fer sa lartik.

Mon'n fer mansyon en lartik dan *News Agency* mon pa'n mansyon sa. Mon annan sa *video* lo la ki mon kapab zve avek ou.

Dezyenmman ou'n demann mon pou fer ou ganny sa lartik. Wi mon ava fer ou ganny sa lartik. Sa lartik ti ganny ekrir dan en magazin *Performance Réunion*. E i koz lo *Club Export Réunion des*

opportunités aux Seychelles dans l'économie bleue.

E i mansyonn le de Minis dan Gouvernman Jean-Francois Ferrari e Minis Antony Derjaques.

So mon ava fer ou osi ganny sa lartik ki ava e listre pwen ki mon ti pe fer vizavi sa kestyon e mansyon ki mon ti fer avek sa kestyon.

Prezan mon oule met lo rikord byen kler ki a okenn ka mon pa'n mansyonn Minis Ferrari dan okenn fason derogatwar.

MR SPEAKER

Ok so ou ava eksplik tousala Onorab.

HON SEBASTIEN PILLAY

Mon pa konnen kote in ganny sa.

MR SPEAKER

Ok ou ava eksplik tousala...

HON SEBASTIEN PILLAY

So mon ava anvoy ou sa lartik.

MR SPEAKER

Silvouple.

HON SEBASTIEN PILLAY

Me selman mon pa ou donn Minis Ferrari okenn *equivocal apology*. Mersi.

MR SPEAKER

Wi mersi. E mon pe regard verbatim e klerman i annan en referans ek *Seychelles News Agency*.

Me sa osi ou ava eksplike konteks dan ki ou'n fer referans. Mersi.

Nou ava pran deba lo Mosyon ki ti'n konmanse yer. Mon'n ganny enformen par Deputy Speaker ki ti dan *Chair* ki e mon'n swiv Lasanble osi lo televizyon ki Mosyon pou *amendment* in ganny terminen. Pou rebran lo Mosyon mon annan 9 Manm lo lalis ki pou entervenir. Mon konnen poudir mon pe azout de ankor byen.

Mon konnen poudir 3 wi. Poudir Deputy Speaker ti'n edike ki i pe donn limit 15 minit yer par entervenir.

Selman letan nou retourn lo Mosyon, dan ler mon'n swiv deba, mon'n vwar ki en kantite deba lo Mosyon pou *amendment* i refer avek Mosyon orizinal. So i vin apepre tou le de i vin apepre menm deba.

So anvi lakantite Manm ki annan pou ou koze, mon ti ava kontan ki nou kapab termin avek sa, mon pe demann bann Manm pou obzerv en limit 10

minit apepre pou zot entervansyon.

Byen, mon napa lord spesifik. Onorab Pillay wi.

HON SEBASTIEN PILLAY

Mr Speaker mon oule *raise en point of order* an se ki konsern lo *Order Paper* avek ou si i posib *Order 24 - 25 sorry*.

Mon ti ava kontan klarifye Mr Speaker, mon annan en Mosyon lo *Order Paper* ki ti size en *Motion of adjournment* e langazman ki mon ti gannyen avek ou menm ou e kote mazoriter ki mon Mosyon pou ganny pran apre en prezantasyon.

Eski ou kapab dir mon ki'n arive avek prezantasyon? Akoz mon santi poudir sa i en vyolasyon mon privez konman en Manm. Akoz sa Mosyon in ganny les met *Order Paper*.

Prezantasyon ti sipoze ganny fer. Ou ti donn mwan ou langazman e prezan mon pa pe vwar okenn prezantasyon ganny fer. E ou langazman ki ou'n fer avek mwan Mr Speaker pa'n arive e sa i en kler vyolasyon mon privez an relasyon avek mon Mosyon ki mon'n mete lo *Order Paper*. Mersi bokou.

MR SPEAKER

Mersi. Onorab napa okenn lentansyon pou afekte ou privez. Nou pa'n kapab pran kontinyasyon lo sa size *Pension Fund* akoz bann zofisye *Pension Fund* pa dan pei. E nou ava remet li pou Mardi prosen. Mersi.

HON SEBASTIEN PILLAY

(Off-Mic)

MR SPEAKER

Mersi Onorab, silvouple. Silvouple mon'n fer en *ruling*.

HON SEBASTIEN PILLAY

(Off-Mic)

MR SPEAKER

Ou bezwen aksepte mon *ruling!* Ou bezwen aksepte mon *ruling*. Speaker i kapab fer en *ruling* ki final. Mon pa - si ou retir sa parol ki ou dir 'ou pa pou aksepte mon *ruling*' si oule en leklersisman oule plis leklersisman lo sa ki monn dir mon kapab donn ou.

Me selman mon *ruling* ou bezwen aksepte.

(APPLAUSE)

HON SEBASTIEN PILLAY

Mersi Mr Speaker petet mon *choice of words was wrong*. *Standing Order* i kler ki ou *ruling* i final.

So mon ava dir ki mon konsernen avek ou *ruling*. Rezon pou sa i senp. Bomaten tou lizye in vwar byen kler tou zorey in tann byen sa ki mon'n dir yer, lo en pou vin *raise* en pwen konstitisyonnèl an relasyon avek en *Right of Reply*. Ok? E dan en *Right of Reply* anba Konstitisyon napa landrwa ki dir en Manm i bezwen fer sa.

Me selman - (Onorab Georges *relax*) - me selman kote Gouvernman ti'n devret asire ki ler zot pe *move* en *motion to adjourn* mon Mosyon lo *quashing S.I.*, an relasyon avek logmantasyon kontribisyon Fon Pansyon, zot ti'n devret fer zot *due diligence* pou asire ki zot pou kapab anmenn Fon Pansyon pou en prezantasyon.

MR SPEAKER

Mersi.

HON SEBASTIEN PILLAY

E sa mon krwar Mr Speaker ou pe les sa pase par lefe, ki mon pa pe vwar en *independent arbitrator* avek tou respe *Sir*.

MR SPEAKER

Mersi.

HON SEBASTIEN PILLAY

Mon pe vwar en dimoun pe pans lo en kote, pou eksplike akoz en kote pa'n kapab delivre son langazman avek Lasanble Nasyonal. Mersi bokou Mr Speaker.

MR SPEAKER

Mersi. Sirkonstans dan ki sa in arive i an deor kontrol ki nou annan e mon krwar napa nanryen pou mon *amend* mon *ruling*. Mersi.

Bon lo deba nou ava konmans avek Onorab Cosgrow.

HON WALLACE COSGROW

Bonzour Mr Speaker. Mersi Mr Speaker. Bonzour tou Manm Onorab. E bonzour tou manm piblik ki pe ekoute.

Mr Speaker, ozordi bomaten nou repran deba lo Mosyon Onorab William ki ti ganny prezante yer dan Lasanble, apre ki'n annan serten deba lo Mosyon. Ti annan en propozisyon lo nou kote par Onorab Rocky Uranie pou anmenn en lamannman *the wording* sa Mosyon.

Avek le bi pou nou fer sa Mosyon vin en Mosyon en pti pe pli direk, pli konkret, e rod langazman dan en sans kantmenm en Mosyon pa *binding*, me solman rod en langazman en pti pe pli konkret

e serye avek Gouvernman, pou *tackle* serten bann *issues*, ki dabor nou tou dan Lasanble Nasyonal ozordi, e bokou Seselwa an deor pe resanti. E sa i sirtou bann *issues* an relasyon avek kou lavi e sityasyon en pti pe pou sitwayen Seselwa.

Malerezman Mr Speaker yer nou'n debat longman lo sa lamannman Mosyon. Me nou pa'n nobou - vi ki nou napa lamazorite lo sa kote - e nou pa'n nobou pas sa lamannman ki nou ti pe antisipe aköz nou ti espekte ki lot kote latab zot osi rezonnab, e zot osi anvi vwar serten pozisyon konkret ver zot Gouvernman. Me malerezman nou pa'n *achieve* sa Mr Speaker.

Me met tousala de kote Mr Speaker ozordi bomaten. Ozordi bomaten nou tourn *back* lo Mosyon Onorab Waven William. E menm si yer zot pa'n le zwenn nou pou pas sa lamannman, be nou bomaten - anefe mwan bomaten mon anvi dir sa avan mon antre dan deba lo Mosyon.

Menm si zot pa'n zwenn nou yer nou vwar e serten merit dan sa ki pe ganny prezante. E aköz nou'n toultan lo kote sa latab koz lo sa bann size, e nou santi ki ou dir bann size i bann size enportan.

Nou krwar ki sa bann size i devret ganny anmenn pli lwen bokou plis, e avek bokou plis konviksyon, avek bokou plis lenportans lo lapar Gouvernman e nou pa pou fer parey zot in fer yer. Nou pa pou fer aköz nou pa la pou nou zwe avek vant pep Seselwa.

So nou pou debat - anefe mwan mon pou debat pozitivman lo la. aköz mon vwar serten merit e mon krwar ki konman en Lasanble Nasyonal parey nou ti pe demande yer, ki nou al pli devan, pli konkret mon krwar nou devret kapab debat lo la aköz i konsern pep Seselwa e bann dimoun deor ki pe santi zot dan bann sityasyon difisil.

Mr Speaker yer mon ti ler mon ti fer mon lentervansyon, mon ti koz en pti pe lo ler Gouvernman i ganny elekte.

Mon pou tourn en pti pe lo la e mon anvi ranforsi en pti pe. Ler Gouvernman i ganny elekte, i ganny elekte lo en serten baz.

Lo serten bann baz, e enn bann baz se bann promes ki ganny fer anver elektora e sa bann promes i ganny fer dan diferan fason, me bann promes pli konkret ki zot fer se dan zot Manifesto.

Se dan Manifesto letan parti i prezant zot Manifesto pou eleksyon.

Nou konnen pep Seselwa deor in la in nobou *witness*, in nobou ateste ki bann keksoz ki ti ganny dir dan Manifesto parti lot kote latab - Parti *LDS* an se ki konsern pri lavi, an se ki konsern - Par egzantp yer nou'n tann an se ki konsern nou prop *tanker* anmenn delwil, anmenn nou karbiran Sesel.

Yer nou'n ganny en diskisyon lo la atraver kestyon pour Minis Finans. Nou'n tann bokou konsern ki'n ganny mete atraver *IDC*, *GICC*, konsernan larme. E nou pa osi oubliy sa fame *statement* ki ti ganny fer ki enn ler mon vwar i sirkile lo rezo sosyal, kot nou pou sakouy pye e zot pou anmas bann fri. Nou pa bliye sa. E mon krwar bokou Seselwa pa bliye.

So *basically* sete bann promes ki zot in ganny mon sipoze zot in ganny elekte lo la. Me Mr Speaker ki nou vwar, apepre menm avan me solman la nou'n ariv preski 20 mwan dan letan ki sa Gouvernman in ganny elekte, nou vwar preski dir en *complete about turn - u-turn* lo bokou sa bann promes.

Avan 2020 zot ti annan solisyon pou fer desann pri lavi. Solisyon pou *STC*, solisyon pour larme, solisyon pour *IDC*, e bokou, bokou lezot keksoz ankor. Me ozordi nou pe tann en lot diferan zistwar.

Mon ava pran saler Mr Speaker. konman enn premye. Yer dan Lasanble e dayer Lendi swar lo televizyon Prezidan in koz lo revy saler. Minis yer dan Lasanble in koz lo revy saler.

Me ki nou, nou pe dir lo sa kote ler nou ti pe demande bann keksoz pli konkret pou fer sa Mosyon vin pli konkret? Nou ti pe demande ki i annan bann lanons e bann desizyon, e bann plan konkret par sa Gouvernman.

Saler; Nou'n tande ki pou annan en azisteman saler pou bann dimoun ki ganny anba R8500. E sa i zis dan sekter piblik. Nou'n osi tande ki poudir nou pa konnen si *long service allowance* pou antre ladan. Nou pa ankor konnen nou ankor pe aziste, nou ankor pe zve avek bann nimeron nou pa ankor tro, tro konnen, selman pou annan en logmantasyon saler.

Eski i pou en konsolidasyon saler ek *allowance*? Ouswa eski i pou en logmantasyon saler? Me solman nou konnen ki poudir sa i pou zis en pti group dimoun ki travay dan seksyon piblik, me lamazo - *well* mon pa konnen si lamazorite, me selman en group dimoun ki dan sekter piblik bann dimoun ki ganny par lao R8500 zot pa

konnen ki pou arive avek zot. Eski zot pou kan eski zot, zot pou ganny en revi? 2023 eski zot osi zot pou pas ladan?

Mon al en pti pe pli lwen Mr Speaker. Mon ti demann Minis pour Finans yer en kestyon an se ki konsern, sekter prive. Parske dimoun ki travay dan sekter prive zot travay Sesel zot osi. Zot osi zot pe santi presyon lo zot Bidze, presyon lo zot lakour, presyon lo zot fanmir.

Minis pa'n pronons, anefe i pa'n reponn mon sa kestyon. I pa'n reponn mon sa kestyon pou dir mwan ki pou arive avek travayer sekter prive. Akoz nou konnen poudir dan sekter prive se selman Lalwa ki pou kapab obliz en anplwayer, pou ogmant saler travayer sekter prive.

Me sel Lalwa ki ozordi ki kapab obliz zot, se en sanzman dan Lalwa *minimum wage*. Ziska prezan e nou konnen okenn sanzman dan *minimum wage*, okenn sanzman ki arive, i bezwen annan serten konsiltasyon tripartit avek Gouvernman, avek Linyon Travayer avek Linyon Anplwayer. Ziska prezan nou pa ankor tande sa. E mon asir ou poudir pa ankor arive sa.

So Mr Speaker ler nou pe koz saler azisteman saler, nou

pa kapab zis get en pti group dimoun. Nou bezwen annan en keksoz konkret - en plan - en larout ki nou pou swiv pou nou dir la, la ki nou pe fer. E sete sa lideal deryer sa lamannman ki nou ti pe demann de yer.

Akoz nou pa pe vwar okenn keksoz konkret. *It's piecemeal - zot all over the place* e i annan plis konfizyon ki reasirman deor, poudir Gouvernman pou *take care* lo sa kote saler dan en fason byen organize pou travayer Seselwa.

Mon al lo lasistans sosyal Mr Speaker. In ganny fer resorti yer dan bann deba ki Gouvernman in ogmant lasistans sosyal bann *weights* par 33poursan. *Now i ok. Well and good* si in ogmant par 33poursan.

Be logmantasyon *weights*, i pa vedir kalifikasyon *welfare* - lasistans. Nou konn byen sa. Pli gro problemn ozordi. Pou sa dimoun ki pe vin devan Lazans Proteksyon Sosyal ki pe al dan distrik devan sa zofisye, pli gro problemn nou, nou konnen e mon konnen zot konnen akoz dimoun i vin kot zot e i plenny avek zot.

Pli gro problemn se prosedir. Prosedir lo prosedir, lo prosedir, ki fer sa dimoun fristre e ki fer ki tou resaman ti annan *on average* zis 4 dimoun

par distrik ki pe ganny asiste avek Lazans Proteksyon Sosyal! Se sa zot plan? Se sa keksoz konkret ki zot pe fer?

Case i ganny bezwen ganny anmenn devan en *Board*. *Board* i bezwen deside. Be sa *we did away* avek sa en bon pe letan pase. Ti annan en sistenm otomatik ki ti fer tou sa bann *assessment*. E nou ti *trust* dimoun ki travay laba pou zot fer sa bann *assessment* - ou konpran?

So basically zot met en pake retar dan sa bann zafer, e dimoun i perdi konfyans dan sa sistenm, e dimoun i prefere reste se li akoz si mon al laba swa mon pou nerve, swa mon pou ankoler, e mon sans gannyen i pli ba pou vin pli ba ki zanmen.

So se la ler nou pe koz lo keksoz konkret, annan en plan e Gouvernman i bezwen montre son vizyon son *roadmap* kote i pe ale se sa ki nou pe koz lo la. Se sa ki nou pe koz lo la. Malerezman zot pa'n zwenn nou yer pou nou kapab re aranz sa Mosyon, e fer sir ki Gouvernman menm sa pa *binding* me solman anmenn en mesaz for avek Gouvernman.

Mon vin lo pri karbiran Mr Speaker. Ozordi pri karbiran in ariv si mon pa tronpe R25.20 en lit gazolin. Mon pa rapel kan

dernyen fwa i ti ariv sa oter pri. Mon pa rapel. Me ki nou pe dir ozordi, ozordi sa dimoun ki annan son biznes transportasyon - *ok* transport dimoun pou al travay, manrmay pou al lekol, i pe fer son pti transportasyon dan *tourism* or ki pe saroy materyo. Be i pe vwar li difisil tousala pe manz dan son profi. I pe manz dan son profi.

Lavi pou li pe vin pli difisil, i manz dan son saler. Zot konpran mwan? I manz dan tou son benefis, ki li konman en pti biznes Sesel ozordi ti pe rankontre. Ou konpran mwan?

So basically nou, nou ki pe demande, dir nou Gouvernman, dir pep Seselwa keksoz konkret, ki zot plan an se ki konsern pri karbiran? Eski - mon ti met sa kestyon devan Minis yer - eski Gouvernman i pare *for the short term* tir en serten poursantaz or en serten kantite lo *excise tax* ki karbiran i ava tire, e pas sa benefis avek biznesmenn.

E ki demen sa biznesmenn i ava kapab pey son travay pli byen, pa ava fer *layoff*, i osi i ava kapab *enjoy* son profi en profi rezonnab byensir. E i ava osi kapab kit son biznes *going* e kit *the economy running*. Se sa ki nou pe demande bann plan kler.

I annan lezot keksoz ankor Mr Speaker. Par egzanz ozordi pri lilitite i enn ki egzorbitan. Annefe i relye avek pri karbiran ki servi pou ganny pou prodwir elektrisite.

SPTC ozordi pri bis in monte. Nou tou nou konnen. E i en gro fardo lo fanmir Seselwa. Sirtou bann fanmir ki servi bis *SPTC* pou al travay e pou al se zot. So nou pe demande ki Gouvernman i dir nou si zot pa pou fer nanryen dir zot pa pou fer.

Me selman nou anvi zot dir nou kler e dimoun i ava kapab re aziste zot re sitye zot pou konnen ki zot fer. Ou ganny mon Onorab Georges? Yes.

Mon dernyen pti bout se komodite. Mr Speaker si i annan en keksoz ki mon pa ganny en konpran mon sey ganny en konpran mon pa ganny en konpran, se lefe ki zot sa kalite revizyon ki zot in fer lo pri komodite.

STC i pran tou komodite debaz ki i konnen poudir pep Seselwa i servi mon pe koz debaz *ok* diri, delwil, disik lantir, lot, lot eksetera, disel – wi, zot fer monte zot fer monte konsiderableman apre zot dir ou sepa *RRP* pou *solve* sa problem. Bannla in donn definisyon pou *RRP* dernyen-r-

er la. Zot dir se sa nou solisyon apre i fer desann lo lasos *barbeque* konmsi nou fer *barbeque* tou le semenn toulezour nou.

MR SPEAKER

15 minit Onorab en.

HON WALLACE COSGROW

I montre ou Mr Speaker en mank vizyon, en mank plan, en mank desizyon konkret par sa Gouvernman pou adres sa sityasyon.

E dabor mon ti dir osi yer ki si zot ti sir ki zot pe fer, si zot ti sir poudir Gouvernman pe *tackle* sa zafer pri lavi dan en fason byen, organize e planifye, zot pa ti pou vini avek en Mosyon. Si zot in vin avek en Mosyon savedir zot in vwar poudir sa Gouvernman pa pe fer li parey i sipoze ganny fer.

So mwan Mr Speaker mon anvi - mon anvi zwenn avek zot laba pou benefis pep Seselwa. Mon anvi zwenn avek zot me zot bezwen fer zot lentansyon kler, e zot bezwen montre direksyon drwat kot nou pe ale pou benefis pep Seselwa.

So Mr Speaker avek sa lentervansyon mon pou aret la. E parey mon'n dir o konmansman mon krwar lentansyon i bon malgre pou mwan parey mon'n dir i byen

zot pa ti vin avek mon krwar lentansyon i *ok*, be nou ava gete ki mannyer deba i ale en lazournen e nou ava gete ki mannyer nou get sa Mosyon.

Avek sa Mr Speaker mon a dir ou mersi pou sa letan.

MR SPEAKER

Mersi Onorab.

(APPLAUSE)

MR SPEAKER

Mon ava donn laparol Onorab Romain.

MR SPEAKER

Mersi Onorab. Nou a donn laparol Onorab Romain.

HON GEORGES ROMAIN

Mersi Mr Speaker. Bonzour tou bann koleg Onorab. E tou dimoun a lekout. Mr Speaker mon pou siport en tel Mosyon anmennen par Onorab William, dan en moman kot pri lavi pe kontinyen ogmante. E otomatikman bann lakour kot reveni i pli ba. Zot war zot bezwen fer bokou zefor pou fer de bout zwenn.

Mr Speaker, la nou bezwen rekonnèt zefor ki nou ladministrasyon *LDS* pe fer. E pe anmennen pou ede pou soulaz bann fanmir ki war zot dan sa sityasyon difisil.

Gouvernman atraver *STC* in ede pou sibvansyon serten komodite debaz. E pe kontinyen lans lapel avek bann marsan ki pe pran *wholesale* avek *STC*, pou asire ki zot pas bann benefis direk avek konsonmater.

Zot bezwen realize ki *STC* i zwe son rol e ede pou redwir kou transportasyon lo sa bann komodite.

Akoz i anmenn sa direk kot zot pou retir presyon lo marsan, i normal alor pou osi demann zot pou zwe zot rol dan sa moman letan, kot lemonn pe pas dan en kriz. E kot Sesel pa'n ganny eparye.

Mr Speaker, la pa en moman pou vin fer profi egzorbitan lo konsonmater e alors zot osi zot devret ede donn en koudmen pou redres pri lavi dan nou pei, pou soulaz fanmir Seselwa. La mon le felisit bann ki pe fer sa zefor, e nou espere ki larestan i ava swiv.

Petet la mon ti ava kontan demann *FTC* prenon kont zot manda pou re get dan posibilite pou entansifye zot zefor, kot petet zot ti ava kapab ed konsonmater pou idantifye e konpar bann pri komodite ki pli meyer marse. Mon rapel sa ti vremen ganny apresye par bokou manm piblik ler ti pase lo televizyon.

Mr Speaker nou'n vwar ki Gouvernman in propoz en sistenm *rebate* ki pou ed fanmir ki pe pas atraver difikilte pou pey zot *Bill* elektrisite.

Sa R300 ki pe peye lo zot *Bill*, i ava ede pou pas sa depans lo en lot keksoz ki enportan kot lakour.

Mr Speaker, nou osi okouran ki i annan bann *meter* delo ki pa pe fonksyon byen kot bann lakour. E sa i fer ki *PUC* pe fer bann estimasyon ler pe prepar *Bill*. Ler sa estimasyon i mal sa i kapab afekte reveni en lakour, espesyalman si i pa'n konsonm sa kantite delo.

Petet la nou devret lans en lapel avek *PUC*, pou fer sir ki zot bann *meter* pe fonksyon byen. E ki zot ava dan en pozisyon pou sarz en kliyan son lavalier ki ni servi. Akoz la dan sa moman tou reveni kot en lakour i pli enportan.

Mr Speaker, nou ankouraze pou tann nou Prezidan, ki'n fer resorti dan son konferans lapres ki Gouvernman pe al reviz saler debaz. E ki sa i ava ede pou anmenn plis konfor kot lakour avek bann ki pe ganny afekte.

En lot bon nouvel se ki Gouvernman atraver Lazans Proteksyon, pe al reviz lafason ki i *assess* lasistans finansyel ki

ganny donnen pou en fanmir ki pe pas atraver difikilte.

Sa i vremen pozitiv. Akoz i ava ankadre plis fanmir ki merite. Akoz nou Gouvernman *LDS* i enn ki responsab e krwar fortman ki son pep i devret viv dan dinyite.

Mr Speaker, avek pri lavi ki'n ogmante, osi pri karbiran ki'n monte, i enportan ki nou edik piblik pou pran zot responsabilite dan zot bann depans ki zot fer.

Mr Speaker, in ler pou nou aret fer politik avek pri lavi. Akoz sa pa zis Sesel ki pe ganny afekte. Me bokou lezot pei. Mon lans en lapel avek nou Lopoziyon pou osi zwe zot rol pou edik nou pep e non-pa konfiz zot.

La mon le fer Lopoziyon rapel ki zot ti o pouvwar pou 43an, e si sa Gouvernman ti pe byen fer, ti pou napa sa kantite malere ki zot pe fer nou krwar i annan. I montre ki zot Gouvernman pa'n vremen pran zot zentere e delivre pou zot. Zot in *fail* sa pep Mr Speaker.

Mr Speaker, pa zis Sesel ki pe ganny afekte avek pri lavi ozordi. Parey *US* pe sey fer nou krwar. Nou vwar en pei parey *Sri Lanka* ki pa sitan lwen ek nou pe pas dan en kriz serye, kot napa ase manze. E karbiran in vin en komodite ase rar. E

kot nou vwar gran laliny pou aste sak prodwir. Sa in kre bokou enstabilite dan sa pei ki depan bokou lo touris.

Zot Gouvernman in resaman enplimant en lasemenn travay 4 zour dan plas 5. Sa senkyenm zour zot in dedye pou zot kapab plante. E prodwir zot prop manze kot zot lakour. Sa dan en larzan kot zot pei pe fer fas avek mankman manze.

Mr Speaker, en lot legzanp dan en pei byen devlope, nou vwar dan serten parti Ostrali. Ki pe demann son bann zabitan pou tenny zot lalimyer e pa servi elektrisite pou plis ki 2erdtan aswar pou ede redwir konsonmasyon lenerzi dan zot pei.

Alor i enportan ki nou tou nou fer zefor pou nou koup nou konsonmasyon e depans kot pa nesaser. Annou konn nou priyorite. E annou fer zefor pou redwir gaspiyaz. Si nou azout nou zefor ansanm, i pou annan en lenpak pli larz lo konsonmasyon pei. E sa i ava ede pou redwir pri lavi.

An menm tan ki Gouvernman pe rod tou fason pou donn lasistans bann fanmir ki dan bezwen, nou bezwen osi rod fason pou ed nou lekor. La mon pe koz lo

bann ki annan kouraz pou kapab leve al travay.

I annan bokou *vacancies* ki ganny pibliye tou le semenn dan plizyer sekter. Seselwa i en Nasyon ki travay dir Mr Speaker. Me malgre sa i annan ki kontinyen kale e depan lo Gouvernman.

Sa i pa normal, aköz si en dimoun i kapab debourye, annou les Gouvernman ed bann ki vreman vilnerab e dan bezwen.

Mon lans lapel ek Gouvernman pou kontinyen fer zot mye, pou asire ki bann ki merit ganny lasistans i sa bann ki pou benefisyè.

Mr Speaker, avan mon terminen, mon ti ava kontan felisit Gouvernman pou sa bon travay ki zot pe fer dan sa moman difisil, pou kontinyen amelyor lavi Seselwa dan en moman kot bokou lezot pei pe pas atraver bokou difikilte. Annou kontinyen rod fason pou fer sir ki tou fanmir Seselwa i ava kapab soulaze dan sa moman difisil.

Mr Speaker, la mon le fer en lapel avek pep Seselwa, pou nou montre en pe plis gratitid pou bann bon keksoz ki pe arive dan nou pei ozordi.

E non pa zis senm negativite. Annou mazin sa bann defi ki'n tap lemonn

pandan sa dernyen 2an. E pou en pti pei parey Sesel ki'n nabou debout for e rezilyans. E refer nou lekonomi pandan en moman ki'n tre difisil.

Nou ti'n kapab annan en diferan senaryo ozordi. Me en Gouvernman *LDS* ki'n pran bann desizyon brav pou remet nou debout. Nou devret fyer pou sa lakonplisman. La i lemoman pou nou solider ansanm e rod lemeyer pou nou popilasyon. Mersi Mr Speaker.

MR SPEAKER

Mersi Onorab. Mon ava pas laparol pou Onorab Aglae.

HON EGBERT AGLAE

Mersi Mr Speaker. Bonzour tou Manm Onorab e tou dimoun ki a lekout. Mr Speaker ankor enn fwa e parey ou'n dir yer, ou'n ekout nou bann entervansyon e bokou size lo lamannman ki'n antre bann pwen i preske menm size ki dan sa Mosyon ki la devan nou.

Ki fer ki nou lamannman ki nou ti pe anmennen ti pe al ver menm direksyon ki sa Mosyon li menm li ti pe anmennen. E malgre bokou lot kote latab zot rod tou diferan rezon pou bann rezon politik pou zot pa aksepte.

E pa'n kapab sirmont sa grander lespri ki mwan mon ti

pe antisipe nou osi lo sa kote latab lo en size ki tanzantan nou pe vin devan nou pe koz lo la. Pou aport soutyen sa pep ki dan difikilte.

E en mo ki'n reste dan tou lede Mosyon se sa difikilte avek kou lavi. E nou ti santi ki Mosyon ti en pe letan ki i lo *Order Paper*, e ki Gouvernman o fir annan mezir ti pe fer serten lanons dan en fason *piecemeal* nou ti santi ki nou bezwen annan bann mezir, bann lanons pli direk - pli konkret pou sa pep ki pe ekoute deor, ki pe pas atraver bann difikilte ganny en soulazman ek en lespwar - pou dir be ozordi mon dan en sityasyon. Plan ki Gouvernman pe tal devan mwan di-si de la 3 mwan, 6 mwan dan 1an.

Mon pou'n war mon soulaze e ki mon kapab plan mon lavi ouswa mon bann proze ki *on-hold*, ouswa mon bann aspirasyon ki mon ti annan.

Rekalibre li lo en kalandriye ki mon kapab, sa endividi i kapab demare e koze an fanmir pou dir vwala direksyon ki nou pou ale. Se en fason ki ti kapab donn zot en lespwar.

Me pa sa ki pe arive. E se sa ki nou, nou ti santi lo sa kote ki anmenn en pe plis lapir. Akoz sa Mosyon i pe debout lo zis en

kote lipye ler nou pe get li. Nou dir li annou met ankor en lapat ek li. Annou fer li *stand* en pti pe pli *firm*. Ki i ava donn plis sipor.

E an menm tan, menm si Mosyon pa *binding* met en pti pe plis lobligasyon lo Gouvernman an menm tan, pou li kapab pran aksyon.

Vin ek bann mezir ki pli konkret. Bann mezir enportan. Me i domaz zot pa'n aksepte sa ekstansyon ki nou, nou ti pe donn zot - sa sipor - pou bann rezon politik.

Me nou lo sa kote latab nou pa kapab ipokrit aköz nou, nou'n anmenn en seval batay depi sa setyenm Lasanble kot i konsern kou lavi en sa pep.

Akoz nou santi nou koz ek nou dimoun, nou tann sa bann ayo kriye ki deor. Menm devan nou laport. E nou krwar poudir i nou responsabilite koman bann Parlman *to take the Government to task*.

E se sa ki nou nou'n fer *all along* ziskan la ozordi. Malgre zot ti pe dir nou be anmenn nou Mosyon. Ouswa fer lamannman. E ki ler nou fer lamannman, zot vot kont nou lamannman. La annou zize lekel ki ipokrit e ki pa ipokrit la. Sa nou kit pou sa pep ava deside.

Mr Speaker, en lot fraz dan sa Mosyon li menm li, se revwar an plis o fir lekonomi, an mezir ki lekonomi i permet. E mwan pou mwan Mr Speaker sa fraz. Malgre loter Mosyon li, in dir poudir i ti en parol i ti tande letan i ti ankor sa zanfan kot i ti ne dan nou parti, pou li ariv kot i ete ozordi. Mon krwar i enportan ki o fir an mezir aköz diferan repriz. Minis Finans i vini, Prezidan menm i koz lo la, in dir nou, lekonomi pe refer. Lekonomi pe fer byen. In sirmont lekspektasyon e menm dir ki *IMF* in etonnen par sa ki Sesel in kapab *achieve* dan sa kourt dele letan - *almost* 18 mwan.

E pou mwan osi i anmenn serten refleksyon. E serten osi dimoun ki pe reflekte deor. Se ki *LDS* Oktob 2020 i pa'n erit en pei ki ti lo son zenou. Parey zot le fer nou krwar, sa kales kase.

Labaz lekonomi Sesel in ganny konstri dan 43an. Wi, labaz ti la. Nou ki'n konstri dan sa 43an. Tou sa ki zot war ozordi ler zot pase, se bann program ekonomik ki nou nou'n konstri.

Napa naryen ki'n parfe. Parey ozordi nou ti en Gouvernman ki pa ti parfe, nou ti fer fot. In annan bann sirkonstans ki'n pase.

Parey ozordi dan zot Gouvernman i annan bann sirkonstans ki'n pase. I annan bann fo pa ki zot pe fer ki zot in retourn lo la. Mon pou sit enn, de taler. Ki fer ki zot pa parfe zot osi. Zot ankor pe aprann serten keksoz akoz zot nouvo dan governans. Malgre labous i koze. Aksyon pa mars parey. Sa nou bezwen note.

So Mr Speaker, sa pei pa ti en kales kase, akoz Sesel 2020 pa ti en dezer ler nou ti donn zot. Ki zot in konstri dan 18 mwan? Keksoz ti la.

Mr Speaker, en lot eleman dan kou lavi si nou pou koz lo la, lo adrese - e yer ler mon ti fer mon lentervansyon mon pa ti pe vin liste defayans, bann problem.

Be la mon pou antre en pe ladan. Akoz mon santi i enportan. I enportan.

E yer dan en kestyon ler nou ti pe koz lo pri *fuel* Sesel. E Minis ti dir poudir Sesel dan la rezyon nou pri *fuel* i pri pli abordab. Kan i pa korek.

E mwan mon'n al fer mon resers mon gete Mr Speaker. Ozordi Zen 2022 Sesel son pri *fuel* i \$1.9 par lit. Moris i 1.6. *La Réunion* i 1.8. *Comores* 1.3. So lekel ki pi ser ladan, se Sesel. i kler sa. So, pa vin donn nou sa bann lagrenn bat latet. Kontinyen pou fer nou krwar.

En lot pwen Mr Speaker. Mon'n tann Prezidan in koz lo *STC*. E la mon pe vin sit sa bann defayans ki zot annan la.

Ler zot ti pran pouvwar zot ti dir nou poudir *STC*, zot bezwen ferm sa bann *outlet*. Akoz pou rezon finansyel - rantabilite, profi - ti pe kout zot pli bokou, san mazine poudir pou annan son reperkisyon lo la. E zot ti dir se pou donn bann lezot marsan loportinite pou zot fer plis biznes. Pou zot pli grosi dan en sans.

San mazine poudir ozordi i annan en kominote *retailers* ki pa Seselwa ki kontrole sa. E zot dan lepase ler nou, nou ti o pouvwar zot ti souvan koze.

Atraver ou Mr Speaker, Onorab Henrie ti enn sa bann dimoun ki ti koz bokou lo kartel. E nou ti konnen poudir ti annan sa bann kalite laranzman kartel ki ti pase dan pei.

E si sa ti bann leka, eski ou espekte pou ganny en *fair deal* dan pri letan sa *retailers* i zwenn ansanm, e zot, zot met zot pri, ou, ou pou annan *say* ladan?

E ozordi nou war en vire tournen ki pe ganny vire tournen. Kot zot war poudir zot bezwen rod fason ki *STC* i re antre dan sa bann parti pei -

parti bann *Zil Inner Island* pou sey anmenn komodite abordab, san ki sa *RRP* i ganny met en *sticker* ouswa met detrwa Roupian plis.

So nou bezwen reflexir parfwa lo serten bann desizyon ki nou pran. Annou pa rod bann rezon banal. Parey mwan mon dir kot ti annan *loophole* pou fer. Kot ti annan koripsyon zot in fermen, i byen.

Be pa detrir sa keksoz ki ti dan benefis sa pep. Sa ki'n fer son aksyon i annan sistenm legal. I annan bann lenstisyon ki kapab pran bann desizyon avek zot. Fer sa.

Pa aköz sa ti nou *legacy* ki zot anvi detri pou kre zot prop. Ki apre zot war poudir zot pa kapab fer li. E prezan zot bezwen re adopte sa ki nou, nou ti met an plas.

E sa ki anmenn mon lo en konklizyon Mr Speaker. Ki byento zot azanda avan ti 'sanzman', apre la in vin 'transformasyon.' E la zot lot azanda mon krwar ki pou vini se azanda 'adopsyon.'

En lot konsern ankor Mr Speaker ki Mosyon mon santi si nou ti pran bann mezir pli konkret - e Onorab Cosgrow in tous en pti gin lo la, i size lasistans sosyal. Zot pe nonm *salary increase*, mon napa problenm ek sa. Be nou bezwen

kler osi kot i konsern lasistans sosyal. Nou pa pe dir tou dimoun i merit ganny lasistans sosyal.

Me ozordi pou ou al *apply* en lasistans sosyal, i konmsi ou pe al ranpli en form *tender* pou en proze.

Sa pwa dokiman ki ou bezwen. San garanti ki ou pou gannyen tou en? Ou bezwen pas dan diferan lofis. Pey serten dokiman, zis pou ou kapab ganny akse avek en sistenm *welfare* ki ou pa garanti ou pou gannyen, menm si ou annan merit.

Eski sa i normal? E in dir *weight*. Revizyon *weight* fer monte 5400, i gou tande dan lespri sa. Be eski ou krwar ou pe al gannyen sa 5400 ou?

Non, bokou in ganny let, i vini i dezapwente. Koz ek mwan. I napa li, be selman nou pa kapab fer naryen nou lo nou kote.

Sa i bann promes ki zot, zot ti promet dimoun ler zot ti pe fer zot bann konpany sa. E bokou zot ozordi zot dir zot pa kapab fer naryen zot osi.

En lot pwen ki Mr Speaker ...

MR SPEAKER

15 minit Onorab.

HON EGBERT AGLAE

Mon pou touse. E mon ava terminen osi Mr Speaker.

Mosyon osi i annan sa size Trezyenm Mwan Saler, performans bonous, ki Mosyon i anvi touse o fir an mezir ki keksoz i amelyore - lekonomi i amelyore.

Mon santi poudir nou bezwen fran ek sa pep. Nou'n touy Trezyenm Mwan. Zot in touy Trezyenm Mwan saler. E par laport deryer zot anvi anmenn en *performance* bonous ki pa neserman tou ki pou benefisyé. Fodre ou'n perform, parey in dir. Me pou mwan tou Seselwa i en travayer ki i travay, ki'n *apply*. *Ok?*

Par egzanp tou Seselwa i *entitle* pou li ganny son gratwite, son konpansasyon ler i deside pou li pas en serten letan dan sa karyer.

Napa okenn kondisyon ki atase avek *unless* ou ganny *terminated wrongfully* pou *any wrongful doing*. Sa i dan Lalwa sa.

Be si ou'n travay, mon pa war akoz ki ou pa merit ganny sa Trezyenm Mwan ouswa sa bonous. E pou mwan sa ki fer zefor ekstra pou mwan la, i devret ganny en pti ekstra. Par sa zefor ekstra ki li in fer dan sa travay pandan sa lannen.

Sa mon ava dir petet i annan serten lakonpanyen in

war poudir travayer x in delivre par lao son standar ki, par lao sa rekomandasyon ki nou ti'n mete, la ou donn li ankor en ekstra.

E sa i ava ankouraz sa ki pli ba prezan pou li, li osi os son standar dan donner. Be ler ou pa pou donn li, eski ou krwar i pou ganny en lankourazman ou? Eski ou krwar i vin pli prodiktiv par pa donn li?

Ouswa i ouver laport pou fer ki arive, i rod tou fason ki mannyer li i pou ganny son larzan dan ou lenstitisyon ki i ladan.

E i arive parfwa sa.

MR SPEAKER

Konklizyon Onorab *please*.

HON EGBERT AGLAE

So Mr Speaker, pou konklir sa Mosyon e sa lamannman ki nou ti anmennen lo Mosyon pe al ver menm bi, menm koz.

I zis ki sa enn ki la devan nou i lo en bekir. Nou, nou ti pe donn li en sipor pou li kapab mars en pti pe pli drwat. E al en pti pe pli devan dan enn fason pli konkret. Mersi Mr Speaker.

MR SPEAKER

Mersi Onorab. Mersi, mon ava donn laparol Onorab Gill.

HON CHUCHILL GILL

Mersi Mr Speaker. Bonzour Mr Speaker. Bonzour tou dimoun a lekout. E tou Manm.

Mr Speaker, sa Mosyon lo kou lavi i enn tre enportan pou pep Seselwa dan sa letan ki nou ete ozordi.

Me lesansyel i depan lo kwa ki ganny fer. Dan son faz enplimantasyon, dan en fason konpreansiv pou asire ki retonbe i tous tou Seselwa. E ki i ava dres zot bann difikilte.

Ki lobzektif prensipal i ganny mentenir pou sa pep. Kestyon alors, kwa ki pou ganny enplimante an plis fir an mezir ki lekonomi i permet?

Mr Speaker, donner sityasyon ki sa pep pe fer fas avek ozordi, eski i annan en plan konkret, en *roadmap* kler?

Eski koman en pei Gouvernman in fini idantifye bann mezir apropiye? E lekel bann diferan group e kous dan sosyete ki pou ganny touse?

Sa fason ki pou ganny touse, i devret dan en fason rezonnab e soulazman parey ki Mosyon pe demande.

Eski Gouvernman in osi donn son lekor en dele letan ki sa bann diferan aksyon enplimantasyon pou ganny pran? E a ki pwen ki sa bann mezir pou'n fini ganny

enplimante an term mwan e lannen?

Espesyalman pou sa bann dimoun ki pli vilnerab dan pei. Pou ki zot ava vwar ki zot pouvwar aste ava finalman amelyore, e dan en fason adekwat.

Mon konsyan ki en tel legzersis i depan bokou refleksyon. Pou sikse lenplimantasyon. Par egzamp yer Minis ti dir nou ki i krwar ki sa lapros zis adres depans e pa neserman lapros pli bon.

Me i krwar ki selman selon li Gouvernman i devret war fason pou ogmant pouvwar aste sa group vilnerab, vi ki bokou sa bann faktor i sok eksteryer.

Mon selman parsyelman dakor, aköz eski sa pouvwar aste adekwat Gouvernman pou neserman kapab donner ozordi?

Mr Speaker, donner la realite devan nou ozordi. Kot Gouvernman pa neserman kapab donn ogmantasyon merite. Me selman kapab donn sa ki posibil. Se pou sa rezon ki sa size i devret ganny vwar dan en fason konpreansiv.

Mon senserman krwar ki lapros, en konbinezon ogmantasyon avek *subsidy* kot i posibil, i ava donn valer sa ogmantasyon ki posibil.

Pli enportan ankor revwar priyorite depans Gouvernman. Koup kot i annan gaspiyaz. Vwar en fason pou dil avek bann laboutik *retail* ki pe abiz zot pri komodite.

Annan en mekanizm kot tou sa bann benefis ki Gouvernman i sipoze donnen i ganny *monitor*, pou asire ki konsonmater i vremen vwar benefis bann lenplimantasyon. E merit ganny met, ki pe met an plas.

Mr Speaker, i pou osi tre enportan ki lapros lenplimantasyon pou Zil Pros ek Praslin, i ganny adrese dan en konteks zot realite ozordi, dan en fason diferan pou bokou plizyer rezon.

Pou bokou lannen Gouvernman in annan en lapros etabli. Me sa lapros pa'n zanmen ganny re evalye pou reflekte realite e difikilte ki zabitan sa 2 zil i fer fas avek.

Donnen sityasyon lo Zil Pros ek Praslin, fodre fer kler ki sa difikilte ki zabitan pe fer fas avek, i bokou plis difisil ki zabitan lo Mahe.

Se pou sa rezon ki lapros pou Zil Pros ek Praslin i devret ganny revwar dan son konteks pou li. A en moman dan letan *COVID* restriksyon ti'n ganny mete an plas.

Ki menm touris pa ti ganny drwa mont Praslin ek La Digue. Me lo Mahe bann biznes touristik ti pe kontinyen resevwar kliyan.

E la ki *COVID* pe re grese, mon pe demande ki Gouvernman i revwar lafason ki Zabitan Zil Pros ek Praslin i ganny trete dan tou son sans.

Enkli sipor lo kote aktivite ekonomik. Sa fardo kout lavi. Sa pri materyo konstruksyon tre elve. Kou elve lo konsonmater pou komodite. Kou transportasyon Mahe, Zil Pros ek Praslin. Kontribisyon bidzeter par Gouvernman an relasyon avek lakantite kontribisyon ki Zil Pros ek Praslin i kontribye dan kof Leta an traver kontribisyon *tax*.

Kou *Air Seychelles* Praslin/Mahe. Plis depans lo zabitan sa 2 zil pou bann Biro Gouvernman ki pa'n desantralize.

Kot zabitan sa 2 zil napa swa me pou sey trouv larzan pou desann Mahe pou fer zot bann tranzaksyon.

Depans adisyonnal ki bann paran i bezwen fer pou zot zanfan, ler zanfan pe etidye Mahe, konpare avek en fanmir ki reste lo Mahe.

Napa en mekanizm an plas kot zabitan Praslin i kapab vwar Minis lo Zil Pros ek

Praslin. En privez ki zis zabitan Mahe ki annan.

Pou zabitan sa 2 zil ankor zot bezwen trouv larzan pou desann Mahe pou sey adres bann problem, ki bezwen ganny adrese lo nivo ministeryel.

Mr Speaker, lalis i tre long. Mon krwar tou Seselwa e Gouvernman i ava kapab konpran ki kalite sityasyon zabitan sa 2 zil i fer fas avek lo sa menm *minimum wage* Nasyonal konpare avek zabitan ki reste lo Mahe. Eski sa i en *fair deal* pou Zil Pros ek Praslin?

Mr Speaker, donnen kot staz devlopman Zil pros ek Praslin in arive. Eski i pa'n ler pou Gouvernman komans reflesir lo posibilite annan en Komite Onivo pou Zil Pros ek Praslin?

Ki tou le trwa *MNA* Elekte Lasanble Nasyonal i ganny reprezante lo la. Osi avek en konpozisyon lezot dimoun avek kapasite nesese sorti dan sekter prive.

Avek bi pou angaz ek Gouvernman dan zeran, dan planifye devlopman mazer. Partisip dan bann diskisyon gran liny.

Partisip dan bann diskisyon size ekonomik enportan. Angaz ek

Gouvernman pou adres size desantralizasyon bann servis enportan.

Angaz ek Gouvernman lo vre neseseite resours. Angaz ek Gouvernman lo lezot size pertinan pou Zil Pros e Praslin.

Mr Speaker, mon pe koz lo Komite onivo, bipartisan par lao politik. Avek sel lobzektif pou fer bouze dan en fason tanzib Zil Pros ek Praslin.

I kler ki Gouvernman pou bezwen komans sa konversasyon serye pou rod en solisyon e revwar lafason ki Zil Pros ek Praslin i ganny antreprann pou benefis sa bann Zabitan.

Fodre pa ki nou krwar ki tou fason fer ek diferan desizyon ki ganny pran, tou i devret lo en baz nasyonal.

I kler ki i annan serten desizyon Gouvernman konteks sa 2 zil i devret ganny pran an konsiderasyon. Pou benefis zabitan Zil Pros ek Praslin, mon swete ki Gouvernman di zour ava pran an konsiderasyon sa bann pwen tre enportan ki mon'n met devan.

Mr Speaker, mon krwar mon'n fer mon devwar pou met devan konsern zabitan mon distrik. E osi an sipor mon koleg Onorab Zil Pros. Osi konsern zabitan Zil Pros e zabitan Praslin an zeneral.

Avek sa Mr Speaker, mon pou donn mon sipor pou sa Mosyon lo koud lavi. Tout an espektan e avek lespwar ki gradyelman Gouvernman i ava komans sa konversasyon enportan.

An konsiltasyon avek zabitan Zil Pros ek Praslin. Avek bi pou seryezman adres sa bann size tre pertinan pou en soulazman merite pou zabitan sa 2 zil.

Mon ensiste e enplor Gouvernman ki tou sa bann konsern i ganny pran tre, tre serye. Mersi Mr Speaker.

MR SPEAKER

Nou annan en problemn teknik lo kote elektrisite mon krwar. Ki pe fer ki nou deba pa pe ganny transmet lo *SBC* avek radyo.

Alor sa ki mon pe propoze se ki nou ava pran e poz la. Mon ava met 11er mwen en kar koman letan pou nou rebran.

Be selman depan lo ki difikilte nou pou gannyen. Madanm Clerk i ava kapab enform zot antretan si nou kapab rebran a se pwen.

So nou ava pran poz la e provizwarman nou a met 11er mwen en kar pou rebran pou sey rezourd sa problemn. Mersi.

(BREAK)

MR SPEAKER

Byen, tou keksoz i annord pou nou kontinyen? Mon a donn laparol prezan Onorab Labrosse.

HON RICHARD LABROSSE

Mersi Mr Speaker. Bonzour Mr Speaker. Bonzour tou dimoun prezan e bonzour spesyal pou bann ki a lekout dan lakour. Mr Speaker ozordi devan nou i annan en Mosyon ki al *comme* swivan;

Swivan bann mezir anonse ki pou ganny enplimante par Gouvernman, sa Lasanble i demann Gouvernman pou kontinyen revwar an plis firamezir ki lekonomi i permet, pou soulaz sirtou bann ki dan difikilte ek kout lavi.

Mr Speaker Mosyon ki devan nou se pou nou donn nou kontribisyon koman Manm Parlman, pou ede dan soulazman pri lavi ki nou pep e plizyer lezot pei dan lemonn pe pas atraver ozordi. Mr Speaker *LDS* depi son eleksyon 2020, in fer li son devwar pou regard bann diferan opsyon ki pou ede fer pri lavi dan Sesel desann lo en limit, ki pou kapab soulaz sirtou bann ki nou bann saler pli feb dan sosyete.

Dan sa Manifesto pou eleksyon 2020, *LDS* in fer resorti ki Gouvernman pou revwar fason loperasyon biznes *STC*, sa avek bi pou revwar son bann kou loperasyon ki sa apre i a kapab pas ek bann konsonmater.

Wi in soulaz fanmir ek bann zefor ki *STC* pe fer, sirtou kot nou'n kapa vwar diferans kot bann komodite ki nou pe servi toulezour. E sa byensir i zis en komansman. E osi Mr Speaker mon ti a kontan osi met dan latansyon, ki i annan osi bann konplent deor ki bann endividi bann dimoun pe fer, sirtou lo bann pri *RRP* ki nou pe vwar ki pe ganny bare, kekfwa la nou ti a kapab si *STC* ti a kapab donn en pti pe plis leksplikasyon dan en moman ki apropiye.

Mr Speaker dan distrik kot ou pase partou, wi i annan koze lo pri lavi, sa i pa en mansonz. Me i osi annan bokou koze kot dimoun osi pe osi ganny eksplike parfwa bann keksoz ki Sesel koman en Pti Leta Zil ki depan bokou lo lenportasyon i napa kontrol lo la.

Bann gran pwisans dan lemonn ki annan bann gran, gran pouvwar ekonomik ki kontrol tou bann marse, e nou ek bann lezot grander zil parey

nou dan lemonn nou santi nou vilnerab.

Ler nou koz pri lavi dan Sesel i enkorpor plizyer keksoz ki zwenn avek li, legzanp depi sa zanfan ki ankor pe lekol depi dan lakres or depi son nesans i osi ganny afekte depi la.

Sa i vin ek bann marsandiz ki zot pou bezwen e leer zot al lekol kot la plizyer fwa osi paran i bezwen fer zot Bidze separe, ki parfwa bokou nou ki'n grandi i pa neserman ganny sa ki nou ti merite gannyen dan sa moman.

Nou rekonnet sa bann dimoun ki pe leve toulezour, pou fer sir ki lo latab zot fanmir i annan dipen ek pwason pou donner ouswa dezennen. Souvandfwa zot menm zot ki zot lapey i pli ba. Sa i vin plizoumwenn bann ki zot lapey i vremen ba pou zwenn ek bann depans toulezour.

La mon pe lans lapel ek Gouvernman dan menm laliny ki *IMF* in felisit pou sa travay *noble*, ki pei pe fer ki nou regard lo saler bann dimoun sa bann dimoun avan tou - ki en pti keksoz azoute lo zot ki ava osi soulaz zot pou anmenn dan lakour.

E mon garanti tan ki pei i kontinyen fer byen, sa osi i ganny revwar si fodre fer par lannen Mr Speaker. Ler mon lo

sa not Mr Speaker, mon osi rekonnèt travay san ses ki nou Minis Finans pe fer, pou re organiz lekonomi nou pei. Menm lemond in rekonnèt sa, ki'n fer li vin en kandida koman bann meyer Minis Finans dan Lafrik par *African Business Leadership Awards*.

Minis si ou pe ekout nou mwan, mon ti a kontan dir ou ki ou'n deza en gannyan zis par sa nominasyon, e Sesel sirtou bann zenn ki a pe monte la deor sa i a vin en lenspirasyon ki montre ler ou travay dir, drwat e onnet ou ganny rekonnèt.

Felisitasyon ankor enn fwa e kontinyen sa bon travay. Ansanm avek ou lekip dinamik a kote ou kot Minister Finans. La mon mazin osi bann profesyonnel ki sorti Plaisance ki pe ed nou dan sa travay *noble*.

Mr Speaker ler nou pe koz fer desann pri lavi ler mon get otour mwan, mon osi rekonnèt ki sa i pou en louvraz kordinen pa zis ek L'Egzekitiv, me tou bann partner ki an deor Gouvernman.

La mon pe osi lans en lapel avek Lopozisyon pou vin ek bann pozisyon konkret non-partizan. Parey zot konnen linyon i fer lafors, met diferans de kote, ler in ariv ler pou nou koz pou sa Seselwa la deor

annou pa dispit ouswa montre nou lakoler.

Mon pe osi sizer ek Gouvernman atraver ou Mr Speaker, ki zot osi kontinyen sa travay dan sistenm *welfare*, revwar bann mezir ki'n enplimante menm revwar osi ki mannyer pou ariv pli pre ek sa enn ki dan bezwen. Mon osi soulaze pou war kantite zenn dan mon distrik ki'n rann lapel kot Biro *Employment* pou en dyob.

E la mon pou dir mon santi osi ki travay i merit osi kontinyen sirtou ek sa bann *vacancy*, kot nou war souvan ganny pibliye ki bokou dimoun i war en fason sirtou parfwa pou serten pozisyon. Ou a krwar ki sa i zis en prosedir.

Ki mon pe sizere si i annan okenn *vacancy* la deor ki dan prosedir *GOP* ler zot fer zot avertisman, kantmenm dan *bracket* zot bezwen mete, zis pou dimoun pa gaspiy zot letan nou desann pou al *apply*, apre sa zot pa ganny en larepons.

E la osi mon pe demann ki kot Minister Lanplwa i annan en *monitoring* ki ganny fer sirtou lo bann *vacancies* ki ganny anrezistre kot zot.

Revwar nou bann *curriculum* dan lekol ozordi avek plizyer lannen, i en lot legzersis

ki mon ti a voudre vwar Minister Ledikasyon pe al lo la.

La regard en pe demann lanplwa dan pei. Plis nou zenn a ganny ansennyen byen boner lo kwa ki annan deor, sa dan li menm i a ganny plis mendev lokal, kot nou deviz etranzer i reste isi menm dan nou pei.

Mon en dimoun ki siport 100poursan lokalizasyon nou bann *post* ki etranze i okipe, e la mon pou demann en pe plis disiplin osi parmi nou pep. Sa biznes menn ouswa landrwa travay la deor i ganny plis konfyans dan nou.

E la mon pou osi anvoy en mesaz pou bann biznesmenn, sirtou bann ki pe fer sitan byen ouswa ki'n kontinyen fer byen depi dan lepase, pou osi revwar kondisyon tou bann travayer ki pe fer zot biznes kontinyen debout, pou osi ede dan sa demars pou fer pri lavi desann.

Parey mon dir pli boner sa i en travay pa zis L'Egzekitiv Mr Speaker. Lapey en travayer ozordi i pli enportan ki yer. Lapey R6mil, R8mil ozordi dan sa lemonn lager *Ukraine* ki nou ladan Mr Speaker, i reste en *question mark*. Sirtou la mon pe mazin mon bann frer ek ser ki dan sekter prive, ki la mazorite ka zot bann group ki pe don tou e menm ek disiplin.

Dan demars osi pou viv en lavi soutenab, nou osi dan en moman kot nou bezwen regard pli byen nou bann priyorite ki yer. Nou osi bezwen aksepté toulezour lavi en fason i sanze dan sa monn ki nou pe viv.

Nou pa zanmen konnen ki demen in anmase pou nou. Ozordi nou'n ganny *COVID-19* la demen nou pe tann bann nouvo maladi ki pe atak sa monn, Sesel nou vilnerab dan tousala. Le senp rezon ki nou bezwen sot kannal pou *assess* tou sa ki nou bezwen. Mon pou admet wi ki pou Sesel lager ek pti lavi en *challenge* ki nou tou nou pou bezwen lager avek.

Ozordi nou annan en *rate* Dolar ki'n desann konpare avek sa nouvo Gouvernman ti pran, me en lot kote nou pe vwar ki *fuel* pe kontinyen balanse lo laponp, ankor i bann keksoz ki nou Sesel nou napa kontrol lo la.

E la mon a demann *SEYPEC* ansanm ek Gouvernman, pou asiz en kou lo latab dan menm fason ki zot pe revwar tou bann keksoz esansyel pou konbat ek pti lavi, sa enn osi mon mazine bann eksper ti kapab vin ek en nide lo la.

Lo kote *PUC*, mon soulaze ler mon tande ki i annan preski 500 *rebate* lo bil. Me mon

dekouraze ler mon aprann ki i annan zis 300 dimoun ki'n *apply*. La mon lans en lapel ek mon bann zabitan osi dan mon distrik, ki santi i bezwen sa lasistans pou pa rat sa sans.

An terminan mon ti a fer Onorab William koman Manm Elekte pou Grand Anse, konpran ki nou dan Plaisance definitivman ler i konsern bann size parey, nou pou donn li nou 100poursan sipor. Mersi Mr Speaker.

MR SPEAKER

Mersi Onorab. Mon a donn laparol Onorab Lemiel.

HON SYLVANNE LEMIEL

Mersi Mr Speaker. Bonzour tou dimoun ki a lekout. Mr Speaker ozordi dan Sesel bokou nou frer ek ser Seselwa pe rankontre bokou difikilte, e pou zot kapab fer 2 bout zwenn. Bokou zonm e fanm ki pe travay e ki pe resevwar en saler *minimum*, zot pe vwar li difisil pou viv. Dan mazorite ka se menm group dimoun ki annan detrwa zanfan pou zot sonnyen.

Ozordi i annan bokou zot ki pe seye. I annan ki pe fer 2 travay pou asire ki zot kapab fer 2 bout zwenn. Par kont Mr Speaker nou war ozordi ki i annan seren dimoun ki pe travay koman *carer*, lizour zot

fer zot louvraz *carer* e aswar zot sey al fer en lot travay. Par egzantp i annan ki al fer sekirite, i annan ki al kot *IOT*.

Me malerezman ozordi dan sanzman ki'n anmennen dan kondisyon travay bann *carers* par Lazans Proteksyon Sosyal, sa group dimoun napa drwa al fer lot travay pour ki zot kapab amelyor reveni ki antre kot zot lakour.

I osi annan bann ki fer en pti biznes par kote, me tousala in ganny enterdi fer aköz dapre Lazans Proteksyon Sosyal, sa bann biznes par kote ki serten sa bann dimoun i fer, i anpes zot fer byen zot travay koman *carers*.

Mr Speaker la realite ozordi ler nou regarde kou lavi li menm i pa zanmen desann, me in pran en lesel e i pe monte menm. Pri manze, servis e litilite tousala in monte e pe kontinyen monte, me saler li i reste touzour parey.

Nou'n antann Prezidan e osi Minis Finans in anonse ki pou annan logmantasyon par faz. Premye pou bann dimoun ki pe ganny anba 8000, e sa pou enkli Sekirite Sosyal, bann pansyoner e lasistans pou bann envalidite.

Koman en dimoun ki reste konekte avek mon bann zabitan, e osi dimoun i dan

sekteer biznes mon konnen ki zot pe pas ladan.

Mr Speaker i annan bokou dimoun ki koman zot ganny zot saler i fini, akoz zot in bezwen al pran manze kredi diran le mwan, e ler ou regarde kredi i ganny azoute lo kredi. I annan bokou soufrans la deor e zot Prezidan in avoue osi ki i annan la mizer e soufrans la deor.

I annan bann ka reel kot i annan dimoun ki pa pe kapab ganny zis en repa par zour ladan menm Mr Speaker i annan bokou marsan ki pe profit lo sityasyon i nek ou war pri marsandiz lo letazer i kontinyen monte.

Ou pas dan diferan magazen sakenn i fer son pri e sa i enkli *STC*. I annan serten komodite ki pli bon marse dan serten magazen ki kot *STC* li menm. Mon lapel ozordi pou tou dimoun se pou mars an de, e regarde kote ki zot kapab ganny pri ki en pe pli meyer.

Gouvernman i devret ankouraz aste an gro savedir *wholesale*. Olye dekouraz en tel linisyativ e dir ki zot pou revwar sa zafer kot endividi i aste an gro e zot pe oule ki *wholesale* i vin zis pou an gro biznes. Les Seselwa ki trimouse sey rod en fason viv. Les zot rode kote ki zot pou pli benefisyè.

Depi ki *COVID* in frap Sesel e ki pri lavi in monte, mazorite dimoun pa pe kapab fer en *savings*. Larzan koman zot gannyen i zis pou pey elektrisite, delo, manze, sa ki al dan *rent*, sa ki al dan *loan* e lezot keksoz esansyel ankor. Bokou biznes osi pe faid menn si zot pe seye.

I tre enportan ki Gouvernman i rod fason konkret, fason pou ed bann ki pli dan bezwen. Gete ki mannyer zot pou re aranz oubyen amelyor sa zafer donn manze e goute zanfan lekol. Pou kapab osi soulaz bann paran ki pli napa, e pe kontinyen seye. Napa okenn zanfan ki devret pa pe kapab al lekol, akoz zot napa goute, dezennen, liniform, sak lekol oubyen lezot keksoz lekol.

Gouvernman fodre vin ek gran e pran mezir pou kapab asiste nou zanfan ki dan bezwen. E menm lekol i devret revwar lafason ki zot pe zer sa *Dedicated Fund*, pour ki plis zanfan ki dan bezwen i kapab ganny asiste.

Mon lans ankor en lapel avek tou paran ki santi zot bezwen led pou silvouple al kot zot bann *headteachers* e al rod lasistans anba sa *Dedicated Fund* pou zot zanfan.

Kot i konsern Lazans Proteksyon Sosyal, zot osi fodre

zot kontinyen revwar lafason ki zot pe antreprann laplikasyon lasistans *welfare*, bann dimoun dan distrik. Mon pa santi kot Gouvernman pe sezi vre lanpler sa problem. I annan ankor bokou dimoun ki pe al devan e pa pe kapab ganny en lasistans, sa bann dimoun zot pe travay me zot pa pe kapab fer 2 bout zwenn.

Alors ASP sey balanse e re assess la fason ki zot pe donn lasistans. Revwar la kantite letan ki zot osi pe pran pou asiste en dimoun ki dan bezwen. Akoz ziska ozordi i ankor pe pran tro bokou letan pou assess ka en endividi e larepons pou en wi oubyen en non i pe pran plis ki enn a 2 mwan.

Mon ti a kontan osi tous lo *allowance* bann etidyan. Letan ki Gouvernman pe koz lo revwar bann saler, e osi lezot lasistans ki zot donner silvouple regard osi sa *allowance* oubyen *bursary* ki zot pe donn tou etidyan pos- segonder, akoz zot osi zot pe kriy lasasen. Etidyan *SITE* sa ki nou ti dir *NIE* i dir ou ki ler zot al fer *practical* zot bezwen aste papye e lezot keksoz pou servi ek etidyan dan lakaz. Lo sa pti *allowance*.

Alors pran kont tousala e annou vwar ki fason nou kapab aranz en pti pe osi sa *allowance*

ki bann etidyan pos- segonder i gannyen. Mon oule asir mon ban zabitan ki ankor lo en saler mwayenn, bann *carers*, bann pansyoner, dimoun ki pe viv avek en dezabilite e bann ki pe ganny lezot kalite Lasistans Sosyal, ki mon pou touzour koz lo zot sor e kontinyen met presyon ki sa Gouvernman o pouvwar ozordi i vitman travay e anmenn solisyon lo sa size kou lavi. E osi rod tou fason posib pou zot anmenn en amelyorasyon dan saler tou dimoun, espesyalman sa ki pe ganny pli ba akoz mon oule ...

Set avek sa Mr Speaker ki mon ti a kontan remersye ou e mon ti a kontan dir loter Mosyon osi letan i pe fer son *wrapping-up* pou vreman konsider en pe bann pwen ki'n sorti lo nou kote latab, akoz nou senserman krwar nou osi dan lo sa kote amelyorasyon lo kote kou lavi, lo kote sa size amelyor saler.

Menm parey mon'n dir rekonsidere osi *allowances* ki nou donn bann lezot dimoun akoz Mr Speaker fransman la deor bann pansyoner zot osi zot pe vreman kriy lasasen e menm i annan serten dimoun sirtou pansyoner menm, ki ti pe dir nou be dan sa Lasanble zot toultan pe koz lo saler lezot dimoun, kan pou koz en kou lo

nou pansyon nou osi akòz nou vwar ki i ba?

So alors nou ti a vreman sa Gouvernman osi, letan pe konsider fir e anmezir pou zot vwar saler, vwar bann lezot lasistans ki donnen. Annou vwar tou keksoz dan lansanm e ki firanmezir tou dimoun i ava progres ansanm e ki tou dimoun i ava pe viv en lavi en pri pe pli meyer. Mersi Mr Speaker.

MR SPEAKER

Mersi Onorab. Laparol aprezan i pou Onorab Naidu.

HON SATHYA NAIDU

Bonzour Mr Speaker. Bonzour tou koleg Onorab e tou dimoun ki a lekout espesyalman zabitan St Louis.

Mosyon anmennen par Onorab Waven William mon panse sa diskisyon ki nou pe tenir ozordi ti kapab ganny fer yer menm, mon pa'n vreman konpran rezondet par deryer sa lamannman e ti napa okenn propozisyon ki ti'n vreman ganny soumet dan bann deliberasyon ter, i sagrinan ki nou'n gaspir letan.

E lo size pri lavi i enportan *we do not gaslight the subject*, dan ki sans ki nou pa zwe avek lemosyon nou pep, nou pa zwe avek soufrans nou pep e nou dir

sityasyon partou i ete. Lafason ki zot a pe dir vizavi nou lekonomi mannyer pe performen, zot pe kre en lenpresyon konmkwa tou lezot pei atraver lemonn pa pe fer fas avek en pri lavi.

Pri lavi i non selman pe preokip nou Gouvernman, me Gouvernman an tou bann Gouvernman atraver lemonn pe sey rod en mwayen pou sey soulaz son pep. E gras a Oktob 2020, nou'n kapab ganny en Gouvernman ki'n responsab pou pran bann desizyon ki pa'n fasil ditou, me selman dan lentere nou pep.

Retonbe sa bann desizyon ki'n ganny pran, nou pou war dan le fitir ki malgre ki dan sa moman i kapab aparet enn ki pa neserman favorab ouswa popilis, me selman son retonbe nou pou vwar li pli tar ler i annan bann ramifikasyon ki pozitiv.

E nou bezwen osi realize premye Bidze ler nou ti'n pase atraver setyenm Lasanble Nasyonal bann *rent* ti pe ganny koupe, *allowance* pou bann *Board* osi parey, nou ti pe sey koup tou depans ki Gouvernman ti pe sey fer, pou asire ki nou kapab bouz ver en Bidze ki pli soutenab.

E lo kote *STC* ler mon pe regard *STC*, *you have to give*

them credit where it's due, zot in zwenn en rol enfliyansyel pou *anchor the prices*. E dan sa demars ki zot, zot in angaz ladan ki Gouvernman presedan pa'n kapab fer, *RRP* in annan son lefe pozitiv e la nou pe vwar lo kote La Digue avek Praslin i annan serten konsern ki'n leve.

E kekfwa la i en moman pou nou kapab vreman fer en refleksyon lo *RRP*, pou demande, eski i annan okenn konsekans legal ki antase avek *RRP*? Akoz lafason ki i ete se zis en rekomandasyon ou pa pou kapab enpoz sa pri lo sa komodite ou ekspekte ki sa marsan pou obeir.

Kekfwa la i en moman prenon kont sityasyon ekonomik ki nou pei i ladan, ki lemonn i ladan, kekfwa nou kapab entrodwir en Lezislasyon avek en konsekans ki kout enn ki ou kapab pas en Lalwa tel ki pou *for example Essential Commodities Act or Essentials Goods Act* ou met en 20tenn komodite e ou met en *ceiling* poudir *MRP*.

E dan ka Moris mon konnen i al ziska 30poursan. E nou kapab etablir bann *framework* nesaser, pou asire ki bann marsan i obeir. E i annan marsan ki'n korpore, i annan marsan ki ede dan zot kominote

e nou pa devret pe fer konmkwa ki tou marsan i parey.

Annefe Onorab ti dir pa Seselwa ki kontrol sa sekter be mon demande ki Gouvernman ki'n la pou 43an ki'n donn *passport*, ki'n fer serten sa bann endividi vin Seselwa, finalman ozordi zot Seselwa. Se koumsa ki ou bezwen regard zot, e i annan serten ki'n ne ki'n agrandi isi e ki pe kontribye koman bann sitwayen responsab.

Alors laprosenn fwa si ou pe sey zwe ek nasyonalitye, ou ... ras en group dimoun, mon krwar pa byen ditou. E ler nou pou war sa *Hate Crime Bill* ki pou pase pli tar dan Lasanble, mon krwar ou pou realize ki ou menm ou pou koz lo *hate crime* e ou pou dir serten keksoz i pa akseptab. So annou realize ki serten keksoz ler nou dir dan Lasanble, nou bezwen fer sir ki nou responsab.

Lo size *STC* kart, wi ti anba *ASP* e a sa letan nou'n remarke ki i annan toudsort kalite frod. I annan bann dimoun ki pe ganny bann saler ki ekstrememan rezonnab, me selman zot pe ganny kart *STC*. In annan plizyer lezot labi ki'n annan ki kler dan *Internal Audit Report* pou *ASP*, ki montre kantite labi ki'n annan!

E byensir koman en Gouvernman ki responsab nou bezwen aplik bann mezir kot *we tighten the purse strings*, akoz sityasyon ekonomik lafason ki i ete, nou bezwen ankouraz nou pep pou antre dan travay ler i annan travay. Nou bezwen kapab tir lezot parey nou'n fer avek *URS*.

E finalman nou'n kapab larg zot lanmen dan en serten sans, me sityasyon ekonomik la fason ki in devlope, lafason ki nou bann mezir pou fer sir ki larzan *ASP* i ganny byen itilize, in kre en sityasyon kot pou le moman nou annan en 100tenn dimoun ki pe resevwar sa benefis.

E la menm atraver sa lanons ki ti'n ganny fer, kot i annan en poursantaz *increment* par 32poursan *in terms of social welfare assistance*, sa ki *CEO* ti'n fer resorti e mon vreman apresye se ki zot in dir ki zot bezwen revwar sa bann mezir lo en baz kontinyel, e Minis osi in fer resorti poudir ki lo kote prosedir zot a pe regard ladan e zot war pa tou kategori dimoun ki ou bezwen aplik menn prosedir. I pou varye.

E alors lo sa kote mon konnen ki i pou annan kek amelyorasyon e sa ki mon pe propoze, in deza ganny propoze atraver en kestyon par Onorab

Waven William li menm, se pou donn en *one-off*. En *one-off* ler mon pe regard lezot pei atraver lemonn zot pe entrodwir en *one-off* pou kapab permet sa dimoun flote, e pou kapab fer 2 bout zwenn.

E mon krwar lo kote *ASP* fodre ki zot donn konsiderasyon neserer vizavi sa. Lo kote *carers* pwen ki Onorab Lemiel ti'n fer, mon totalman dakor avek - mon pa war okenn rezon ki ler en *carer* in kapab delivre son servis dan en fason ki efikas, e apre al fer en lot dyob mon pa war li ki mannyer i kapab vin en problem.

Ozordi kot sityasyon kot nou'n arive, si en dimoun i ganny en lot mwayen pou kapab al travay pou leve debourye, nou devret kapab permet sa arive. Me selman en diskresyon osi i bezwen ganny donner lo sirkonstans ki sa dimoun ki pe resevwar sa swen i ladan.

So alors i bezwen annan kek fleksibilite plito, olye annan en polisi ki rezet ki dir non ou pa pou kapab fer en lot dyob. E lo size *internet* nou'n koz lo la a plizyer repriz. Dimoun i ankor konplent poudir pri *internet* i vreman o. Me selman nou'n war ki wi in annan bann *packages* ki'n antre ki paret tre konpetitiv, me selman

konpetitiv pou bann ki annan, pou bann ki napa i pa neserman le ka.

Me selman sa ki ti enteresan dan konferans de pres ki mon krwar ki lo kote Lopoziyon zot osi si zot in vremen ekout s aki Lopoziyon in dir, ouswa zis zot in ekoute, me pa neserman resevwar sa dan en serten sans.

Ler in mansyonn satelit, mon'n poz serten kestyon e mon pe demande eski i pe fer referans avek *star link*? *Star link* se en proze par *SpaceX*. E Onorab Loze pe anvoy sa serten komanter mon konnen i en gran koneser dan sa domenn, so kekfwa ler i pou koze i pou kapab donn nou en pe lenformasyon lo la.

Me selman *Starlink* i kapab kre en lanvironnman kot dimoun i kapab ganny akse avek *internet* lo en pri pli abordab. E sa i osi pou fors bann *ISPs* pou sanz zot stratezi e fer sir ki pri *internet* i vin pli abordab. So si Gouvernman i kapab eksplwat sa loportinite, mon krwar nou devret get ladan. Deza en karantenn pei in fini ganny anrezistre.

E pri konstrikasyon byensir avek sityasyon ekonomik ki nou ladan i o. E menm mwan mon ti'n poz en kestyon avek Minis Rangasamy semenn pase, kot

mon'n demande si *HFC* i kapab revwar son *loan*, pou fer li vin en pe pli fleksib;- enn, e osi vizavi pou konstrikasyon. Be mon swe se ki zot pou kapab get ladan.

E i enportan osi pou bann fanmir vin ansanm, solider, si ou annan sa mwayen vizavi ou *income* ou kapab ganny akse avek sa *loan*. Vin ansanm avek ou frer ou osi ou a ganny akse e koumsa ou kapab 2 dimoun i kapab ganny en *loan* pou apepre 2milyon ouswa 2.5milyon e zot kapab konstrir. So fodre ki i annan sa lespri osi dan nou bann fanmir ler zot a pe pran serten desizyon.

E lo kote pou bann zenn, annefe mon annan apepre 2 zanmi ki'n fer vini bann *container homes* e mon konnen kot *HFC* zot annan en *loan* pou apepre 500mil. E konmela lafason ki teknolozi menm lafason ki konstrikasyon in evolye in menm annan sekter prive ki pe fer vini, ki fabrike, ki pe met an plas bann *container homes*.

Kekfwa la i kapab vin en moman pou bann zenn ki napa zanfan, ki selman i oule kek lendepandans ki pe fer en *extension* o bor son paran, olye *go with the old way of doing things*, kekfwa la ou kapab ganny en mwayen pli abordab.

E pou le fitir ou kapab planifye ou kot ou kapab fer lezot konstriksyon pou zwenn ou mwayen. So kekfwa la i en *policy decision* nou pou regarde *if it is possible*.

Lo size *rent* i en gran konponan dan depans ki en bon pe nou, nou fer. E mon rapel dan letan *COVID* kot lekonomi ti'n fermen bann *expat* ti bezwen retourn se zot, pri *rent* ti'n komans desann. Bann lakaz 3 lasanm ou ti kapab menm ganny dan 12 a mwens ki 9mil en lepok. Me selman la lekonomi ou'n war li i en pe stab dan en serten sans, akoz nou annan en Gouvernman ki responsab.

Me selman lo sa kote ou war ki *rent* i vreman o, e dimoun i trouv li difisil. E annefe an 2018 *residential tax* ti'n ganny redwir sorti 15poursan pou vin 3poursan, e bi - wi ti annan en bon lentansyon ler Prezidan Faure ti pe anons sa. Me selman sa benefis pa ti pe pas avek konsonmater.

So mon pa konnen si pou annan kek potansyel pou etabli kek *ceiling*, ki kalite mekanizm ki nou, nou kapab travay lo la lo en baz tanporer, kot nou kapab si fodre - mon pa konnen si i pou annan sa potansyel pou fer li *under control of Rent and Tenancy*

Agreement Act, pou kapab asire ki nou kapab fer sa marse pou vin en pe pli stab lo kote pri.

E konmela ou konnen ler ou a pe touzour lwe en lakaz, senpleman akoz ou konn e dimoun zot donn ou en rediksyon, pa 4 a 5mil. Me selman ou bezwen annan sa menm lespri ler ou pe resevwar nenport ki.

E pli boner mon ti'n tous lo *STC*. Mwan mon ti apresye si *STC* i kapab fer son demars pou ouver e farmasi. Farmasi mwan mon'n etidye aletranze e parey *Sri Lanka* menm e mon war pri medikaman a sa letan. E ozordi parey Sesel ler mon fer sa konparezon mon war ki i annan gran poursantaz profi, pa 15, pa 10, pa 20, 200poursan profi.

Alors si *STC* i kapab adres sa konponan an term depans ki dimoun i fer vizavi zot tretman, ouswa pou ganny akse avek medikaman, *why not do it?* E mon krwar sa pep i ava apresye sa benefis ki zot pou resevwar.

Lo size saler li menm, pou en bon pe lannen saler pa'n vreman monte parey i ti'n devret kapab, prenon kont sityasyon ekonomik ti'n vreman kapab permet Gouvernman presedan, pou pran bann mezir pou vreman soulaz nou bann dimoun. E ozordi se zot ki pe koz lo soulaz nou dimoun dan

tou sord kalite form, me selman atraver bann pratik koronpi, atraver tou sord kalite manboulouk ki zot in fer pou met nou pei an aryer, ozordi se zot ki pou vin donn nou en lektir lo pri lavi.

Me selman mon konsyan poudir ki sa saler *minimum* i bezwen annan en revizyon. Mon krwar i bezwen annan en letid ki devret ganny fer pou kapab etabli *what should be the minimum, wage*. Annefe sa menm *Chairman SCCI* sa letan ti Mr Bastienne ti'n fer resorti ki avek *International Labour Organization* pou zot kapab fer lesansyel.

So mon krwar i bezwen annan en letid. Sa ki sa letid i kapab prouve pa neseserman ki Gouvernman dan sa sityasyon ekonomik i kapab etabli o pli vit posibil, me selman pou le fitir nou konnen ki direksyon nou devret pe ale.

MR SPEAKER

15 minit Onorab.

HON SATHYA NAIDU

Wi, Mr Speaker. Lo kote konsesyon nou konnen ki peser i ganny konsesyon, fermye i ganny konsesyon, menm konsesyon lo *GOP*. Nou'n war marsan osi atraver *RRP* pe ganny kek benefis osi. Me

selman sa benefis pa pe neseserman ganny pase ek konsonmater.

Alors mon pe zis fer resorti avek tou sa bann dimoun dan sa diferan sekter, pou annan plis konpasyon dan sa moman dir ki nou ladan pou *être* pli rezonnab. E pou osi konsyan pou dir ki nou tou nou ladan ansanm. E pou nou sorti nou devret sorti ansanm, kot personn pa pe ganny kit an aryer e zot osi zot annan en rol enportan pou zwe.

E mon krwar lo kote ledikasyon finansyel dan bann lekol i en keksoz ki devret ganny fer, pou asire ki malgre ou pa pe ganny en gran saler, ou konnen ki ou kapab fer ou depans dapre ou mwayen. Kot ou kapab fer en *savings*, kot ou kapab investir dan ou lekor atraver bann polisi lasirans par egzantp. Kot ou kapab pran bann desizyon ki byen kalkile. E dan sa moman ki nou ladan i enportan ki nou pare pou osi fer sakrifis.

Zot pou bezwen fer sakrifis, *there's no other way around it. This is how the situation is*. E ou pa pou kapab fer diverti kontan! Ler ou pe regard konsonmasyon lalkol an zeneral dan Sesel, nou pe sorti *on the top three top 2* - i pa en keksoz ki nou devret pran

lafyerte ladan! E nou bezwen kapab balans en pe lafason ki nou, nou viv.

Mon pa pe dir ki nou pa devret pe viv me selman i annan kek limitasyon osi ki zot bezwen kapab enpoz lo zot, akoz sa sityasyon ki nou ladan se pa zis Sesel ki ladan, lemonn antye i ladan. E partou kote osi pe fer sakrifis.

MR SPEAKER

Konklizyon Onorab *please*.

HON SATHYA NAIDU

Se sa bann propozisyon ki mwan mon annan Mr Speaker. E mon swete ki larestan Manm ki pou koze i pou kapab vreman ed nou ver sa demars pou adres pri lavi dan en fason ki realistik. Mersi Mr Speaker.

MR SPEAKER

Mersi Onorab. Mon a donn laparol Onorab Vidot.

HON AUDREY VIDOT

Mersi Mr Speaker. Bonzour tou Manm Onorab. Bonzour tou dimoun i a lekout en bonzour spesyal pou zabitan Roche Caiman. Mr Speaker Prezidan in dir en parol. E son Minis i dir en lot. Ki kontradiksyon avek kanmarad lo size logmantasyon saler.

Yer Minis dan *Question Time* in dir nou espere. Loter Mosyon in *remind* nou dan Lopoziyon ki keksoz i ganny fer firanmezir. Selman logmantasyon dan *allowance* Minis pa ti vini firanmezir. Ler loter Mosyon i koz lo mezir anonse par son Gouvernman i pa koz lo logmantasyon ki son Gouvernman in enplimante pou Seselwa tir plis larzan dan son pos. Be pa'n vin firanmezir sa bann logmantasyon o kontrè in vin koman en priyorite Gouvernman.

Yer Minis i dir nou transpir ansanm pou nou benefisye ansanm. Be Minis ler ou avek ou bann koleg ti ganny logmantasyon *allowance* zot pa ti dir ansanm - transpir ansanm avek Seselwa ki zot, zot *allowance* ti ganny koupe akoz leskiz napa larzan e zet tou travay lo *COVID*.

E mon koleg lo lot kote latab atraver ou Mr Speaker Onorab Naidu, i pa ti dir son Minis sa bann keksoz ler i koz lo rezon akoz bann *allowance* in ganny koupe dan servis piblik.

Mr Speaker a sak fwa ki nou dan Lopoziyon nou koz lo goute dan lekol, *LDS* lo lot kote latab i riye, e i pas tou sort komanter lo sa size. Seselwa ou'n tande ki bann lezot group

saritab pe antre pe donn goute tou dimoun i reste silans.

A sak fwa ki nou dan Lopoziyon nou koz pou sa Seselwa ki manz en lasyet manze par zour, *LDS* lo lot kote latab i riye e rod tou fason pou maltret nou dan Lopoziyon.

Ler zanfand dan lekol pa ganny en lasyet manze akoz paran pa ankor peye, ki zot in fer yer ankor, zot riye parey labitid konmsi nou ankor lo sa kote latab nou envant keksoz. Be kontinyen! Kontinyen avek sa kalite latitud sa paran la deor ki pe pas dan sa bann sityasyon zot konnen kwa ki nou dan Lopoziyon nou pe koz lo la.

Mr Speaker sa lannen ki bann *MNA LDS* ti bat lanmen, sa lanmen ki zot ti bate avek zot Minis ler ti pe reponn bann keston ki nou lo sa kote latab dan *United Seychelles* ti pe met devan, mon swete i pa refoul avek li, ler i pou vin prezant Bidze 2023, kot i pou bezwen dir avek pep Seselwa kote lafous in mir pou ganny larzan pou ouver tiyo, parey zot lot kote latab ti dir nou tiyo pou ouver 2023.

E kote Prezidan i ganny dimyel pou pas o bor labous Seselwa, akoz sak fwa ler nou dan Lopoziyon nou dir get dan *welfare* Seselwa, *MNA LDS* i demande kote zot pou gannyen

si nou Gouvernman i krwar pou bezwen met *tax* dan biznes. E tou sord kalite leskiz zot in dir nou.

Mr Speaker pep Seselwa ki'n met konfyans dan *LDS*, avek lespwar en pli meyer demen in vin viktim Gouvernman dizour. Viktim sakouy pye met larzan dan pos Seselwa. I annan pansyoner ki'n menm fini kit nou avek bokou regre.

Zis apre konferans lapres, mwan mon'n resevwar kout telefonn sorti kot enn de mon bann pansyoner i annan i dir mwan Onorab ou a dir mwan sa R10mil finalman pansyon i ava vini?

Nou bann zenn fanm ek zonn ek pansyoner, ki'n vot pou en meyer demen mon pe ganny demande pou fer sakrifis e konn zot priyorite. An retour deryer rido Prezidan ek son bann Minis i fer *retreat*, koman en leskiz pou zot koz lo problem ek difikilte Seselwa. Selman pos seselwa i kontinyelman reste vid e zot sityasyon pa pe amelyore.

Alors ler Prezidan i dir avek ki nou, nou bann dimoun ki zot pa kontan ler li i koz lo *retreat*, Seselwa in annan rezon pa kontan, akoz ler li i pe bwar diven i pe manz *caviar*, ler li i pe asize i pe pran sa bon repa, son

kanmarad i ankor pe trimouse pou sey fer son zanfan kapab ganny en pti keksoz.

Ler i pe fer 2 louvraz oubyen *overtime* zis pou li kapab siport son fanmir zot, zot pe fer *retreat*, akoz li i pa ankor konnen ki savedir e letan pou li fer *retreat* li Mr Prezidan.

Mr Speaker partou kot ou pase Seselwa pe dir sa Gouvernman i fer zot likou vin red, zot ankor pe ale vini dan biro Gouvernman, en let ki pou al kot lofis Prezidan i ganny rekonnèt apre en mwan e i ganny dir ankor dan 14zour.

Mon demann mon lekor oli dan bann lefikasite ki mon bann ser koleg atraver ou Mr Speaker Onorab Henrie, ti kontan dir ki son Gouvernman pou vin pli efikas.

Dan Lasanble serten Minis ek *CEO*, i dir ki zot donn repons dan en dele letan rezonnab, kan proze ki ti abitye pran 2 semenn i pran 3 e menm 1 mwan. Pa mwan Audrey Vidot ki pe dir se dimoun la dan zot bann distrik.

Si sa kliyan pa sorti dan son travay pou li al kot zot, zanmen zot pou telefonn li pou dir li ki swa i annan en problem ek son dokiman, ouswa i mank li serten dokiman.

Mr Speaker zabitan Roche Caiman pe fer fas avek bokou difikilte ozordi, parey lezot distrik. Laplipar lakour ki mon'n pase zabitan pe konplent ki swa *PUC* akoz zot bil i egzorbitan, ki swa zot bil i ankor pe ganny estimen, annan i menm dir ou a krwar mon pe pey en bil konmsi kot mwan ki fer biznes.

Sa ki ankor pe esper *meter* delo ganny sanze, zabitan ki anvi repar son lakaz pa pe kapab ozordi, akoz in pran en *loan* e si i pa veye ki mannyer i aziste, ni lafen di mwan sa pti manze ki in aste pa pou arive.

Mr Speaker mon pou termin mon lentervansyon lo en pti not, Seselwa i dan problem la deor, mon ti dir yer sa ki annan pou touzour annan sa ki napa i napa. Atraver ou Mr Speaker mon oule dir avek mon koleg Onorab William, ki nou lo sa kote latab nou napa naryen rann kont anver ou akoz nou kontan ou parey en frer, pe enport ou diferan lopinyon politik ozordi.

Me nou pou montre ou ki atraver ou Mosyon, nou pa pou lev nou lanmen pou nou vot kont, akoz parey mon bann koleg lo sa kote latab in fer resorti i annan merit dan ou Mosyon. E se pour sa rezon ki yer nou pa ti gaspiy letan

Lasanble nou. O kontrè nou ti pe sey montre ou poudir ki manner nou anvi met plis presyon pou asire ki ou distrik enkli pou nou osi, Gouvernman i pran nou serye.

Me Seselwa la deor i anvi war Gouvernman *LDS* pratik sa ki ti prese Oktob 2020; regard dan *welfare* nou bann zanfan Sesel e aret dir nou zot soufer *off-mic* ler nou koz avek pep Seselwa.

Onorab zot ki dan Gouvernman ozordi pa nou! Zot ki an mazorite ozordi pa nou! Aret rod leskiz 43an. Aret rod leskiz si nou ki ti la - la zot ki dan zwe, fer sa travay ki zot in ganny donner pou fer, aret zis anonse, anonse, anonse me aksyon i reste zero!

Seselwa pa bliye pour ki i ti vote li e Seselwa pa pou bliye lekel ki ti pas kot li e ankor pe pas kot li avan e apre Oktob 2020. Mersi Mr Speaker.

MR SPEAKER

Mersi Onorab. Laparol pou Onorab Monthy.

HON PHILIP MONTHY

Mersi Mr Speaker. Bonzour a tous. Mr Speaker resaman nou'n tann bann Manm Onorab lo lot kote latap pe akiz nou konmkwa nou bann Manm ki'n dekonekte avek nou dimoun.

E zot, zot in sey fer zot pas pou bann bon dimoun ki pe konekte avek sa pep. E sa menm si preski zot tou zot pe mars dan bann transpor *fully tinted*, pou zot bann zabitan pa war zot. Kekfwa Mr Speaker sanmenm sa zot fason konekte sa. Vin fer politik bon marse apre kan zot sot deor zot kasyet dan *tint!*

Mr Speaker pandan tou sa lannen ki nou'n lager pou anmenn en sanzman ladan lafason ki sa pei i ganny dirize, pour ki resours pei i ganny distribye avek sa pep an antye olye zis avek en parti group elit, desten in swazir pou met sa Gouvernman o pouvwar dan en bann peryod pli difisil e bouwersan ki lemonn annan tye in deza fer fas avek.

E i enportan pou nou pep mazin sa byen, avan zot les zot ganny anbete par negativite e politik bon marse, e pou zot kan omwen apresye sa ki'n ganny fer pour ki tou travayer i kontinyen anmenn en saler an antye kot lakour lafen di mwan me non pa en bout saler.

Kot malgre bann defi Minister Lasante i ankor pe ofer swen lasante nou pep e kot nou bann zanfan pe kontinyelman ganny akse avek ledikasyon, e kominote biznes in reganny sa letan, malgre i ankor annan defi

dan serten sekter. E kot nou bann zanfan pa pe mor lafen me pe anmenn meday lo zil.

Sitan meday likou Onorab Uranie ti pres pou kase Mr Speaker. An dot mo Mr Speaker Sesel pa'n mal sorti ditou fas a sa kriz mondyal ki *COVID* in plonz lemond ladan. E fodre pa nou bliye ki *COVID* i ankor la li, e ki in annan en lot kriz ki'n vin azour avek sa sityasyon deza difisil.

E ki ler ou analize sa kriz *Ukraine* i pe anmenn en lenpak imans lo enstabilite ekonomik e alimanter mondyalman. Tou dimoun i konnen sa. Me li Onorab Uranie Mr Speaker i oule fer sa pep krwar ki sa i en lenvansyon *LDS* pou nou servi koman leskiz.

Si bann pli gran pei ki annan pli kapasite ekonomik ki Sesel pe ganny afekte, e kot annan in menm plonz dan bann sityasyon katastroofik parey nou vwar pe arive *Sri Lanka*, kot pep napa ni manze ni latizann prezan mazin nou Sesel sa pti pei ki nou ete.

E ki nou bezwen enport mazorite komodite ki nou konsonmen ki si nou pa'n ariv dan sa bann sityasyon parey nou bezwen omwen menm si i annan ki i pa kontan sa Gouvernman, me omwen annan sa kouraz ek lasazes pou

apresye sa travay ki'n ganny fer pour ki Seselwa i kontinyen viv dan dinyite.

Me menn avek sa travay enkrwayab ki sa Gouvernman i fer, nou konnen ki i annan plizyer fanmir ki war li difisil pou fer 2 bout zwenn. E kontrerman ek sa ki bann *MNA* a *New United Seychelles* i oule fer sa pep krwar ki sa Gouvernman e nou koman bann reprezantan Lepep in dekonekte ek sa pep, Mosyon anmennen par pran William ki pe demann Gouvernman pou fer tou son posibil pou vwar bann mwayen o fir amezir ki lekonomi pei i redrese, pou asiste nou bann frer ek ser Seselwa ki pe war zot dan difikilte, avek pri kout lavi ki pe kontinyen monte mondyalman, i montre tou le kontrere.

Sa Mosyon in montre klerman ki nou pa'n dekonekte avek nou dimoun ki n met zot konsyans dan nou, me ki nou o konter konpran difikilte ki zot pe pas ladan. E ki nou senser e dan sa demars ki nou a trouv en solisyon, ki a kapab anmenn en soulazman an sa kous popilasyon ki i pe pli ganny afekte, fas a sa kriz ki pe tap lemon annan tye.

Mosyon i montre ki nou pa la zis pou esey vin *score* detrwa pwen politik, me ki nou vreman

santi soufrans sa pep. Mosyon anmennen par Onorab William in vin lo *Order Paper* zis apre ki Prezidan dan son konferans de pres, pou annan bann mezir ki pou ganny adrese byento pou soulaz sa kous popilasyon ki pli vilnerab.

E sa sanmenm ki pe fer zot lot kote latab sitan fristre Mr Speaker. Akoz zot pa ti krwar ki la a sa moman sa Gouvernman pou kapab vin avek bann tel lanons pou soulaz serten nou pep ki pe pas dan difikilte.

Zot ankoler akoz parey Onorab Georges in fer remarke yer, zot ti kapab pe sant laglwar si omwen zot, zot ti'n annan kouraz pou vin ek en tel Mosyon avan nou lo sa kote latab, olye zis en nespes lamannman lakanmizri. Zot ti pe ekspekte dilo i ganny large zis avan eleksyon parey zot abitye fer avek Seselwa.

Me nou Mr speaker nou pa zot nou, nou annan respe pou sa pep ki apel Seselwa nou. E ler nou pe koz lo sa ki pli vilnerab, nou pa pe dir ki lezot kous nou popilasyon pa pe fer fas ek difikilte, parey Onorab Cosgrow atraver ou Mr Speaker i oule fer nou krwar.

Me parey Minis Finans in fer nou remarke yer dan sa menm Lasanble, nou bezwen depans dapre la kantite reveni

ki nou pe anmase. Mon pa ti for lekol dan matematik mwan tou dimoun, mon bann koleg ki'n lekol ek mwan i konnen, me selman sa i en senp matematik ki nou bezwen konpran ok?

Akoz nou Mr Speaker nou pa krwar dean desizyon popilis pou zis anmas vot. Me nou en Gouvernman ki responsab e ki konsyan kwa ki merit ganny fer la a sa moman, e kwa an plis ki nou pou kapab fer o fir e amezir ki lekonomi pei i amelyore, zis parey Mosyon Onorab William pe demann Gouvernman pou fer.

Bann Manm *MNA* lo lot kote latab pe koz lo saler R6500 par mwan ki pa ase. Mr Speaker wi mon pou dakor i pa ase, e se pour sa rezon ki Gouvernman pe al anons bann mezir byento pou siport sa kous nou popilasyon. Be kekyon ki nou devret pe poze se sa bann saler 6500 lekel ki ti donn sa pep Gouvernman *LDS*?

Si zot Gouvernman ti serye parey zot oule fer nou krwar, zot ti a fer sir ki tou Seselwa ti ganny en saler ki rezonnab e ki ti pou ed nou bann fer ek ser viv dan konfor ek dinyite la dan sa moman difisil. Si ler pei ti pe fer tre byen ekonomikman, kot ti napa okenn kriz zot ti refize donn nou bann dimoun aze en

logmantasyon dan zot benefis retret.

R5mil nou ti demande sa letan ti dir kote pou gannyen? Selman zis avan eleksyon ti war kote pou gannyen. La Onorab Audrey Vidot atraver ou Mr Speaker i vin koz R10mil - R5mil zot pa ti kapab donner ler ti annan larzan la ou vin koz R10mil?

Mr Speaker mwan mon annan sa pou dir ek nou pep la deor, pa les zot ganny anbete avek en group dimoun ki ler zot parti ti dan L'Egzekitiv - setadir kot pouvwar ti dan zot lanmen e larzan ti annan pou ogmant saler, me zot ti swazir pou zot sourd lo sa pep.

La ler zot dan Lopoziyon sa menm saler ki zot Gouvernman in donn sa pep en sel kou zot remarke pa ase! La saler ek *allowance* i ptipti parey Onorab Lemiel in fek dir, be Mr Speaker lontan pri lavi i ser dan sa pei, pa'n ariv yer sa. Wi la in ogmant en pe plis me selman in fer sa pep krwar ki i zot pa ti la tou sa letan. Ki parti *New United Seychelles* fek debarke lo *plannet Uranus*.

Onorab Uranie atraver ou Mr Speaker in koz en kantite yer konmsi son Gouvernman zanmen in o pouvwar. E mwan mon pou dir li sa ozordi, tou sa ki ou Gouvernman in *fail* pou

fer pou sa pep, e in *fail* pou fer pou pep Digwa parey ou apel zot, sa Gouvernman *LDS* ki la ozordi pou fer li.

Mr Speaker mon pa pou long me an terminan mon oule dir sa avek nou bann zabitan la deor, Sesel i sorti lwen e i annan ankou bokou pou fer - sa nou admet. Me nou lo bon semen, e annou aprann apresye sa ki'n ganny fer ziska prezan e annan pasyans e konfyans dan sa *leadership* ki la.

Akoz sa zonm ki pe asize anler *State House* la son lanmen i prop e son leker i senser e ansanm nou pou transform sa pei pou le meyer! Mersi Mr Speaker.

(APPLAUSE)

MR SPEAKER

Mersi Onorab. Mon a donn laparol Onorab Loze.

HON JOHAN LOZE

Mersi Mr Speaker. Bonzour Mr Speaker. Mr Speaker, 'fer fas avek lemonn ki bouverse de tanzantan', i en laliny sorti dan sanson An Triyonf ekrir par Mrs Edoxie Labiche, e sante par Mr Jean-Marc Volcy.

I en sanson e sa laliny sirtou i fer nou gard antet ki pou ariv bann bouverzman lo nivo mondyal detanzaot.

E ki nou, nou pa pe sey fer krwar ki bann bouldersman letan i arive i spesifik pou Sesel - nou konnen nou.

Me Sesel nou ganny frape avek en lenflasyon - en to lenflasyon plis ki 30 pousan.

E nou pe fer fas avek en sityasyon ozordi kot polisi bann nouvo bourzwa in fer an sort ki sa delwil, sa senp delwil ki ou ti pou rousi en satini bwat ton, ouswa en satini pwason sale ki'n noye dan frisiter pou fer desann sa diri aswar, i pe ganny *priced out of reach of* sa malere ki zot dir nou ki'n kit li lo sa saler 6000 mil la.

Sa delwil. (Mr Speaker mwan mon pa pe *disturb* person mwan. Mon ti ava kontan si sa Onorab laba ti ava reste trankil ler mon koze)!

MR SPEAKER

Mersi Onorab. Mon'n apresye ki Lasanble deba in al annord ziska konmela. Mon'n komans tann enn de lavwa leve. Silvouple annou arete rebran.

Breath in, breath out.
Koumsa nou ava reste *calm*.
Onorab Loze kontiny silvouple.

HON JOHAN LOZE

Mr Speaker, ler ou fer delwil - sa senp delwil la kwi manze vin *hors de la portée* sa malere, ki bezwen rousi son bwat ton

parey mon dir zot noye dan frisiter, sa i diskriminatwar!

E zot, zot pa pe santi sa diskriminasyon, akoz zot avek zot bann nouvo bourzwa zot dan menm kategori. Zot dan menm bal. Zot napa problem ek sa zot.

Letan *welfare*, benefis sosyal, lasistans sosyal pe dapre zot - dapre ki mon'n tann zot Prezidan dir, pe met lord.

Zot met zot en kalite dezord. Kot nou ti ganny dir isi annan i annan-

MR SPEAKER

Onorab Loizeau silvouple?
Mersi kontinyen Onorab.

HON JOHAN LOZE

... i annan zis 110 dimoun lo lalis kan an realite ti annan zis 65. Letan sa i arive nou kre bann sityasyon kot sa manman tousel i ganny diskriminen kont.

Sa dimoun ki li i bezwen lasistans sosyal, akoz i annan en maladi kronik e i pa pe kapab travay, i pe ganny diskriminen kont.

Zot pe met an plas, zot bann bourzwa, pe met an plas bann mezir diskriminatwar kont sa pep ki apel Seselwa. E zot, zot *ok* avek sa. Parske, ou konnen akoz mon konnen zot *ok* ek sa, zot in antre la anndan

depi Oktob 2020, e set ozordi ki zot ganny kouraz ouver zot labous pou koz lo sor sa pep. Zot in bezwen ganny permisyon avek kelken pou zot vin koz lo sor sa pep.

Mon pa bezwen met Mosyon mon pou koz lo sor sa pep. Sak fwa mon met *on* sa lalimyer rouz devan mwan, mon al ouver sa bwat koze, mon koz lo sor sa pep. Semenn pase i annan ti pe rouspete akoz letan mon ti pe koz lo *excise tax*, mon ti koz lo redistribisyon ekitab larises sa pep.

Mr Speaker, les mon komans kot zot, zot komanse. *Airport*. Ler zot ti pran pouwar *Airport* ti fermen. Zot tou zot repet sa menm zot dir non. Sa ki zot pa dir nou personn se ki manner *Airport* ti fermen. Mwan mon ti la letan *COVID* ti'n for. Mon rapel en presyon enorm pou *lockdown*.

I annan 2 pti grannwanr ti menm fer en *press conference* kot zot ti elabor zot pwen. Zot 5 *point plan* pou *lock down* pei. E en Gouvernman rezonnab e responsab an plas, wi ti *lockdown*. Ti *lockdown* pei. E zot ti vin zwenn *lock down* ki zot menm zot, zot ti'n *advocate*.

Zot ti'n met presyon, ti'n bour difer pou fer. Sa *lockdown* ki zot ti vin zwenn. Sa *Airport* fermen ki zot in vin zwenn.

Airport ki zot, zot ti met presyon pou fermen.

E i byen ki zot ki'n ouver. I byen ki zot ki'n vin ouver zot *Airport* ki zot, zot ti met presyon pou fermen. E zot tou ozordi zot in bliye sa 2 pti grannwanr ki ti fer en *press conference* pou dir *lock down* non?

Zot tou zot in bliy Onorab Georges dan *STC* laba pe fer *meeting lockdown* avek bann biznesmenn non? Personn pa rapel. I byen. I byen. Annou kit *Airport* fermen ek son *lockdown*. Annou pran sa fame *FA4JR*. Ki zot dir nou, nou'n donn bal, nou'n fer koripsyon, nou'n gaspiy larzan.

Resaman mon ti eksplik zot poudir *SPTC* ti annan en fonksyon. Se pou pran Seselwa kot li anmenn li travay. Pran li travay retourn avek li se li. Fasilit deplasman sa pep ki apel Seselwa pou li al debourye. Soutenir lekonomi, sonny son fanmir a en pri abordab. I pa ti la pou fer biznes. I pa ti la pou ganny *run* parey en biznes li.

FA4JR: *FA4JR* ti la pou soutenir travayer. I ti pey saler travayer. I pa ti antre dan mon pos, ni dan pos Prezidan Faure. Ni dan pos personn ki la lo sa kote latay. Ti al dan pos travayer. Ki ti pe soutenir lekonomi Sesel.

Now granted zot kapab annan en pwen ki i annan labi ki'n arive. I annan en bon pe zot sipoter ki'n donn bal e fer labi zot osi lo la. I annan ki zot in apwent dan bann pozisyon ki mon krwar ti *claim* li en *florist*. Pa vre Onorab Roucou.

Be selman, letan ki nou'n soutenir travayer Seselwa. Nou'n soutenir sa, *huge workforce*, ki'n arive?

Letan *super Minister*, *super Hassan* in vini in ouver lekonomi koman nou *sauveur*, *the workforce was there in place*. Tou travayer ti la an plas *sustain* par *FA4JR*. E se sa rezon ki koman zot in vini. *Super President* ek *super Minister* koman son *psychic*, ouver lekonomi, *it was roaring to go*.

Akoz avan zot ti annan en Gouvernman e en Prezidan responsab. E ki zot in erite zot? Zot in erit en lekonomi ki'n marse. *Unless super Minister* dan 18 mwan in evant en lekonomi.

Be *super Minister* in zwenn en lekonomi ki marse li. Meyer Minis dan lemond in zwenn en lekonomi ki marse. La prezan in mont lo la i pe dormi koman son lili.

Tou sa bann kontribiter e akter ekonomik ti deza la an plas. Ki in mete la an plas li?

Kwa ki *super Minister* in mete la an plas li? Naryen. Tou ti la. Dan sa 2an ki zot in la, pa'n fer naryen. Zot in zwenn tou. Zot pe aziste serten polisi. Zot annan bann nouvo bourzwa ki zot in met an plas. I annan bann galon delo ki zot in apwent en pri pe partou, partou.

Be kwa ki zot in fer ankor? Naryen. Zot in zwenn la. Zot pe mont lo sa lekonomi performan. Zot in fer vin zot lili, zot pe *relax*, zot pe dormi lo la. La zot meyer Minis dan lemond la. Byen. Napa problem.

Mr Speaker, Mosyon ki devan i lir son komansman. 'Swivan bann mezir anonse'. Ki mezir ki'n anonse?

Zot in kre zot en konfizyon total. Dan Bidze Minis i dir enn. Dan *SONA* Prezidan i dir lot. Apre Prezidan i vini i dir en lot. Minis yer i vini i sant en lot zistwar. Napa naryen ki kler dan zot bann swadizan mezir anonse.

Yer letan nou la anndan. Letan ki apre ki mon ti'n koze, letan ki Onorab Vidot pe koz lo sor bann zanfan lekol, bann paran ki anvoy zot zanfan lekol, bann zanfan ki pa pe manze.

Enn zot Manm - e mon pa pou nonmen lekol, ler Onorab Vidot pe koze, i dir koumsa:-

“be pe al donnen pou naryen la, *relax!*”

Mezir anonse. I anons *peacemeal* par bout e an myet. I annan bout ki nou, nou tann la anndan. Be Minis pa ti la yer li! I pa ti kapab eklersi sa, dir nou?

Selman nou Mosyon i baze lo mezir anonse. Nou, nou sipoze debat en vot lo en Mosyon ki lo mezir anonse. Selman mezir pa anonse li. Mezir i ganny soufle dan divan par bann pti zwazo a gos e a dwat.

Mr Speaker, nou pe ganny dir poudir saler e bann lezot mezir i ava vin o fir e a mezir. *Now* eksplik mwan. Minis Hassan ek li, ki bout fir e a mezir ki li in pran kot son *allowance cottonbud, dental floss, linet* ti konsernen?

Ki fir e a mezir ki *Cabinet* Minis in fir e a mezir? Zot in pran pou zot *wholesale* par *container home*. Zot in pran tou pou zot *wholesale* dan *container*. Ki fir e a mezir?

Fir e a mezir la, pou serten, pa pou tou. Fir e a mezir pa pou bann dimoun ki lo *minimum wage* li. Sa *minimum wage* ki zot, zot in dir nou nou'n kit la. Ler nou ti kite la ti napa lenflasyon 33poursan. E ti annan en sistenm *welfare* pou pran ka ek sa bann dimoun.

Sistenm *welfare* ki zot in detri par polisi zot bann nouvo bourzwa. Ki pe martiriz sa pep.

Mr Speaker, e parol ki'n ganny servi souvan yer se a premye lye pou donn bann ki pli vilnerab. Ozordi depi Prezidan ziske zot, zot pe rekonnèt poudir i annan pli vilnerab. Letan zot pe monte desann lo avyon, donn bal an lotel 5 zetwal, ale vini dan retret, napa vilnerab.

Napa vilnerab an premye lye. In toultan zot *Cabinet* ki an premye lye. Ozordi letan zot pe vini pe sey konfiz sa pep avek en grinyot, pe vin dir nou lo sa kote latap pa bezwen *gaslight*. Zot pe vin rod nou. A premye lye bann ki pli vilnerab. E la mon annan en parol pou mon dir sa Onorab *gaslight*.

Li ek son Prezidan, zot *Starlink* la, pa *available* Sesel. I pa *available* Sesel. E *star link* i kout minimum \$110 a \$500 Ameriken par mwan son *package*. So nou pe koz pou ki la? Pou ki la? Lekel sa Seselwa ki ou pe dir li met en *star link* \$110 pou bes son kou lavi? \$110 par mwan pou bes son kou lavi? Avek en kou lenstalasyon \$330 *upfront*. Sa fason ki zot pe *gaslight* sa pep.

Mr Speaker, nou al lo sa fame *STC*. Pri lavi. Yer, avan yer ki nou konpran poudir sa

zafer ferm bann laboutik *STC* ti zis en mannigans ant bann nouvo bourzwa avek bann marsan.

Zot in antre zot dan en bal nanm avek marsan ki zot pa'n zanmen eksplik personn zot. Zot ti dir *rental* i ser. Zot bezwen fermen pou isi laba, pou isi laba. La dan en *press conference* in dir nou la, zot ti pe donn marsan en sans. Zot in antre zot dan en bal nanm ek marsan. Prezan zot menm zot, zot vini zot komans gel marsan.

Mazin byen sa mo kontrol i komans sorti ankor la. Kontrol. Depi *State House* ziske la dan Lasanble zot komans koz kontrol. Be zot realize poudir pa ni menm 30 zour pase letan nou, nou ti pe koz lo zot *RRP* ki pe ogmant pri lavi Seselwa, zot ti dir nou, ar sa zis en *recommended price*.

Zis en *recommended price*, ozordi zot pe rod nou kontrol? Zot ki ti pe fek maltret nou, pe argimant ek nou, pe eksplik nou poudir sa i zis *recommended*.

E nou ti pe sey dir zot poudir sa pe napa lefe dan pos dimoun. Napa lefe reel. Pa pe ed personn. Ozordi zot trouve zot pa pe ed personn. Selman prezan zot blanm marsan. Kan zot ki'n mont lo lili ek marsan. Zot mont lo lili zot avek marsan,

selman blanm i tou pou marsan. Menaz zot in antre ladan zot de. Pou abiz sa pep. Pou abiz sa malere. Selman blanm marsan. Pa zot en! lanmen prop zot parey i fek ganny deklare taler.

Pa'n fer naryen mal. Se sa sityasyon ki nou ladan ozordi. Tou sa ki nou'n dir zot. Tou sa ki nou'n asize, nou sey fer zot konpran. Zot refize konpran. La Digue i annan en magazen pe antre dan en lot mannigans avek *STC*. Pa kapab nonmen. Pa kapab konmen laba *State House*. Ou bezwen zis dir en marsan.

MR SPEAKER

15 minit Onorab.

HON JOHAN LOZE

Pangar nou ava konpran ki pe pase. Mersi Mr Speaker mon ava swiv ou gidans.

Ozordi nou tourn nou dan en sityasyon kot lekonomi pe fer byen. Be ler lekonomi i fer byen, zot lev zot en leokri repar batiman.

Olye fer reparasyon lo sa pep ki'n andomaze par *COVID*. Andomaze par pri lavi, zot pe repar batiman a gos e a drwat. Ozordi nou war zot vini pou eksplik nou modalite *GICC* ki menm keksoz ki i ti eksplik zot

pou *Annex* avek *ex-Supreme Court*.

E zot ti gele zot ti refize konpran. Zot ti boykot ziske ti bezwen *pull back*. Zot in met en ta retar dan sa model.

Prezan ler zot, zot in adopte sa ki zot ti boykot. Zot in adopte parey Onorab Aglae in dir taler, zot vini zot dir nou poudir sa i en *PPP* en *Public Private Partnership*.

Gouvernman, *GICC* ti Gouvernman, avek *Nouvobanq* Gouvernman i antre dan en mazinasyon. E sa i vin *public private*. Be ki bout dan zot *PPP* la ki *private*? Tousala i Gouvernman menm. Be Seselwa evantelman pou konpran li, aköz zot obsesyon avek sa bann ta gro reparasyon gro milyon, E napa ni 5sou pou sa pep.

Evantelman Seselwa pou dekouver zot. Sa priyorite ki zot pe met lo vye *building gate* la, dan plas lo zot Nasyon. Dan plas lo sa zenn, lo sa travayer, lo sa manman tousel la. Seselwa pou konpran aköz sa bann 75 milyon, milyon, lot milyon. Sa pep pou konpran evantelman.

Mr Speaker, zot akiz nou en kantite keksoz. Zot dir nou, nou met realite.....

MR SPEAKER

Konklizyon Onorab *please*.

HON JOHAN LOZE

Mon ava konklir Mr Speaker. Mr Speaker an konklizyon mon pou dir ki bokou ledwa i ganny montre lo nou kote.

Nou ganny dir ki nou ti kre logmantasyon an 2008. Nou ti fer isi laba. An 2008 nou ti donn logmantasyon saler.

Avan menm, avan menm ki ti annan okenn logmantasyon *tax*, logmantasyon *cost*. Nou ti soutenir pep avan ki okenn difikilte ti ganny mete lo son ledò.

E mon konpran aköz Minis Hassan pa konpran sa. Yer Minis Hassan i vini i dir nou koumsa poudir definisyon sa term *neoliberal* se apre ki ou'n liberalize.

Neoliberal senpleman vedir apre ki ou'n liberalize. Be Minis Hassan *the word neo means new. It does not mean post, it does not mean after*.

Nou annan nou en Minis Finans ki pe enplimant en filozofi ekonomik ki li menm li i pa ganny en konpran.

I pa konn ni definisyon sa ki i pe fer. So, mon konpran *then* ki problem ki zot, zot ladan. Mesi Mr Speaker.

MR SPEAKER

Mersi Onorab. Laparol i pou Onorab Gabriel.

HON CONRAD GABRIEL

Mersi Mr Speaker. Mon dir bonzour, bonn apre midi tou dimoun ki a lekout, Spesyalman zabitan Point Larue.

Mr Speaker, si i annan en keksoz ki mon rekonnèt se ki mon en dimoun ki kapab domin tou size ki vin devan nou Lasanble. Alors a sak fwa ki mon koze otan ki posib mon sey konsilte sers lopinyon zabitan pou mon kapab vin devan avek en pozisyon pli byen reprezante.

Mon kapab reprezant zot bann lopinyon e pou met zot konsern devan.

Onorab Lemiel, Onorab Vidot zot in fer sorti byen bann pwen ki nou zabitan pe pas atraver.

Mosyon ki devan nou letan ki ou get li, i pa enn ki annan mazer okenn gran problemm avek. E an prensip mwan mon napa okenn gran problemm avek Mosyon ki Onorab William in anmennen.

E la mon le asir Onorab ki mon pe pou, mon pa kont son Mosyon. E mon pa pou lev mon lanmen pou vot kont son Mosyon.

Menm si li in vot kont nou lamannman, yer. Nou pa fek

antre dan sa Lasanble. I fer en pe letan depi ki nou la. E i fer en pe letan depi ki *LDS* pe reprezant sa kote mazorite dan Gouvernman.

E pandan tou sa letan zot pa'n zanmen kapab annan kouraz pou met *on* zot *micro* e pou koz an faver zot zabitan ki'n elekte zot. Pozisyon ki zot in toultan pran, i enn ki zot in plito defann zot Gouvernman e son bann Polisi.

Lo nou kote nou'n sezi tou loportinite pou nou koz lo sa pep. Pou reprezant son bann konsern e soufrans. E pou nou mars a kote li dan son bann demars diran sa moman difisil.

E ozordi nou pe ganny dir ki se Mosyon ki konte. Zot lo kote Gouvernman zot in kouve pandan tou sa letan e pa'n zanmen defann lentere sa pep.

La ozordi ki zot in ganny permisyon avek Gouvernman. Finalman anmenn en Mosyon. Dapre zot sa Mosyon i pli enportan ki fer en reprezantasyon senser pou sa pep.

Mon oule ki zot konpran en keksoz. Mwan mon pa pou aret koz pou bann zabitan Point Larue.

Menm si zot anmenn Mosyon tou le 2an. Lo nou kote i pou kontinyen annan en reprezantan senser. En

reprézantasyon sènsè e serye pou koz lo bann sor nou pep.

Konpran mwan silvouple. Depi premye zour ki nou'n antre dan sa Lasanble ziske eleksyon 2025, zot pou kontinyen tann nou pe reprézant e defann lentere nou pep.

I pa akòz ki Gouvèrnman in donn zot permisyon pou anmenn en Mosyon ki sa pou sanze. Nou lo sa kote latab nou pa pou aret koz pou Lepep Seselwa. Nou pa pou abandonn zot pandan 18 sepa 19 mwan. Pa koz ditou lo son sor apre fer kar ki nou pe vin defann li.

Ou pa kapab asiz lo ban avek 4 tim foutbol apre fer krwar ou pe zwe defans. Mosyon i koz lo mezir ki'n anonse. E napa okenn mezir ki'n ganny anonse.

I annan zis en bann *statement* vag e konfizan ki pe fer dimoun tourn an ron. Minis in dir enn, Prezidan i dir lot. E zot ale, vini koumsa. San zanmen kapab eklersi zot pozisyon. La ziska yer ti ankor annan vatevyen isi dan sa Lasanble lo sa size logmantasyon saler.

Prezidan i anons en keksoz, e Minis i vin dir nou en lot zafer. Mon konpran ki sa Mosyon in ganny anmennen koman en zouti politik pou sey

kre en pe leksitasyon avan *speech* Prezidan le 29 Zen.

Me byento tou dimoun ki serye e nou pep pou *deserve* bokou pli byen ki sa.

Letan pou anons nou son soufrans, zot ti vini e zot ti anons li sek. San okenn lafanfar. Logmantasyon bis par egzanzp ti ganny anonse sek. Ti kler. La ozordi letan pou koz lo son benefis, i pou tann par bout. En bout dan *press conference*, lot bout dan en kestasyon ki ti ganny demande yer. En lot bout partou, partou. Mr Speaker kestasyon ki'n kre plis konfizyon. Apre ankor en lot bout dan en Mosyon. E finalman i ava ganny son *full* doz ler ki mezir i finalman ganny anonse.

Be non, zot pe zwe avek dimoun la. Zot anmenn e Mosyon ki dir baze lo mezir ki'n anonse. Selman yer Minis Finans in dir avek Onorab Cosgrow esper mezir anonse. E zot tou zot in pran lokazyon pou riye. Eski lot kote latab zot vremen sènsè ek sa bann dimoun ki'n elekte zot? Si wi silvouple zwenn nou pou rod vre solisyon pou problem.

Mr Speaker, an traver ou, in e pli letan pou vin zwe politik ek vant dimoun. Mon pou aret la Mr Speaker, akòz yer Onorab Uranie in fer le pwen atraver

son lentervansyon. E ozordi Onorab Gill in fer sorti soufrans zabitan ki lo zil e dan Sesel antye pe vreman pas ladan.

Avek sa de mo mon ava dir ou mersi. *Thank you.*

MR SPEAKER

Mersi Onorab Gabriel. Laparol i pou Onorab Arissol - Sandy.

HON SANDY ARISSOL

Mersi Mr Speaker. Bonn apre midi tou dimoun ki pe ekoute. Spesyalman bann zoli dimoun Bel Ombre.

Mr Speaker, ou konnen i annan en pe letan dan nou pei ki annan bann madanm tousel. I pa depi Gouvernman *LDS* in vin o pouvwar. Nou annan bann fanm tousel dan sa pei.

I annan en pe letan dan nou pei kot nou tou nou pran en pti frisiter ennler. Nou rousi li nou noy li dan delwil. Nou met li lo nou diri e nou fer sa bon bouyon blan nou servi.

I ariv en moman letan dan nou pei kot nou tou nou pran en pti bwat ton nou rousi, ek en pti gin mayonnez nou met dan nou dipen, pou anmenn travay swa pou met dan bwat nou zanfan.

Napa naryen abnormal avek sa. Sa ki abnormal se letan nou mal dir li. Nou pe donn lenpresyon konmsi i annan

dimoun ki pe manz zis frisiter ki'n noye dan delwil parey Onorab Loze i fer nou krwar.

Mosyon Onorab William i koz lo 'swivan bann mezir anonse ki pou ganny enplimante par Gouvernman, sa Lasanble i demann Gouvernman' 'demann Gouvernman pou kontinyen revwar an plis fir a mezir ki lekonomi i permet pou soulaz, 'pou soulaz sirtou bann ki dan difikilte ek kou lavi'.

Onorab Loze Mr Speaker atraver ou in demande. Ki bann mezir i anonse.

Premyerman, in anonse ki pou annan en revizyon dan saler Sesel ki pe ganny fer. Ki pe ganny travay lo la. Enkli bann *allowances*. Ki bann mezir ki'n ganny anonse? Revizyon dan Trezyenm Mwan Saler pou baze lo performans.

Ki mezir ki'n ganny anonse? Revizyon dan *result-based Management*. Kot tou bann *Heads* pe ganny en *training* lo ki fason pou zot *manage*, zer zot Minister.

Ki kalite mezir ki'n ganny anonse? Revizyon dan nou nouvo *weight*. En travay ki pe ganny fer par *World Bank* ek *IMF*.

Plizyer mezir in ganny anonse Mr Speaker dan nou pei. Alor tou sa bann mezir se

pou sa rezon Onorab William in anmenn son Mosyon. Me letan bann *US* i koze. Onorab Gabriel i dir ek nou apre 2an ki nou'n anmenn en Mosyon. Selman li lo son kote i pa ankor anmenn lanmwatye Mosyon pandan sa 2an ki i la.

Letan mon get *journal* ki Lasanble Nasyonal i pibliye, nou get lalis Mosyon, mon pa vwar en Mosyon sorti kot *US* mwan Mr Speaker dan rikord.

Tou Mosyon i sorti lo kote *LDS*. Ler mon get *Order Paper*, tou Mosyon ki annan lo *Order Paper* apart Onorab Pillay. I annan, 1, 2, 3, 4, 5 Mosyon, tou Mosyon i sorti lo kote *LDS*. Napa en Mosyon sorti kote *US*. Dan lalis ki Lasanble in donn nou i annan en ki apel *pending Motions 2022*.

I annan premye Mosyon pou Onorab Adelaide. Dezyenm Mosyon Onorab Regina Esparon. Trwazyenm Mosyon Onorab Gervais Henrie. Katriyenm Mosyon Gervais Henrie. Senkyenm Mosyon Onorab Gervais Henrie. Mon pa war en Mosyon sorti kot Onorab Gabriel mwan Mr Speaker? Ni en Mosyon sorti kot Onorab Rocky Uranie. Mon pa war mwan. Mon pa trouve mwan.

Selman sa bann menm dimoun enkli Onorab Audrey Vidot ki zot vini zot dir ek nou,

zot koz lo soufrans Seselwa. Seselwa in telefonn zot. Zot in rod *sponsor*.

La zisteman lo *sponsor* mon ti ava kontan dir dimoun Roche Caiman pa bliye kontakte Onorab Audrey, akoz in ganny *sponsor* li pou ed zot. Al rod li kot i pe reste ozordi. Rod zot *sponsor* ki in rode pou li kapab asiste zot dan sa demars ki zot pe fer.

Mwan mon pa war okenn Mosyon sorti kot sa bann Onorab Mr Speaker. Me pourtan zot vini zot dir ek nou dimoun in *call* nou, dimoun i telefonn nou, dimoun i dir ek nou.

Be zot reprezantan dimoun zot. Ler lepep i dir zot en keksoz anmenn Mosyon. Anmenn kestyon. *Challenge* Gouvernman. Zot pa fer zot. Zot asize trankil. Zot vey dan lapas dan goulo, zot anmenn lamannman. Zot anmenn lamannman. Akoz zot anmenn lamannman Mr Speaker? Senpleman *US* zot in kanmi.

Ou konnen akoz zot in kanmi *US* Mr Speaker? Fodre pa nou bliye sa bann dimoun ki pe ekoute deor fodre pa zot bliye, sa menm *US* ozordi ki'n deklar li *a New United Seychelles* la.

Ki son mo i en pe difisil pou prononse dan Lasanble la.

Fodre pa nou bliye. Zot ti deza dan Lopozisyon zot. Zot rapel zot ti deza dan Lopozisyon?

Zot rapel ler zot ti dan Lopozisyon ki zot ti fer? Rikord i la. Zot ti fer dezord. Ti annan rikord dan liv ler nou ti aprann lekol. Bonm kot Radyo Sesel, dan sak vakwa.

Bonm *Reef Hotel*. Ti annan en seri dezord. Prezan *SPUP* sa letan i vin dan Gouvernman atraver koudeta. Zot in la pandan 43an. Ozordi zot vwar zot, zot in retourn dan Lopozisyon. Zis ki zot fer, pou dimoun pa rekonnèt zot. Sanz zot non apel zot *a New United Seychelles*. En non ki nou pa kapab prononse dan Lasanble.

Sa ki dimoun fodre pa bliye. *US* letan i dan Lopozisyon i annan en sel manda li. Son manda se pou asire ki Gouvernman pa bouze. Pa bouz de lavan Mr Speaker. Sa zot manda.

Nou konpran nou. Nou konnen nou. Alor ki zot in komans fer. Zot in komans fer lamars ilegal, ki zot in ganny *finés*. Zot in komans anmenn 2 *Tinky Winky* anvil kot Lorloz avek lalkol.

Zot in komans fer *press conference* avek 3 ver boutey rouz lo miray. La i reste zis enn ek lanmwatye.

Zot in sey anmenn bann dimoun ansanm pou sey fer bann rasanbleman ki pa'n marse. Alor ki zot fer Mr Speaker.

Zot servi nou Lasanble Nasyonal pou vin koz lo lemosyon. Alor frisiter pe noye dan delwil, dan pwalon. Sa manman pa pe kapab donn manze son zanfan.

Selman sa ki enteresan Minis ti vin devan Lasanble Nasyonal Mrs Patricia Francourt, konnen ki i ti dir Mr Speaker, ti dir avek nou tou si zot santi i annan zanfan ki bezwen led, i annan fanmir ki bezwen led, vin devan dir.

Konnen ki *US* i fer Mr Speaker? Zot reste trankil zot pa dir. Konnen akoz zot pa dir? Parske zot anvi Gouvernman i *fail*. Sa zot bi.

Ki zot ti fer. Mon'n tann koz *Airport* taler. Be lekel ki ti dir kit *Airport* fermen, pa ouver. Tap lanmen lo latab dan *press conference*. Sa letan ti ankor annan 3 ver boutey rouz lo miray.

Ferm *Airport*. En bon groser boutey rouz. Ferm *Airport*. Ler ti pou ferm *Airport* la, zot ti anvi Gouvernman i *fail*. Touris pa antre. Napa larzan pou pey Seselwa. Tou bann biznes fermen.

Ozordi nou Gouvernman atraver nou Prezidan - Wavel Ramkalawan sa zonm ki zot ti dir zanmen met son lipye *State House* la, la ler ou pe koze i *State House* dan *Cabinet Meeting*. Donn li en gro lanmen i *State House* in arive li.

Mr Speaker zot ti anvi nou pei i *fail*. Ozordi *Airport* in ouver. Touris La Digue pa kapab gete marmay i dir.

Mr Speaker, letan mon lo La Digue, mon anvi dir avek Onorab Uranie atraver ou, aret maltret dimoun La Digue.

Aret dir dimoun La Digue i mizer. Aret dir dimoun La Digue zot lafen, bann dimoun La Digue i *upset*, zot ankoler. Napa en landrwa dan Sesel Mr Speaker ki annan plis *guest house* dan Sesel se La Digue! Plis *Guest house* dan nou pei se La Digue.

Ozordi La Digue i en pti landrwa dan Sesel ki kontribye dan lekonomi nou pei. Sel landrwa dan Sesel ki dimoun pa servi bis parey lo Mahe. Zot pa depans en kantite *fuel*. Zot pa depans Roupri dan pey bis zot. Ou le dir mwan sa i fer dimoun La Digue lafen Onorab Uranie atraver ou Mr Speaker?

En keksoz pli enteresan, sa lekip ki'n sorti La Digue pou vin pran par dan *Sports Day*, en

lekip ekselan! Pli gro delegasyon ki ti desann Mahe.

E ou konnen ki i enteresan ek sa Mr Speaker? Ou konn byen parske ou osi ou en bout laba La Digue. Pli gro delegasyon sorti La Digue.

Ler mwan mon asiz anler lo *grand stand* mon get bann zanfan anba, se bann zoli garson, bann zoli fiy sorti La Digue. Ou konnen aköz? Se bann zanfan ki zot paran i okip zot byen. Sony zot byen. Sa ki nou anvi pou Sesel. Legzanp ki La Digue pe montre nou.

Prezan fodre pa nou Mahe nou vini, La Digue pe fer sitan byen dan lekonomi pei, pe ed son dimoun bouz de lavan, nou Mahe prezan nou vini nou gele.

La zot in entrodwir tro bokou bann gran sistenm kot *welfare*. Dimoun i met tro bokou laliny. Mon ava dir Onorab Wallace Cosgrow Mr Speaker atraver ou aköz dimoun i met laliny kot *welfare* ozordi? Oubyen prosedir tro long?

Parske lontan ler bann ansyen Minis ti fer lav zot kazo torti zot park torti la, *welfare* ki ti pey zot dimoun pou lav zot park torti.

Ler zot ti anvi konstri park torti kot zot lakour la, sete larzan *welfare!* Ler miray *swimming pool* ti pete, *flood*

semen Plaisance la, sete larzan *welfare!*

Ozordi mwan mon anvi felisit Mrs Morin pou sa travay ki i pe fer. Parski ozordi dan nou pei nou'n nobou kapab met en lord kot *welfare*. Kot *welfare* tou sa ki ti anvi ganny en pti papye avek Minis entel, avek *DA* entel, ek *CC Member* entel, desann ou pou war sekirite. Koz ek sekirite, i pou dir ek ou ki laport ou pou antre. Ou ale ou ganny en pti lanvlop. Sekirite i ganny son dil devan laport. Ou, ou ganny pou ou, ou ale.

Ozordi Mr Speaker, ler nou pe koz lo Fon Pansyon. Napa larzan dan Fon Pansyon, lala rezilta Fon Pansyon. Sa bon zesyon, sa bon gidans ki Onorab Wallace Cosgrow ti dir nou ti annan dan son Gouvernman lontan. Sa bon *planning* ki ti annan, ti egziste.

Mon a dir li bon *planning* ki ti egziste; nou larzan perdi i kot *welfare*.

Sekirite sosyal 1.8 milyon - perdi. Mon pa konnen si ou ki ti Minis sa letan. *SBSA* milyon - perdi.

Nou pe koz Ile Soleil - perdi. Zarm i antre dan nou pei par *container*. Me tou sa la pa ti anba bon zesyon ou Gouvernman ki ou ti pe koz lo la taler Mr Speaker?

Park torti ganny fer ek nou larzan. Sete bon zesyon dan ou Gouvernman ki ou ti pe koze atraver ou Mr Speaker!

Guys nou Gouvernman pe fer sitan byen. E ozordi zot, zot in fini pri zot. Zot vwar poudir nou pei pe bouz de la van. Prezan anvoy en pti Manm en pe feb, feb, donn li en pti lamannman. Dir li vin prezant en amannman pou *highjack* nou Mosyon.

Pa pe marse sa. Pa ou marse non. Pa pou marse, pa pou pase. Zot anvi montre Seselwa zot pe travay parey Onorab Audrey in dir nou. Zot bezwen anmenn en Mosyon. Demann kestyon.

Letan mon tann zot dir zis zot ki demann kestyon pou Seselwa. Nou, nou reste trankil. Lo *Order Paper*, get *Order Paper* sa semenn.

Get kantite kestyon nou, nou annan konpare avek zot, zot annan. Apre zot ava fer ladiferans. Letan zot pe koz pou 'dimoun pe ekoute. Dimoun pe ekout nou. Nou ki pe tap laport pou zot.'

Ozordi nou, nou dan Gouvernman. I annan lenformasyon ki nou, nou gannyen atraver nou Minis. Nou kapab anvoy en pti *mail*. Nou kapab anvoy nou dimoun laba atraver randevou.

E zot ozordi zot santi zot dan en *limbo*. Parske pa zot Gouvernman. Alor zot santi par vin dan Lasanble Nasyonal, tap lanmen lo latap, koz en pe for. Sa i fer dimoun krwar poudir zot pe defann bann dimoun.

Guys dimoun ozordi atraver ou Mr Speaker pou mon bann Manm Lasanble Nasyonal, dimoun pe swiv, pe ekoute, pe gete. Dimoun pou deside ki i anvi fer li demen, apre demen pou nou pei.

Mr Speaker, Mosyon anmennen par Onorab William fantastik Onorab William. E letan mon lo sa Mosyon Mr Speaker, san pou *anticipate lot* Mosyon, lo sa menm *Order Paper* ki nou annan, sa menm Onorab William i annan en lot Mosyon li. En lot Mosyon. Ki koz lo en legzersis revizyon saler. Pou ankouraz sekter prive osi - sa bout kot Onorab Uranie avek Onorab Wallace ti pe rode.

I annan en lot Mosyon lo *Order Paper* ankor, anmennen par enn nou Manm menm. *LDS* ki pe travay pou sa pei. Zot, zot zis la pe vwale. Pe rode kote zot kapab anpandan.

Zot pe rode si zot ti pou pran vaksen pa pou pran vaksen. Pa bliye vaksen, mon'n bliy vaksen.

Vaksen zot vini zot dir ek nou koumsa, ou konnen vaksen pa bon. Bann dokter pe travay anba lenfliyans politisyen. Dokter pa ankor ganny sertifye par *WHO*. Alor zot pa tro sir.

Ozordi tou dimoun in pran vaksen ki pa'n sertifye par *WHO*. Tou dimoun in pran selman.

Lekonomi ozordi in nobou bouze, akoz Prezidan Ramkalawan ek son *Cabinet* enkli nou Gouvernman, enkli nou. nou'n asire ki *Airport* in ouver. Dimoun in vaksinen. Pei in bouze.

E ozordi ler nou pe koze Mr Speaker, nou tou la anndan dan Lasanble Nasyonal, nou ganny en saler, nou ganny tou nou benefis.

Tou bann dimoun ki travay dan Gouvernman enkli nou madanm, nou zanfan, zot msye ki dan Gouvernman, son saler i garanti.

Tou nou bann trwazyenm-az. Mon anvi koriz sa zafer trwazyenm-az Mr Speaker, ki Onorab Audrey i kontinyen zwe lo la.

Ou konnen ler nou ti dan *SNP*, si ozordi trwazyenm-az in ganny en logmantasyon, nou dan Lopozisyon ki ti demande sa lepok. Parey Onorab Monthy in dir. Zot ti dir napa larzan.

Nou ti dir, soulaz nou bann trwazyenm-az fer sir zot ganny R5mil sakenn.

Le sa msye i ganny R5mil. Son madanm i ganny R5mil, ler zot met ansanm dan en lakour i vin R10mil.

Ozordi Onorab Audrey li i tay ek sa. I dir ek ou non, non nou ti promet sak dimoun R10mil. Zot konnen zot. Be rol lopoziyon toultan i koumsa li. sey konfiz dimoun.

E sirtou sa Nouvo *United Seychelles* ki'n apel zot non, la -. En *United Seychelles* zot bon se konfiz dimoun. Be dimoun deor pe swiv. Pe ekoute. Pou zot asire ki tou sa ki nou pe dir i ganny sans balanse.

Onorab William en zoli Mosyon ou'n anmennen. E mon asire ki sa legzersis ki nou Gouvernman pe fer pou kontinyen. Pou annan serten lanons ki pou ganny fer ankor parey mon'n tann koze. Bann mezir konkret ki pou ganny anonse.

Nou ava esper nou Gouvernman fer. E nou sa ki pli enteresan parey in ganny dir. Nou pa'n fer li lavey en eleksyon.

Nou pe fer li fir a mezir. Fir a mezir, fir a mezir ki lekonomi i bouze. I vin pli aktiv, plis larzan i rantre. Nou soulaz nou bann dimoun.

E nou'n dir nou pe komans avek bann ki pli ba. R8 mil par anba. Ki tonm *carers* ki mon'n tann pe koz lo la.

I annan bann lezot travayer. Enkli nou trwazyenm-az.

Lo *carer*, mon anvi koriz en keksoz lo *carer*. *Carer* ki'n ganny dir pa fer dezyenm louvraz. *Carer* i kapab fer dezyenm louvraz li. I kapab fer en dezyenm louvraz letan i fini son louvraz *carer*.

Ou pa kapab anploye ek sa dimoun, al travay lo laferm, al dan laboutik, al lav seve, selman sa vye madanm pa pe ganny delo, son kastrol pe brile lo dife e li i ganny neglize.

Nou bezwen *sort out* sa. Pou nou asire ki lo *carer* nou tou nou koz menm parol.

Be selman Mr Speaker mon ava konklir an dizan ki nou pou donn Onorab William *full sipor*.

E mwan de tanzantan mon kontan rousi en pti frisiter, noy li dan en pti gin delwil, met li lo mon diri blan avek en pti bouyon blan pou mwan fer, avek en pti pense piman, pou mwan fer li desann.

Zis parey i annan de fwa mon fri 2 dizef, mon tal li lo mon diri blan. E mon benny li avek en pe lasos tomat *Soleil*, pou mwan *enjoy* li.

E ozordi sa i bann keksoz normal dan nou pei. E letan nou riye dan sa Lasanble Mr Speaker, gete lekel ki dan Lasanble Nasyonal zis Manm Lasanble ki la. Napa dimoun an deor ki la. Alor ler nou lo sa kote nou riye, nou riy bann parol bet ki bann Onorab lot kote i dir.

Nou pa pe riy Lepep Seselwa nou. Nou pe riy bann mansonz ki zot, zot koz lo la. Parey sa Mosyon fay, fay ki zot in anmennen pou vin sey *highjack* nou Mosyon sorti Dan Goulo La Digue.

Mersi bokou Mr Speaker.

MR SPEAKER

Mersi. Bon nou pou pran poz la, mon krwar nou ava kapab rebran. Mon konnen i annan Komite ki annan *meeting* 12 edmi, so mon ava liber zot atann.

E lo *ABC* osi pa bliye bann Manm silvouple raport *promptly* ler en kar. Mon krwar nou pou bezwen en pti pe plis letan pou *ABC* ozordi. Alor mon pou met rekomansman deba pou 2.15. Mersi.

(BREAK)

MR SPEAKER

Bonn apre midi tou dimoun. Mon ava zis eksplik nou piblik ki sa retar akoz

serten Komite ti ankor an sesyon. E bann Manm in ganny en pe difikilte pou retir zot lekor.

Nou ava kontinyen avek nou deba. E mon annan Onorab Uranie pou ganny laparol.

HON ROCKY URANIE

Mersi Mr Speaker. Bonn apre midi Mr Speaker, tou koleg Onorab, tou zabitan Zil Pros e Bel Ombre ki a lekout.

Mr Speaker, i pa mon lentansyon pou fer kankan oubyen maltret dimoun. Me selman atraver ou Mr Speaker mon'n vremen dezapwente.

Mon'n swiv plizyer fwa Lasanble Nasyonal e atraver ou parey mon dir mon'n tann Onorab Arissol zis fer kankan e maltret dimoun.

MR SPEAKER

Onorab mon krwar sa pa merite. Eskiz mwan.

HON ROCKY URANIE

Be Mr Speaker - Mr Speaker...

MR SPEAKER

Eskiz mwan, Onorab. Ou konnen, kontinyen avek ou pwen san servi term. Akoz mon krwar Onorab Arissol pa'n maltret dimoun. Mersi.

HON ROCKY URANIE

Mr Speaker in dir mwan poudir mon maltret dimoun La Digue. Ler mon pe dir dimoun La Digue pe soufer. Akoz li in al lo stad in vwar manrmay byen gra byen portan.

Me solman menm paran ki pe dir mwan i dir mwan depi lontan zot pe sey sonny zot zanfan. Zot *struggle* pou sonny zot zanfan pou fer sir ki zot zanfan i kapab ganny lafors pou vin taye.

Akoz La Digue i annan en lafyerte. Pa akoz zot pe pas dan serten soufrans ki ler zot vin Mahe pou *compete* zot bezwen vini tou kannyan, kannyan pou les zot pil lo nou!

Nou vin isi pou *compete* akoz nou en konbatan. Zis parey nou pe soufer avek pri lavi, nou pe konbat avek.

E nou pa vin isi la anndan pou fer zistwar.

Mr Speaker,

MR SPEAKER

Onorab Larue.

HON ROCKY URANIE

Onorab Larue li mon konnen ki son problem, taler mon pou dir li.

Mr Speaker, Onorab atraver ou Philip Monthy ou a krwar in zalou sa bann meday

ki ti dan mon likou. Mwan mon dir li akoz mon konnekte avek mon bann zenn. Zot paran ler zanfan ti debarke ti kontan, ti met sa bann meday dan mon likou.

Pou montre lapresyasyon pou mwan konman zot *MNA*. Me mon garanti zot 25 zot la, fer konpetisyon taye fer atletik, ou pou bat zot tou mon pou ganny meday lor, depi Cascade premye. E i konn byen li mon koleg Onorab Philip Monthy.

Mr Speaker nou konnen Onorab Labrosse pe dir i annan *vacancy* ki pe ganny pibliye tanzantan. I vre i annan *vacancy* ki monte. Me ankor, zot dir nou ganny *text* wi mon'n ganny *text* ki paran pe konplent ek mwan ki sanmenm son zanfan pe *apply* la napa kalite sertifika zot pa pe demande.

Me ki nou fer nou? Nou pa fer *fake* sertifika pou donnen. Nou pa fer *fake* sertifika. Paran i plennyen pe rod rekour menm pou zot soufrans.

Mwan ki ti anmenn lamannman pou Mosyon Onorab lo Mosyon Onorab William. Akoz mon ti anvi met en pe plis keksoz direk konkret pou *press* Gouvernman pou vin en pe pli proaktiv ek bann desizyon ki konsern kout lavi. Mon pa ti anvi annan

lentansyon *highjack* son Mosyon parey zot pe fer krwar.

Akoz mon pa en *highjacker*. Akoz apre 100 zour mon krwar dimoun ti ganny *highjack* ti ganny fer ale. So Mr Speaker mon lentansyon ti bon, akoz mon ti anvi *press* pour ganny komikman Gouvernman pou vin pli proaktiv, vin aksyon direk pou rezourd sityasyon kout lavi.

E mwan tou loportinite ki mon ti gannyen parey mon'n dir, mon'n sey fer resorti sa kout lavi. Finalman, finalman, mon vwar Onorab lentansyon in vin avek.

Mr Speaker, nou ti annan *STC* La Digue ti frenmen. *STC* in vin avek en sistenm *RRP*. Ek mwan mon annan Mr Speaker mon ava *forward* si oule apre, kot *STC* son *packaging* pe met *toilet paper Orchid* 52.50 (*RRP*).

Kot boutikye in al rod 18 pake *Orchid*, in tonm li R939.24. E *STC* in sarz li *VAT* ki'n ariv R140.89. E ler in pran tou le de in azout ansanm in tonm sa dimoun sa marsan 1080.13.

E ler i pran sa, in diviz par lakantite par son 18 pake ki'n aste i vwar i tonm li R60 en pake *Orchid toilet paper*.

Selman ou *STC* ou pe dir li vann lo *RRP* 52.50. Be ki kalite matematik sa? Yer ti pe koz matematik, kalite matematik sa

enn? Prezan sa prop boutikye li i bezwen vwar al met 15poursan lo la.

Son leker i fermal i pa ni menm met 15 poursan, i tir e 15poursan ti pou tonm li R9 lo R60.

Li in deside i ti pou vann son pake *toilet paper* 69 i dir non i ava tir R2 i vann li R67. Me selman nou'n tann dir a bann marsan met en R2 lo la. Be lo R52.50 si sa marsan i met R2 lo la konbyen i arive ler in aste *wholesale*?

Savedir *STC* i bezwen serye ek son *RRP*. Mazinen ki ler dimoun i vin aste, dimoun i bezwen pey *VAT*. Savedir kalkil *RRP* ek *VAT* ansanm.

Sa ki apel matematik. Koumsa i ava vini, nou ava vin avek en bon pri *RRP*. Koumsa nou ti ava dakor poudir be wi pa 52.50 R60.

So sa ki *STC* i bezwen fer pou bezwen bann bon kalkilasyon pou ede tir kout lavi lo nou. Akoz sa ki nou'n vwar la, kantmenm nou pe kriy *RRP* napa okenn dimoun ki *RRP* pe ede. Napa, e sirtou mon fer referans ek mon zil. Mon konpran akoz Onorab Gill in dir i ti ava kapab siport sa Mosyon.

Ok parey in ilistre in ilistre bokou, bokou, bokou sityasyon ki manke. Ilistre bokou sityasyon Praslin avek La Digue

ansan. Mon pa pou repete akoz nou pa oule fer repetisyon.

Sa i bann keksoz konkret ki nou pe rode dan sa Mosyon. Mon pa anvi *highjack* Mosyon. Me keksoz konkret. E mwan ler mon vin la anndan Mr Speaker. mon kontan koz pou dimoun La Digue, akoz zot in met mon la pou reprezant zot.

Me i malere ler mon vwar en lot Manm lo lot kote latab li i pe servi sa kont mwan, pe sey ensilte mwan e ensilte Digwa ler i pe fer sa.

Mr Speaker, ou konnen i vre nou en Pti Leta Zil. E ler Gouvernman i fer bann Lalwa bann Lalwa i bezwen zeneral, i pa kapab fer en Lalwa spesifik e spesyalman pour La Digue oubyen pou Praslin.

Me selman ki mon pe demande mwan, se ki zot pe vin avek keksoz zot bezwen pe pran konsiderasyon zil kot i annan zabitan ki pe viv. E i annan 3 *main* zil. Pa vin ek en Lalwa spesyal pou nou.

Nou konnen i pa pou zanmen posib pou nou pri egzakt parey Mahe. Me selman nou ti ava vwar poudir en pti diferans. E se pou sa rezon mon'n vini plizyer fwa mwan en mon koleg Onorab Gill nou'n plenny, nou'n koze. Nou'n sey donn sizesyon lo sibvansyon bann bato *cargo*.

Akoz operater bato in koz ek nou. E operater plizyer fwa in sey zwenn avek Minis. Me nanryen pa'n ganny fer. Me finalman mon'n kontan tande la ki dir i pe al fer diskisyon.

Sanmenm sa mon dir keksoz konkret - diskisyon. E sa diskisyon fodre i byen ganny fer. Akoz mwan parey Minis in dir yer i konn fer matematik, ler ou pe fer ou diskisyon ou bezwen balans byen sa kou transportasyon pou ou kapab konnen konbyen ou pou sibvansyonnen sa bato la, ki pou vreman ganny reflekte. I bezwen annan en legzersis byen ki bezwen ganny fer.

So mon ti ava kontan ler mon vin la anndan mon vin koze nou pa riye, parey Onorab in dir zot pe riy akoz sa ki nou pe dir i bet. Be sa ki ou ou'n dir ki bet. Ler ou vwar zanfan byen gra, byen for lo zil savedir zot dan bon. Non?

Sepourtan ler mon'n tann dir sa mon pa'n riye. Akoz mon realize be sa tou sa lannen mon konn sa *MNA* be mon ti krwar i pou vin avek en keksoz pli bon ki sa, be in dezapwent mwan.

Dan tou laspe nou soufer. Yer zot dir pa ganny *call*. Yer en fiy pe eksplik mon ankor sityasyon *volleyball* madanm. Ler zot desann kantite depans zot fer ki kantmenm i dir *NSC* i

dir i ankoler ler i tann sa msye NSC dir i donn zot larzan.

Kantite zot bezwen peye, pou zot vini dan zot pos akoz zot anvi partisipe dan sport. So sa bann sityasyon konkret Minis Spor i bezwen gete, vin avek bann metod, ki mannyer nou kapab ed sa zil. Ki mannyer nou kapab ed sa bann dimoun.

I vreman malere konmsi. Ler ou vin la anndan ou vin koz pou dimoun mon tann Onorab Audrey Vidot pe koz pour son dimoun. Onorab Cosgrow parey. *Ok*, Onorab Loze parey nou pe koz sor dimoun. Nou koz sor dimoun.

E mwan Mr Speaker tou Digwa i konn mwan. E zot ti elekte mon akoz serten karakteristik ki mon ti annan.

E riy dimoun malgre nou deza resit en keksoz i pa dan mwan. Riy lopinyon dimoun i pa dan mwan Mr Speaker. Ou pou demande ou pou demann tou dimoun La Digue i pou dir ou i pa dan mwan. Mon pa'n ganny elve koumsa mwan. La Digue nou'n toultan annan respe. Montre respe pou sa ki pli aze. Montre respe pou ou koleg. Montre respe pou sa ki pli zenn pou zot devlop sa sans respe.

E ler mon vin la ou vin dir ou riye akoz sa ki ou dir i bet.

Be zot annou gete lekel ki bet ant nou de la.

MR SPEAKER

Onorab ou pe repet ou lekor bokou lo la.

HON ROCKY URANIE

Mr Speaker. Mr Speaker mon konpran. Mon konpran Mr Speaker.

(Interruption)

MR SPEAKER

Order! Non Onorab mon pe zis *remind* ou ki ou pe apros 15 minit. Alor kekfwa ou ava kapab.

HON ROCKY URANIE

Petet ti ava'n pli bon 15 minit Mr Speaker.

So alors ankor loter Mosyon Mr William Onorab William, mon lentansyon sete donn ou Mosyon parey mon'n dir en direksyon pli drwat ki pou fer Gouvernman pran aksyon pli serye kot i konsern kout lavi. Napa *highjack*.

Yer zot in vot kont mon lamannman, zot an mazorite. Me mwan mon pa pou pran en kondisyon pou vot kont ou lamannman Onorab, kont ou Mosyon *sorry* Onorab Waven William.

Selman mon santi i pa ase, se pou sa rezon mon ti anmenn en lamannman. E mon swete ki ou konpran sa e ou vwar sa ki dan ou repons ou sey rod en fason pou dir serten keksoz ki pou vreman pous Gouvernman pou aksyon.

Avek sa de pwen Mr Speaker, mon remersi ou pou sa loportinite ki ou'n donn mwan. Mersi Mr Speaker.

(APPLAUSE)

MR SPEAKER

Mersi Onorab Uranie. Mon ava donn laparol Onorab Pillay.

HON SEBASTIEN PILLAY

Mersi Mr Speaker. E bonn apre midi tou koleg Onorab. Bonn apre midi tou dimoun ki pe ekout nou.

E mon konnen bokou dimoun in swiv atantivman deba lo sa Mosyon aköz in koz lo bann size ki konser zot, e ki zot in kapab pran konsyans lo bann keksoz ki bann Manm Lasanble in dir lo tou le de kote latab, ek ki bann largiman pour e kont an faver pa an faver lo sa Mosyon ki'n vin devan Lasanble.

Me selman i enportan pou nou sitye nou lekor kote nou trouv nou ozordi.

Rezon mon dir sa i aköz i neserer pou Lepep Seselwa i enportan pou Lepep Seselwa konpran ki direksyon nou pe ale, e ki nou bezwen fer pou fer sir pou dir dan sa direksyon ki nou pe ale, nou tou nou kapab ariv ansanm dan sa destinasyon san ki okenn antre nou i ganny kit deryer oubyen ganny met par kote.

Mon dir sa aköz mon santi poudir dan nou pei ozordi nou pe devlop si oule en larogans pouvwar. En larogans pouvwar ki malgre ki bokou nou in dir nou'n *campaign* pou retir sa larogans pouvwar pou anmenn la demokrasi, me nou pe devlop en larogans pouvwar kot nide e lopinyon lezot dimoun in vin, en baz pou fer *joke* pou denigre, e pou atak en lot dimoun aköz en lopinyon diferan ki kapab annan.

En larogans pouvwar kot dek konman ou kestyonn Gouvernman ou met presyon lo li, ou fer ou louvraz konman en Manm Lasanble, pou rod leklersisman pou rod lenformasyon ou pou ganny zize. Kot par lepase ler ti annan Minis ki vin dan Lasanble ki ti bezwen reponn kestyonn depi bomaten ziska apre midi ennler ziska 6er.

Ozordi ler ou kestyonn en Minis for i sot anler konmans

ekrir let e demande ki ou *apologize*. Demande ki ou *apology* kantmenm dan Konstitisyon napa okenn landrwa ki'n ekrire kot i dir ki Manm Lasanble sipoze fer sa akoz ou annan lib lekspresyon dan Lasanble Nasyonal.

Se sa kot nou'n arive. Bann menm gran defander la demokrasi ozordi i devlope en lapo sitan fen, ki okenn pti tapaz ki zot tande zot sote parey sat ki'n ariv o bor delo. Se sa sityasyon kot nou trouv nou lekor ozordi ladan.

E nou trouv nou lekor dan sa sityasyon akoz ler mon'n ekout bokou bann entervenans ki'n koze, en largiman fondamantal ki'n ganny avanse, in retourn otour lamannman ki Onorab Uranie ti le fer lo sa Mosyon yer. E zisteman servi en largiman poudir ki nou kote, ti pe esey *highjack* sa Mosyon anmenn nou Mosyon fer nou travay anmenn nou Mosyon.

Mon'n tann koz lo rikord Lasanble zournal Lasanble. Be mon demann piblik pou regard verbatim e bann *video* Lasanble pou vwar lekel Manm lo ki kote latab ki'n kestyonn Gouvernman plis, e met presyon plis lo Gouvernman lo sa size pri lavi? E sa pa lot ki bann Manm *United Seychelles* ki'n fer sa.

(APPLAUSE)

HON SEBASTIEN PILLAY

Eski Onorab Larue i kapab les mwan koze Mr Speaker?

MR SPEAKER

Kontinyen Onorab.

HON SEBASTIEN PILLAY

I byen mon vwar ou port bokou latansyon, i byen.

Ou konnen i annan dimoun ki bliye ki ler ou ekout en lot dimoun ou donn li en serten respe parey nou'n fer, parey mwan mon'n fer. Mon annan mon defo. Me mon'n fer li ek respe. Mon'n ekout lezot Manm ki'n koze, mon'n ekout zot largiman. Mon pa'n dakor ek sa ki zot in dir. Me mon pa'n gognarde. Mon pa'n enteronpe.

E rezon pou sa se akoz mon santi pou dir dan sa *challenge* Gouvernman ki zot in dir nou fer *challenge* Gouvernman, zot bezwen les nou kapab *challenge* Gouvernman. Nou pa kapab vwar nou dan en sityasyon kot ou annan en Gouvernman ki pa oule ganny *challenged*.

Sa Gouvernman ek sa Legzekitiv pe von tro konfortab akoz i santi poudir sa mazorite

pou toultan apiy li *no matter what* ki dir ki fer.

Mon'n seye anmenn en Mosyon an relasyon avek sansir en Minis pou aktivite biznes ki pe annan. Me mon pa'n ganny sinyatir avek person lo lot kote latab. Kan tou dimoun in vwar, tou dimoun in konnen, tou dimoun in prouve poudir sa i leka. E zot dir poudir zot, zot oule *stamp out* bann aksyon parey.

E sa Mosyon ki devan nou, nou'n fer kler nou lentansyon Mosyon nou pa pe atak Mosyon nou. Me nou santi poudir ler Gouvernman pou pran zot Mosyon dan sa fason, son lapros ki i pou pran se ki i pou vin avek bann mezir *piecemeal*.

E sa bann mezir pou ganny li dan diferan fason, atraver diferan versyon, atraver diferan dimoun.

Si ziska la zot kapab dir mon ki mezir reel e tanzib ki Gouvernman in pran, mon ti a konpran. Si nou koz lo mezir ki pou al ganny pran, nou'n vwar ki Minis in dir nou dan Lasanble in refiz-e donn nou lenformasyon in dir nou espere. En Minis i refiz-e donn nou lenformasyon dan Lasanble e nou konman Lasanble nou aksepte sa.

E rezon aköz nou *press* Minis pou lenformasyon atraver Lasanble, se ki pou Lasanble ganny sa respe ki devret gannyen dan balans Gouvernman parey nou Konstitisyon i prevwar.

Me si nou pa fer sa. Si zot ek mazorite pa ed nou pou fer sa, nou pa pou arive afen. E mwan mon *refute* totalman sa largiman sa lakizasyon ki *Leader* Lopozisyon iresponsab. Iresponsab se ler ou konnen poudir ou pe *deny* en Gouvernman son Minis. Ou vin dan Lasanble ou dir ou pa pou vot lo sa Minis parey dan sizyenm Lasanble, apre ou anvoy mesaz dan *WhatsApp* dimoun, ou dir ek dimoun koumsa poudir ou pa ti vot sa Minis aköz ou pa anvi sa Gouvernman fonksyonnen. Sa ki apel iresponsab.

Iresponsab se ler ou fer en delegasyon Gouvernman sorti la anndan pou al veye ki pe pase lo *Airport* dan en plen sesyon kestyon. Sa ki apel iresponsab.

Nou bezwen regard larealite e la realite devan nou ozordi se ki nou oule ki Gouvernman i vin kler avek sa ki oule fer.

Gouvernman i kontinyen dir nou, nou annan program *IMF*. Be eski nou'n vwar ki

bann gran laliny sa program. Kwa ki *IMF* i anvi Gouvernman i fer.

Ki bann desizyon Gouvernman pe fer vizavi sa program. Nou pa vwar.

Konbyen zot la ki'n ganny en dokiman ki dir *measures to be taken in line of IMF programme* la la 1,2,3, 4, 5, 6?

Mon pa'n gannyen. E mon asire lo zot kote latap zot menm zot, zot pa gannyen.

E ler zot dir mwan poudir zot koz ek zot Gouvernman. Be mwan mon annan en Mosyon lo *Order Paper* ti sipoze annan en prezantasyon lo la zot pa ti koz ek Gouvernman poudir son bann prezantater vini?

Konmsi, mwan mon pe sey sonn en alarm pou Lepep Seselwa realize poudir sanmenm sa danze, danze annan en mazorite absolli ek son Gouvernman ansanm, anba nou sistenm gouvrenans ki nou annan ozordi.

E sa konfyans ki zot in fer avek annan sa mazorite absolli se sa ki arive. Akoz ozordi zot pe retourn mon lo firanmezir. Be si firanmezir, ki sa *SPPF/Lepep/US* ti dir, alors i vre ki *LDS* ozordi in vin *SPPF/Lepep/US*.

Zot ki dir - pa mon ki'n dir. Nou konnen poudir nou konnen realite nou konnen poudir i

annan problem dan pei. E sa pa mwan ki'n admet. Se Sef nou pei Sef an Touk nou pei Sef Deta nou pei ki'n admet. E in dir sa avek bann zournalis dan en konferans de pres.

In osi admet ki pri lavi i en *issue*. In osi admet ki pri lavi lo bann zil Praslin ek La Digue i en *issue*. Me ki nou ti vwar reaksyon Minis Finans o moman ki nou ti pe dir sa, pandan term pase sa Lasanble?

Ti annan en reaksyon ki konmsi nou, nou pe koz zis lo *welfare*. Ti annan zis labi, ti annan zis isi, ti annan zis laba. Ou konnen e mon krwar ti ava bon Seselwa i pran konsyans e get en kou. En kantite sa bann gro msye ki'n *around* ler bann gro, gro proze pe ganny fer, ki zot dir dan nou Gouvernman i byen pase. Me kot zot ete ozordi sa bann gro, gro msye?

Me pa i dan zot Gouvernman. Pa zot ki pe koz lo gro proze. Sanmenm sa sanzman ki zot in dir mon ki zot in anmennen? So fodre pa zot ankoler ek nou ler nou *remind* zot bann fe e bann realite ki egziste ozordi, e akoz nou krwar poudir keksoz i devret ganny fer diferaman.

Akoz no devret egzize ki Gouvernman i devret vin pli kler ek bann mezir ki pou pran. E nou ti anvi ki sa i vin kler pou

en senp rezon. Rezon se ki pou Lasanble i kapab fer son *oversight* lo sa bann keksoz ki Gouvernman i oule dir nou.

Pou annan bann kestyon ki nou oule demande. Nou konnen poudir nou annan de lannen konsekitiv ki Trezyenm Mwan Saler pa'n peye.

So ler Trezyenm Mwan Saler pa'n peye de lannen konsekitiv, nou, nou ti kont lamannman Lalwa ki ti fer ki ou touy Trezyenm Mwan.

Be la zot pe koz nou Trezyenm Mwan baze lo *result-based management ok*.

Trezyenm Mwan *result-based management performance bonus* kot i tonbe li? Bann travayer ki lo kontra pa pe gannyen *performance bonus*. So sa in ganny tire ek zot.

Bann ansenyan sa lannen ki pou ganny 30an servis, pa pou gannyen sa logmantasyon dan zot *long service allowance*. Bann ki'n ganny 30an servis 2an pase pa'n gannyen logmantasyon.

Eski dan bann mezir ki Gouvernman pe pran zot pe pran sa, non nou zis ganny dir poudir nou pe ganny *consolidate*.

Be rapel byen, mon pe demann sa kestyon lo *long*

service allowance i ava fer mon krwar lan e larepons ki ou toultan gannyen se ki nou pe *consolidate*. Nou pe *consolidate* kwa egzakteman?

Be mwan mon krwar i annan en keksoz ki pe arive mwan. Mon krwar ki sa i en mannev ki pe fer la. Sa mannev ki pe ganny fer i koumsa.

Mon konvenki mon ava ganny trouve mal trouve *wrong* si mon mal, ki probableman pou annan en ladres ki Prezidan i bezwen fer.

E ler Prezidan pou fer son ladres, la ki pou anons son bann mezir. E sa Mosyon i ava vin a sa moman dan zar zot pe fer sa bann mezir. Me lefe i reste se ki mannyer se kwa nou pa'n vwar en *build up* lo sa bann mezir.

Me sa ki pou enteresan parey mon ti dir yer se ki ler sa ti ganny fer anba bann Gouvernman presedan premye dimoun pou konplent sete Prezidan aktyel li menm.

I ti dir *do away* ek sa bann *speech* ki Lazournen Nasyonal akoz nou vin fer monte pri bis. Nou'n fer monte nou pe fer desann bis, nou pe fer monte saler donn logmantasyon eksetera. Aret fer sa bann kalite *speech*.

Ti ava enteresan pou vwar si i ale li osi i fer parey. Be

anfen kont annou analiz mezir ki nou pe koz lo la. Annou get byen bann mezir ki nou pe dir.

Premye mezir ki nou pe koz lo la ki nou tou nou pe koz lo la se byensir an relasyon ek saler. Be si an relasyon ek saler *then* i pe *impose in charge* lo ou *Consolidated Fund*. Mon pa pe sey *mislead* personn la.

I realite poudir si i annan en logmantasyon saler i pou annan en demann lo *Consolidated Fund* ki nou nou'n pase konman Lasanble. Lo Bidze ki nou'n pase konman Lasanble.

Therefore i fer sa Mosyon *walk border line*. Si nou pe dir mezir lo revwar bann *weights* nou ti ava kontan konnen ki mannyer i pou ganny fer. Se pou sa rezon ki ler nou'n ekout Gouvernman *all along* sa ki nou'n ganny dir i a de repriz i sa - lager *Ukraine, COVID*, lekonomi i dan problem, lo en kote.

Me lo lot kote dan bann lezot *forum* piblik lekonomi pe fer tre byen. Lekonomi isi, lekonomi laba. So si lekonomi pe fer sitan byen, be annou pas benefis avek dimoun. Annou aret fer dimoun ale vini. Annou pas sa benefis ek zot i senp.

Mon pa oule blanm personn. Nou'n vwar larzan pou nou a fer byennal Art mon

krwar R800mil ekek mon pa konnen.

Be dimoun pou demann kestyon. Lesansyel dimoun pou demande ki mannyer priyoritizm bann lentervansyon ki fer. E la i enteresan ler nou koz lo lentervansyon nou koz lo en *emergency intervention* ki Gouvernman i sipoze fer.

Nou ti ava kontan konnen kote lo ki baz. Tousala i montre Mr Speaker ki nou lentansyon sete pou pa *highjack* sa Mosyon. Me nou lentansyon sete pou fer Gouvernman realize poudir Lasanble Nasyonal pa pou zis vin sa platform.

Me Lasanble Nasyonal pou vin sa *oversight*. Pou vin sa lebra ki fer sir ki i onor bann langazman ki i fer. Me toultan mon dir ek Seselwa zot pa'n donn ou an mazorite pou kapab fer sa pou zot.

E malerezman zot mazorite ki zot in donner ozordi pa vwar nanryen mal ek Gouvernman. Zot dir zot Gouvernman zot koz par deryer rido. Be ler nou, nou ti koz par deryer rido ti kritik nou.

Ler nou Minis ti vin avek papye kestyon ki ler in anvoy kestyon pou li, ou a dir kestyon ki Manm lo lot kote latab in fini ganny demande depi de semenn pase, Minis in prepar en gran larepons, zot ti konplent.

Ozordi tousala i *ok* dan Sesel. Sa bann standar ki nou ti etabli ozordi nou nepli dakor avek, nou nepli enterese avek. E nou oule alors Lopoziyon alors ki fer Lopoziyon i sipoze dakor ek tou sa ki Gouvernman i dir.

Ozordi se Gouvernman ki pou dir nou ki mannyer nou pou zwe nou rol konman Lopoziyon. Mon krwar konman en Lasanble nou bezwen pran en desizyon. I pou enportan sa.

E pou annan lezot keksoz ki pou vini ki pou fer nou vwar ki pe arive. Ou konnen mon bann koleg dan *Bills Committee* i enform mwan *Lalwa Exile Tax* ki ti pe pase devan Lasanble. Pou annan plizyer legzanp mon pou servi sa enn i pli resan.

Piblik Seselwa antye ti vwar reaksyon Vis-Prezidan ler mon ti dir li i annan problem avek sa bann lamannman. Ki i ti dir mwan? Annou travay annou *get on with it*.

E zot tou la anndan zot ti riye, ti kontan. Napa enn ant zot ki ti tonm dakor ek mon a leksepsyon zot *Leader* ki ti realize apre poudir mon ti annan rezon.

Me nou pe zwe nou rol nou. Nou pe fer nou travay nou pe onor nou lobligasyon pou defann sa dokiman ki la. Me sa

osi zot osi zot bezwen fer avek nou. E Seselwa i bezwen vwar nou pe fer li.

Mon lentansyon se anmenn *mover* Mosyon lo sa nivo kestyonn Gouvernman ki ti annan dan sizyenm Lasanble.

Lo sa nivo kritik ki ti annan anver Gouvernman. Akoz mwan mon pa alez avek Gouvernman ler i dir mon i pa kapab donn mon sif lo ki kantite dimoun ki sipoze benefisye dan en lanons ki'n ganny fer nasyonanman.

MR SPEAKER

Onorab mon'n akord ou 20 minit la.

HON SEBASTIEN PILLAY

Mersi Mr Speaker. Mon apresye ki ou'n akord mwan 20 minit.

Sa ki mwan mon annan pou dir se ki nou konman Manm Lasanble e Lepep Seselwa ki pe get nou i bezwen realize, poudir swa ki ou fer dan lavi, ou bezwen viv avek parfwa.

So nou, nou pou bezwen viv ek lefe ki ozordi nou dan Lopoziyon, me zot osi zot pou bezwen viv ek lefe ki ozordi ki se zot ki dan Gouvernman.

E presyon i pou lo zot dan Gouvernman pou delivre.

Anmenn tou lanmor reken ki'n pase tou isi, tou laba zot bann zwe zot bann *CD* ki zot abitye zwe. Kontinyen zwe li zot.

Me a lafen dizour ki zot in fini zwe tou sa *CD* ler pou vin ler pou vin donn logmantasyon saler, se zot ki pou bezwen fer.

Ler pou vin ler pou donn keksoz dimoun se zot ki pou bezwen fer. E nou, nou pou la pou fer sir i parey zot, zot ti fer, ki zot fer li. E sa sa nou donn zot en garanti. Mersi Mr Speaker.

MR SPEAKER

Mersi.

(APPLAUSE)

MR SPEAKER

Mersi Onorab. A lafen entervansyon bann Manm mon ava apel Onorab William loter Mosyon pou fer son *Reply* lo deba.

HON WAVEN WILLIAM

Mersi Mr Speaker. Mr Speaker pou sa bann kestyon e leklersisman ki mon'n ganny demande sorti lot kote latab, mon anvì senpleman dir ek zot ki menm si zot in *boycott* demars sa Gouvernman aktyel dan nou Manifesto *LDS* pou eleksyon zeneral 2020 ti dir ki sa Gouvernman pou pran en

desizyon e fer aksyon. Mon asire ki zot bann kestyon e serten swe pou ganny *deal* avek kot i posib firanmezir ki lekonomi i permet parey Mosyon pe demande.

I zis 18 mwan Mr Speaker. Mon anvì dir zot pasyante, zot ava vwar aköz anba gidans Bondye tou pwisan *the sky is never the limit*. Sesel pou reisi dan son zefor.

Mr Speaker mon pou relir ankor Mosyon ki mon'n prezant devan Lasan ble;

Swivan bann mezir anonse ki pou ganny enplimante par Gouvernman, sa Lasanble i demann Gouvernman pou kontinyen revwar an plis firanmezir ki lekonomi i permet pou soulaz sirtou bann ki dan difikilte kout lavi.

Mr Speaker mon'n osi dan mon prezantasyon remersi nou kreater pou donn faver e lagras pou beni Sesel, si menm si *COVID* in tap lemonn e lager *Ukraine* e *La Russie* in afebli nou Sesel anba benediksyon in sirpas lekspektasyon Fon Monneter Enternasyonal.

Mr Speaker Sesel pe viv en mirak atraver desizyon brav, pridan e sarz depi apre eleksyon, atraver bann mezir ki pa popiler, ki pa pou enfliyans pep pou vot pou nou, si

eleksyon i fer demen bomaten
Mr Speaker.

Nou pe azir parey sa paran
lontan ki parey dan Labib i osi i
endike, ki en kout roten pa pou
fer zanfan ditor, si i ganny fer
an bonnfwa. Sa Gouvernman
pa pe pini Seselwa. Letan in
pran bann mezir ki'n met nou
dan pozisyon pou retir serten
pwa fardo det, e asire ki saler
travayer Seselwa i ganny
mentenir, ki nou dimoun aze i
kontinyen ganny zot pansyon.

Ki bann ki ganny siport
akoz zot otreman kapab, zot osi
ganny sipor parmi lezot ankor.

Mr Speaker parey mon'n
dir yer pti Sesel pou kontinyen
reste en pei depandan an gran
parti son lenportasyon.

I pou reste depandan lo ki
fason lekonomi mondyal i fer lo
kwa ki arive dan aktivite
komers mondyal afekte par
lenpak mondyal.

Dan sa konteks sa nouvo
Gouvernman pa kapab zer
larzan piblik dan en fason ki i
kontrol lekonomi mondyal. Me
i bezwen azir avek pridans.

Mon oule ozordi remerisi e
felisit mazorite Seselwa ki
konpran e zot in solider, pou
asire ki pti Sesel i reste
soutenab par ini ansanm pou
sirmont sa gro defi ki devan
nou.

Mr Speaker pti Sesel
menm si Labank Mondyal in
kategoriz li konman en *high
middle income country*, pa asiz
dan groupman pei devlope ki
nou apel *G5, G7 et G20* Mr
Speaker.

Kot se zot ki annan
kontrol e tou lenformasyon ki
mannyer lekonomi lemonn pe
ale ki bann azisteman bezwen
ganny fer.

Letan lanfans ler nou ti
regard ver lorizon nou ti vwar sa
laliny lorizon. Mwan e parmi
lezot mon asire ki bokou nou, ti
krwar ki lemonn i fini la Mr
Speaker. E lavi pa egziste apre
lorizon.

Mr Speaker eski letan
Labank Mondyal pe predir grav
lekonomi ki nou kapab fer fas
avek, ki serten aksyon irzan
mondyal kolektivman par tou
pei enkli Sesel bezwen ganny
fer.

Pou anpar konsekans fer
tou pou protez bann ki vilnerab
e pou kree bann kondisyon pou
refer lekonomi pei lonterm.

Letan Lorganizasyon
Korperasyon Devlopman
Ekonomik son bann sef
ekonomis pe dir ki sa lager si i
dire pou plonz bokou pei dan
lapovrete Mr Speaker.

Letan pei devlope pe dir ki
sa lager i kapab dire pour
lontan, ki sa i vedir lo sityasyon

aktyel ki lemonn e Sesel pe fer fas avek? Frer e ser Seselwa ziz-e pou zot menm.

Mon asire ki Mrs Chetty e Mrs Leon La Misère pou dakor ek mwan, ki nou bezwen azir ek pridans, lasazes e prekosyon e pa donn tou ozordi menm me kalkil sa letan dir ki pe anonse.

Mr Speaker Mr Yvon Sanders in deza dir mwan ki Lopozisyon pa serye e ou pa pou kapab depann lo zot parol. Ler *Leader* Lopozisyon i taye lo komite O Nivo, aköz i krwar son pwennvi pa'n ganny ekoute, aköz i krwar fodre fer sa ki i dir.

Letan nouvo Gouvernman ti konnen ki se en kanpanny vaksen ki pou asir konfyans pou touris vin Sesel, Lopozisyon ti *boycott* Mr Speaker.

Letan Gouvernman ti ouver frontyer boner pou les touris antre pou nou relans sa lekonomi ki ti lo son zenou, Lopozisyon swadizan defander pep Seselwa, sa manman tousel, sa ki pe trimouse pou de bout zwenn, Lopozisyon ti konmans ensit pep pou desann dan semen firanmezir bann mezir ti ganny pran.

(APPLAUSE)

HON WAVEN WILLIAM

Mr Speaker bann mezir ki ti bezwen ganny pran bann mezir ki ti merite ganny pran.

E letan Mr Speaker atraver ou *Leader* Lopozisyon ki ti en ansenyan e ozordi i *Leader* Lopozisyon, en pozisyon enportan dan sosyete, li menm ki'n akiz nou se son kote latab ki pe koz pou travayer Seselwa e kout lavi, lo sa Mosyon ki'n ganny anmennen aköz moman i favorab dan en fason pridan e responsab *Leader* Lopozisyon swadizan responsab i envok lartik 90 pou kraz sa Mosyon Mr Speaker.

In esey *kidnap* sa Mosyon ek en lamannman lo son kote latab, ki lespri sa lamannman i deza dan sa Mosyon Mr Speaker. E zot menm ozordi nou vwar ki zot in sanz zot pwennvi lo zot lamannman vizavi sa Mosyon e la mon felisit zot pou zot sanz sa pwennvi.

(APPLAUSE)

HON WAVEN WILLIAM

La Mr Speaker mon pa anvi donn leson personn. Aköz mon pa'n zanmen en ansenyan. Me pe anmenn Mosyon dan sirkonstans e realite kapasite nou sityasyon ekonomik.

Akse ek lenformasyon ozordi Mr Speaker i lo nou bout ledwa ler nou *google*. Alor pa fer

nou krwar ki sa Mosyon i annan zis en lipye dan son nesans e ki zot, zot pe anmenn en bekir pou li debout byen.

Mr Speaker Mosyon lafason in ganny fraze in fer sir ki aksyon pe ganny demande ki tous tou kous sosyete ki kapab tonm dan ran vilnerab swa endividi, swa konman en antreprenner.

Mr Speaker lo rapor anyel *forum economic* mondyal ki'n ganny *updated* le 24 Me 2022, la ankor par bann sef ekonomis Mr Speaker - pa par bann senp dimoun Mr Speaker - par bann sef ekonomis mondyal, pe predir en *base* dan aktivite ekonomik mondyal. Lenflasyon pli o dan lavenir. Saler i kapab desann pli ba.

Mr Speaker i kapab deklans en kriz alimanter sever mondyal e gran lensertitid.

Mr Speaker sa i pridan e sarz e osi responsab ki Gouvernman - menm si lekonomi pe rebran, pran en lapros firanmezir ki lekonomi i permet, pou adres size saler, kout lavi menm si i annan pti songo lenportasyon pou 4 mwan dan *parking*.

Sa Mosyon parey mon'n eksplike pa'n ganny fraze prezante dan en fason iresponsab - tanpi konnen si nou kree plis det. Mr Speaker

atraver ou mon anvi met lo rikord ki mon'n deza demann *Leader* Lopozisyon ki ti en ansenyan oparavan, si sak fwa mon pou koze mon pou bezwen anmenn mon *speech* kot li pou li korize?

Dan sa menm laliny Mr Speaker dan sa menm direksyon mon anvi demann avek Onorab Uranie sak fwa mon pou anmenn Mosyon mon pou bezwen anmenn kot li pou li korize osi?

Mr Speaker mon konnen se ki sa lager asarnen pou anpes proze lopital i nivo La Digue ki ansyen Gouvernman ti'n zis koz lo la, e ki Gouvernman ozordi pe fer se zabitan La Digue ki dezapwente ozordi.

Me solman lopital pou ganny fer Mr Speaker.

(APPLAUSE)

HON WAVEN WILLIAM

Mr Speaker mon deza dir dan sa Lasanble menm ki zonm pa viv par dipen tousel trouve dan Labib, me par tou parol ki sorti dan labous Bondye.

Mosyon ki ti'n ganny soumet kot Lasanble plis ki en mwan pase in antre lo *Order Paper* le 24 Me.

Ozordi Mr Speaker i le 23 Zen. Mr Speaker mon pa'n

ganny enfliyans-e par repons Prezidan dan konferans lapres parey Onorab Uranie atraver ou in dir. En ekout mon letan mon'n fer mon prezantasyon son Mosyon pou li anmenn en amannman.

Mr Speaker mon'n vwar li en moman en mirak ki pe arive Sesel dan konteks lekonomi ek defi lemonn. San konnen ki Prezidan pou anonse, byento ouswa pli tar firanmezir ki lekonomi i permet.

Atraver ou Mr Speaker mon anvi dir avek Onorab Uranie vwala ki bor Mosyon pe anliny ek tandans fason fer Gouvernman.

Setyennm Lasanble i la pou anmenn Mosyon, fer propozisyon pou Gouvernman konsidere dan son *roadmap* Mr Speaker.

Dan prosen lanons sa bann sipor adisyonnal ki Prezidan in koz lo la. Mon pran par dan konsern Onorab Vidot fason ou'n dekrir serten ka dan ou distrik i rasker.

Mon osi rapel e mon asire ou osi ou rapel ki Minis Francourt ti envit li pou donn li personnelman sa bann ka. Silvouple met de kote politik al vwar Minis pou sa bann ka ki merite, pa fer likou red.

E atraver ou Mr Speaker Onorab Vidot bezwen konsistan

dan son aksyon e koze. Mon a eksplike. Mr Speaker ler son parti ki ti pe *boycott* tou aksyon pou redres lekonomi, eski zot demann tou ozordi, menm lo bann komikman ki ansyen Gouvernman in fer i annord e konsistan? Kan la pou 18 mwan ki zot pa'n fer dan 43an sa Gouvernman in fer mirak.

(APPLAUSE)

HON WAVEN WILLIAM

Mr Speaker i pa mon lentansyon fer vantar, me sa ki mon ava met lo rikord se ki zanmen konman en kandida *SPPF/Parti Lepep e United Seychelles* mon'n sorti ek en pli o rezilta dan Eleksyon Lasanble Nasyonal! Mon pa ti krwar mon menm me mon ti depan lo gidans Bondye.

Mr Speaker mon bezwen repete mon ti depan lo parol Bondye, mon ti dir ek pep dan *interview* avek *SBC* pou desann al vote e les zot vot ganny gide atraver parol Bondye dan zot lespri, e dan zot leker.

Mr Speaker atraver ou Mr Speaker mon anvi dir avek Onorab Aglae ou pa konnen ki kote mon ti ne. Ou pa pou zanmen konn mon zistwar e rezondet ki mon isi lo sa kote latab.

Enn ou *Leader* in deza sey ridikiliz mwan ki mon *all over the place* letan mon ti pe konsantre dan travay *IAC* dan zot kote. Mon ti fer li avek bokou lentere Sesel a ker.

Omwen mon'n sape apre serten Dirizan ti pe persekit mon lavi. Zot in sey kas mon prensip travay ki preski tou zabitan Grand Anse Mahe zot konn mon personnalite.

Mr Speaker en keksoz ki zot pa'n kapab fer se fer mon met latet bourik pou dans lo beton.

(laughter)

HON WAVEN WILLIAM

Mr Speaker mon konpran prezan lakoler lot kote letan mon ti dir se ki sa Gouvernman *LDS* si i ti la pou 43an pase, Sesel ti pou lo semen vin sa pti *Singapore*.

Menm si apre zot in poste portre mon rezidans lo *facebook* Mr Speaker, mon anvi met lo rikord mon'n travay dir, mon pa'n vole. Mon'n pran en *loan* pou aste sa ki mon annan. E priv mon fanmir Mr Speaker firanmezir pou fer mon pti *Singapore*.

Eski ozordi Mr Speaker mon napa en ka koripsyon devan Lakour Konstitisyonnèl.

Si ozordi nouvo Gouvernman apre 18 mwan pe kontinyen pouse pou fer nouvo *Airport l'aéroport*, proze danm Grand Anse Mahe, dezyenm faz lakaz Vilaz Orkid ki ansyen Gouvernman in promet ti pou'n konplete avek sa Gouvernman.

Mr Speaker mon mazine poudir Ms Baker, Ms Solin, Ms Idrice, Ms Leon parmi lezot ti pou'n fini ganny zot lakaz ozordi. Mr Speaker mon'n deza dir plizyer fwa isi dan sa Lasanble ki dan botan annou rezour e dan movetan konsidere. Akoz Bondye in kree anba lot e ki zonn pa konn son desten.

Mr Speaker ozordi nou ankor dan movetan, prediksyon mondyal i kapab vin pli move. Gouvernman pe bezwen konsidere Mr Speaker. konsidere akoz Sesel i dan sa lensertitid mondyal.

I bon fer rapel pep Seselwa ki letan ti fer sanzman Gouvernman, zot ti pran nou pei parey en bef zis lezo ek lapo afeblir ater zot ti flank avek nou.

Dilon sa 18 mwan Mr Speaker, depi apre eleksyon zot in anvi nou tir dile ek park akoz sete sa bef ater ti napa dile. Mr Speaker ozordi nou'n sonny sa bef i nepli afeblir ater, in debout, nou pe angres li.

Ozordi 18 mwan pase nou konstate ki i kapab donn nou en lit dile par semenn. Firanmezir bef i vin pli bonn sante nou pou ganny plis dile e fimyen.

Mr Speaker si ou'n ekout lot kote latab, sa bef olye rekipere Mr Speaker i pou al dan leral si tandans lager i kontinyen.

Alors Mosyon pe dir regarde kwa an plis firanmezir pou soulaz bann ki vilnerab. Zis pou nou pa anvoy nou lekonomi atraver legzanp sa bef dan younit swen entansif, ouswa sa kales kase ki'n refer avek.

An konklizyon Mr Speaker, mon kontan *welcome* zot sipor, pou sa Mosyon. E si mon ti donn en meday merit lo zot kote latab, *comme d'habitude* se Onorab Gill ki ti pou gannyen pou son lentervansyon aplon.

Atraver sa Mosyon mon lans en lapel ek pep Seselwa pou reste vizilan e ki pe arive mondyal. Pou konpran pli byen sirkonstans e aköz Gouvernman bezwen fer keksoz framezir depandan lo kapasite ekonomik.

Pou reste solider, konn zot priyorite depans parey Gouverner Labank Santral in dir. Gouvernman siport lentere

lantreprenner ki pou zener pis larises dan Sekter Lapes, Tourizm e lezot servis ek nouvo sipor pou inisye.

Mr Speaker mon annan gran plezir pou soumet sa Mosyon avek Lasanble ankor enn fwa e pou demann tou Manm pou donn mon sipor.

E mon remerci Bondye Tou Pwisan ki kontinyen annan faver e lagras lo nou pei. Mersi.

(APPLAUSE)

MR SPEAKER

Mersi Onorab. Mon ava apezan apel bann Manm pou vot lo Mosyon ki lir koumsa;

Swivan bann mezir anonse ki pou ganny enplimante par Gouvernman, sa Lasanble i demann Gouvernman pou kontinyen revwar an plis firanmezir ki lekonomi i permet pou soulaz sirtou bann ki dan difikilte ek kout lavi. Manm ki an faver lev lanmen silvouple?

Bon mersi. Manm ki kont? Bon nou ava vini Mosyon annord silvouple.

Bon lo Mosyon ki mon fek lir pou Manm vot lo la 18 Manm in vot pour, 0 kont e 9 abstansyon.

Donk Mosyon in aprouve par Lasanble. Wi 18 pour, zero

kont e 7 abstansyon, *sorry* si mon'n mal dir. Mersi.

Bon nou ava pran en poz la. E nou ava rezwenn 4er pou nou kontinyen avek en pe travay. Mersi

(BREAK)

MR SPEAKER

Bon kontinyasyon travay lo *Order Paper* i lo Mosyon. E Mosyon ki swiv in soumet par Onorab Gervais Henrie. Onorab. Mon ava demann ou pou entrodwir ou Mosyon.

HON GERVAIS HENRIE

Mersi Mr Speaker. Bonn apre midi tou dimoun. Partikilyerman bonn apre midi bann zabitan Mont Buxton. Mosyon ki mon pe propoze devan Lasanble Nasyonal Mr Speaker i lir koumsa: -

Sa Lasanble i demann Gouvernman pou fer en lanket dan *lease* bann zil avek bann endividi prive pou etabli si lepep Seselwa e lekonomi pei pe benefisye atraver sa bann laranzman.

Mersi Mr Speaker.

MR SPEAKER

Mersi. Nou ava pran segonnman lo sa Mosyon silvouple. Onorab Porice.

HON DOYACE PORICE

Mersi Mr Speaker. Bonn apre midi a tous. Mon pe segonn sa Mosyon anmennen par Onorab Gervais Henrie. Mersi.

MR SPEAKER

Mersi. Onorab Henrie ou ava adres ou Mosyon.

HON GERVAIS HENRIE

Mersi Mr Speaker. Ankor enn fwa bonn apre midi tou dimoun. Mr Speaker Sesel koman en zil *oceanic.*, son resours later i tre limite.

An realite nou posed selman apepre 460 kilomet kare later, divize an mazorite par bann zil koralyenn. E zis 42 parmi bann zil ki granitik.

Dan sa napa i fer ki later i en komodite presye pou ou avek mwan koman Seselwa.

A leksepsyon later lo nou bann zil elwannyen ki riske en zour disparet aköz sanzman klima, e perdi zot valer, later kontrerman avek larzan, ki li i napa stabilite. Irespektiv sityasyon ekonomik dan lemonn, son valer setadir later pou kontinyelman ogmante.

Yer atraver kestyon mon ti table pou Minis Finans, nou'n aprann ki i annan 668 etranze ki annan propriyete rezidansyel dan nou pei.

Lo ki zot pey en *tax* 0.25 poursan, son valer marse sak lannen. I osi annan 52 propriyete komersyal avek 19 ki annan plizyer fonksyon.

Sa i fer en total 819 propriyete isi Sesel ki dan posesyon bann endividi ouswa lakonpanyen ki pa Seselwa.

Nou pa'n ganny lenformasyon lo kote sa bann propriyete i sitye egzakteman. E ki grander siperfisi zot reprezante.

Sa i en eleman zis enn dan bann tranzaksyon later ki egziste dan nou pei. I bann propriyete *freehold*. Setadir sa bann etranze i posed sa bann propriyete ziska zot deside vann.

Me i osi annan bann propriyete ki apartenir a Leta Sesel. E ki ganny vann lo baz *leasehold*. Sa i vedir bann investiser i posed zis batiman me pa sa later ki lo la.

Bann investiser i bezwen pey en kotizasyon peryodik lo sa propriyete. Bann *lease* dan term legal i varye ant 50 a 99an.

Size ki sa Mosyon pe demann Lasanble Nasyonal pou koz lo la ozordi, se pou egzamin sa bann pwen swivan ;

Lekel nou bann zil ki annan bann propriyete lo la ki pe ganny *lease*? Avek ki? Ki benefis direk ou endirek sa

bann tranzaksyon pe anmenn pou lekonomi pei e Lepep Seselwa?

Eski sa bann kondisyon i ankor favorab pou nou? Ki lavantaz ouswa dezavantaz en tel model ekonomik i annan?

Lease lo later Leta i en size ki souvan *polemic*. Akoz i annan soupson souvan ki kek manboulouk ant bann ki pe fasilite sa bann Lagreman e bann investiser i kapab pe arive.

Menm sa, a mon avi Leta i dwatet mentenir son drwa pou posed later, Pas bay avek bann endividi prive ouswa lakonpanyen.

Pou servi e devlop sa bann propriyete. Me zot selman pe kapab zwir sa bann benefis pou en peryod spesifik. E dan lafason ki i ganny presize anba en Kontra.

Atraver sistenm *lease* ki mannyer Leta i benefisyer direktteman?

Lo komansman sa lagreman ant letan e sa se dimoun ki bay pe al pas lo li, i annan en sonm larzan ki ganny peye inisyman.

Apré i annan en alokasyon anyel. Si sa devloper i modifye kondisyon son *lease*. Par egzamp pou li ganny drwa kondisyonnel pou re devlope fodre i pey en lot sonm larzan.

E finalman, i oblize pey ankor en sonm larzan pou renouvle son drwa lo son propriyete ler son *lease* i fini.

Bann benefis endirek i permet Leta stabiliz pri later lo marse, ed li kontrol e fasilite re devlopman later selon bezwen Nasyonal. E i pou zwir en porsyon benefis dan logmantasyon lo valer later a lavenir.

Menm avek tou sa bann benefis, defi ouswa dezavantaz dan sistenm *lease* i persiste. I annan problemm spekilasyon an premye lye.

Aprè ki nouvo administrasyon ti pran lofis an Oktob 2020. I ti oblize enpoz en moratoryonm lo transfer bann *lease* lo later konble.

E pli tar an Fevriye sa lannen. Gouvernman ti enpoz en fre 12.5 pousan lo valer sa pri transfer pou dekouraz ou anpes bann dimoun transfer zot *lease* an bonnavini.

Dan en deklarasyon avek lapres, Minis Devika Vidot ki konfirman ki Gouvernman in vwar bann transfer ki pe ganny *advertise* pou ant R25 a R30 milyon.

E menm \$12milyon Ameriken letan sa menm kare later in ganny vann avek bann devloper lo en pri redwir, ouswa

subsidies price parey nou dir an Angle.

Dezyenmman Me Speaker, i annan problemm bann devloper ki pa peye. Di-si Avril sa lannen letan Minis Vidot ti dan Lasanble, i ti devwale ki *IEA* - setadir sa Lazans ki zer bann *zone* endistriyel, ziska la ti'n nabou anmas R22 milyon an-term lokasyon, parmi lekel R10milyon ti larzan aryeraz ki pa ti'n peye depi 2017.

Trwazyenmman, i annan problemm kas kondisyon Kontra. Si nou fer en letour Providence par egzantp, nou a vwar ki i annan plizyer landrwa rezidansyel laba. Eski sa ti merit le ka. Providence ti ganny kree pou kwa an premye lye. E alor aköz dimoun i kas kondisyon Kontra ki zot in fer?

Katriyenmman, i annan problemm en pti group ki pran tou. Le 17 Mars 2017 atraver en Mosyon table par Dirizan Lopoziyon dan sizyenm Lasanble Nasyonal.

Prezidan Wavel Ramkalawan, sa Lasanble ti etablir ki okenn later Leta ki'n ganny *lease* fodre i dan benefis Lepep Seselwa.

Ki fodre i annan lazistis e latransparans dan zot distribisyon. Mosyon ki mon pe koz lo la ti konsern later lo Zil Eve Praslin.

Depi sa nou'n atann skandal dan kontribisyon later zere par *IEA*, kot endividi in ganny ziska 10 morso.

Alor ozordi pa vwar lo drol ki si sa Mosyon in ariv devan Lasanble Nasyonan, akòz mwan personelman e bokou lezot dimoun i sispekte ki alokasyon *lease* lo bann zil osi in sertennman mank en nivo transparans.

Lo nou zil prensipal - setadir Mahe. Later Leta pe prensipalman ganny *lease* pou aktivite lagrikiltir, komersyal e endistriyel.

Pou aktivite lagrikiltir sa pe ganny zere anba *Land Settlement Perpetual Leases of State Land Act*.

Sa i en Lalwa date depi 1969. E se atraver sa ki bann kominote bloker Rose Belle La Misère. Val Dan D'or Baie Lazare, Amitie Grand Anse Praslin e Montagne Posée Anse Boileau ti komanse.

An se ki konsern later endistriyel, lo Zil Eve Praslin, Zil Perseverance avek Providence lo Mahe, sa i ganny zere par Lotorite *Zone Endistriyel IEA*.

Pou lemoman i annan 515 kare later anba zesyon sa Lazans.

Aprezan annou tourn nou latansyon lo bann later sitye lo

nou bann zil. Si nou komans dan visinite Mahe. Savedir son bann zil satelit.

An tou i annan sa bann zil swivan ki'n ganny *lease*. Nou komans avek Sainte Anne, Zil ki berso nou sivilizasyon koman en pep Kreol 1770 - Si listwar i korek.

Sainte Anne depi 2002 pou en sonm inisyal \$1 milyon. e en *rent* \$250 mil tou-le-z-an, e sa sonm pou ganny dapre Kontra ganny ogmante 10 pousan tou le 3an ziska ki i pou ariv lo en *ceiling* \$50mil.

Pa tro lwen avek Sainte Anne i annan Ile Longue ki li en sonm \$3.8 milyon ti ganny peye pou en *lease* 49an par lakonpanyen Britanik *Tri Granit Development*, pou konstriksyon en devlopman touristik 55 *villa* a en sonm \$53 milyon.

Sa lakonpanyen ti menm pey re alokasyon servis prizon Montagne Posée, pou sorti Ile Longue an 2006. Me nou konnen poudir sa zil i zis pe debout e sa devlopman in arete.

I annan osi Ile Ronde Mr Speaker. Ile Ronde li, i annan en *lease* 60an lo li. Ki inisyalman son *outright premium* ti R1milyon 120 mil.

E anyelman i annan selman R1 *lease* avek en

lakonpanyen ki apel *Trinity Estate Propriety Limited*.

An sortan Ronde, nou al Silhouette, ki an 2004 Lakonpanyen Devlopman Zil IDC ti siny en bay. Bay i osi mo Kreol pou *lease* - 60an pou 18 ektar later avek *Universal Enterprise* sorti Maldives, ki zer *Silhouette Island Resort* ki nou konn li koman Labriz Silhouette.

Anba Lagreman sa bay, sa lakonpanyen i pey sa ki mon'n vwar lo rikord piblik, selman \$15mil tou le mwan. Ouswa \$180 mil par an.

Sa sonm i sipoze mont par 30 poursan tou le 10an pandan sa bay 60an.

An realite se lezot konponan kondisyon bay lo Zil Silhouette ki fer lev kestyon si Lepep Seselwa e lekonomi pei pe benefisye atraver sa bann laranzman.

Orizinalman

lakonpanyen *Universal* ti pou fer en lenvestisman sibstansyel dan lenfrastruktir lo Zil Silhouette, pou benefis son bann rezidan ki ti enkli konstruksyon en nouvo lekòl. I vre sa in arive.

Ti sipoze annan nouvo fasilite lasante e sistenm tretman desarz parmi lezot keksoz, pou donn en nouvo komansman popilasyon

Silhouette ansanm avek en lanvironnman pli stab.

Dan bann brosir touristik Silhouette i ganny ponpe, konmkwa i ankor pe gard laspe inik kiltir Kreol, e kot laplipar tradisyon Kreol enkli ladans avek manze ankor pe ganny pratike e swiv. Mon demann mon lekor, par ki pe ganny pratike sa?

Letan nou koz lo bann dimoun sorti *Diego Garcia* e menm Zil *Chagos*, eski nou pran kont poudir popilasyon natif sa zil in sibir sa ki nou apel *internal displacement*, par ganny forse pou kit zot landrwa reste ?

18an apre larive Labriz Silhouette, apenn si i annan en natif Silhouette, batize Dubois, Landry, Jean-Baptiste, Volcy, Dubignon parmi lezot, pou dans tinge pou nou.

Toudmenm nou pe imilite pou fer tinge ganny rekognisyon enternasyonal e ganny prezerv koman en form ladans.

Lo Silhouette i annan en lot pti devlopman touristik apele *La Belle Tortue*. Ki petet i dwatet model pou investiser lokal, potansyel pou ganny en loportinite pou fer biznes lo nou bann lezot zil.

Mr Speaker, letan nou kit sa bann zil granitik, prosen destinasyon i bann zil koralen.

Sa group zil i kapab ganny kategorize dan 4 group. I annan bann ki prive. Bann ki pou Leta. Me zot anba zesyon bann lorganizasyon non-gouvernmental.

I annan bann ki anba sipervizyon Leta, me bann endividi prive i annan bay lo la. E bann ki IDC i annan bay lo la.

Dapre Sit Web IDC, i annan 13 zil koralyenn ki anba son zesyon. Malgre i annan en paragraf ki detay bann aktivite ekonomik lo sa bann zil, i mank ancor latransparans pou permet Seselwa konn lyen biznes ant IDC e bann lakonpanyen touristik.

E konservasyon ki aterir lo son bann zil anba son responsabilite. Tel ki *Four Seasons, Hilton e Blue Safari*.

An se moman IDC i annan en laranzman binas avek *Blue Safari*, ki dekrir zot lekor koman en lakonpanyen ki spesyaliz dan voyaz eksperimantal lo bann zil elwane Sesel.

E dir konservasyon sa kwen lemonn i enn zot lobzektif primordyal. Zot responsabilite pou anmenn viziter lo, zot responsab pou anmenn viziter lo Alphonse, Astove, Cosmoledo avek Poivre, partikilyerman pou fer aktivite *fly fishing*.

Zot propriyeter *Coral House* lo Astove. E osi bann fame *Eco Lounge* ouswa latant ki ti koz en kontrovers isi menm anndan dan sa Lasanble, ler zot ti konstri sa bann striktir lo Zil Wizard an 2018.

Zot bann *bungalows* e *villas* lo Alphonse, dapre lenformasyon lo *internet*, i kout ant \$1050 a \$7mil pou reste ladan.

Sa menm lakonpanyen ti deklare lannen pase ki aköz sityasyon *COVID-19*, zot in fer en pert \$8milyon an traver bes dan reveni touris.

Alor Mr Speaker, sa i bann rezon pou regard pli pre ki kantite Lepep Seselwa e lekonomi pei pe benefisye, an traver sa bann laranzman, letan en konpanyen i koz ou sa kalite larzan ki pas dan son lanmen.

Lo Zil Platte nou atann ki en nouvo lotel dan lasenn *Hilton* apele *World of Astoria* pe al ouver son laport laba byento atraver en *lease* pou 60an.

Farquhar osi i annan en letablisman touristik apard *guesthouse* IDC kot bann kliyan *fly fishing* i reste.

Sa devlopman ancor enn fwa i dan lanmen *Blue Safari*. Ki fer aprezan 5 kwen lo diferan zil, *Blue Safari* ki pe okipe.

Sa ki konsern Ile Poivre, i annan plizyer ale vini lo plan pou sa zil, enkli en ka ki'n pas devan Lakour kot *IDC* ti kas en Lagreman pou en *lease* 60an avek en lakonpanyen reprezante par en nonmen Mr Benjamin Vipin ki ti annan lentansyon konstri en lotel lo sa zil.

Anba sa Lagreman *IDC* ti pou ganny peye \$20mil Ameriken avek lentansyon renouvle tou le 5an.

Depi sa *IDC* lo rikord poudir pou napa lotel ki pou konstri laba. E an menm tan i osi lo rikord en pe pli lwen, ki i anvi konstri en letablisman touristik ki kapab pran ziska 50 kliyan. E i ti anvi viz selman bann Seselwa.

Pli enteresan Mr Speaker, se Zil Desroches. Zil Desroches i annan en Lotel *Four Seasons* ki laba an se moman. E apre i annan plizyer *villa*. Pou bann nou ki'n al lo sa zil, nou ava konnen poudir i annan apepre en 20tenn *villa*.

E lenformasyon, nou'n pas en kantite letan nou de Onorab Flory Larue kot Biro *Registrar General* pou nou regard sa bann lenformasyon.

Alor Desroches Gouvernman Sesel i pas en bay avek li, normalman

Gouvernman i donn *IDC* bann bay 99an.

E *IDC* apre i pas plizyer propriyete lo Desroches avek *Star Seychelles* ki nou konnen lakonpanyen ki ti vin isi pou zer salte.

E lenformasyon ki nou annan i se ki, i en kekyon det ant Gouvernman Sesel avek *Star*, ki ti fer *Star* ganny sa bann propriyete lo Desroches.

Apre *Star* i *sublease* serten sa bann konpanyen, serten sa bann propriyete. E *Star* anfet i annan bann propriyete ki anrezistre lo non sa lakonpanyen.

I *AM* ki *stands* pou *Amirante*. *AM92 to AM94*. Apre *AM110 to AM136*.

Alors sa apre i pas sa bann propriyete avek en lakonpanyen ki apel *Great Plains* an 2007 pou en sonm €1.5milyon.

E *Great Plains* li, i vann diferan *plot*. E sa bann *plot* i vann avek diferan lakonpanyen. I annan tou sa bann *plot* letan nou war i annan zot *files*.

E an mwayenn zot pe vann en *plot* apepre, ouswa zot pe *lease* avek sa bann investiser. Akoz sa bann dimoun i aste bann *villa* koman en lenvestisman.

\$343mil pou en *lease* 70an. E Gouvernman i ganny *stamp duty* an mwayenn R180mil.

Me apard sa *plot*, i annan villa ki ganny konstri lo la. E sa bann *villa* pe vann apepre \$3.3milyon.

E Gouvernman byensir i benefisye avek bann *land sales tax* sak fwa ki sa *villa* i ganny aste.

Mr Speaker, lo bann zil *IDC* ki mon'n mansyonnen, i osi enportan note ki *IDC* li i vann servis avek swa sa bann lotel, swa sa bann *villa*.

E sa bann servis i enkli vol avyon, bato pou savoy karbiran, lekipman, marsandiz lo zil. E zot ganny peye pou sa.

Me lefe ki reste, kestyon ki Mosyon pe demande, eski Lepep Seselwa e lekonomi pei pe benefisye an traver sa bann laranzman?

En lot zil koralyenn, en lot zil granitik plito, ki mon ava retourn lo la, se Felicite ki nou konnen i annan *Zil Six Senses*. Lotel, ouswa nou apel li Felicite *Zil Pasyon*.

E *Zil Pasyon* son *premium* letan zot ti pran en *lease* lo li \$50mil zot ti peye avek son *annual rent* 175mil, son *lease* i 99an.

E en *villa* lo Felicite i apre vann ant €2.5milyon a €5

milyon. Alor letan nou tonm sa bann sonm ki sa bann *villa* i vann lo bann zil ki'n ganny *lease* ki ti propriyete Lepep Seselwa, kestyon i retournen, eski Lepep Seselwa e lekonomi pei pe benefisye atraver sa bann laranzman.

An konklizyon Mr Speaker, akoz limitasyon dan lakantite later i enportan ki later Leta i ganny *lease* selman pou bann rezon spesifik.

Tel ki aktivite tourism, lagrikiltir, enkli lespas pou anmar zannimo parey bef pou donn zot manze. Ouswa konstriksyon fasilite sportif, ou lenfrastruktir telekominikasyon.

Larzan ki dwatet peye anyelman, i dwatet baze lo kalkilasyon en poursantaz evalyasyon sa propriyete, parey nou'n tande yer dan Lasanble Nasyonal konsernan *immovable property tax*.

Tou later Leta lo zil ki ganny demarke koman potansyel pou pas bay lo la, fodre pibliye dan en landrwa kot tou Seselwa i annan akse avek.

En prosedir *tender* ki lib, zis e transparan i merit ganny etabli pou asire ki napa okenn mefyans.

Rapor Komite Zil sizyenm Lasanble National par egzanp, i mansyonnen ki i annan en persepsyon ki zis bann

Sidafriken avek Arab ki pe ganny privez e loportinite lenvestisman lo bann zil elwanye Sesel.

Sa prosedir i merit pe zere par en lofis enterministeryel, ki ava enkli Minister Later, Minister Lanvironnman, Minister Lapes, Minister Lenvestisman, san oubliy Komisyon Reveni Sesel e Biro Rezistrar Zeneral.

Atraver en platform nimerik sa bann antite ki mon'n mansyonnen i dwatet annan posibilite konnen *at the click of a button*, ki stati sak kare ki dezinyen pou pas bay lo la.

Tel ki lekel endividi ou lakonpanyen ki'n ganny sa *lease*? Konbyen i pe peye? Bann kondisyon son bay? E ki devlopman i dwatet pe fer lo la parmi lezot lenformasyon enportan.

Parey a ler aktyel, nou annan bann plan devlopman tou le 26 distrik atraver pei. E menm en *Marine Special Plan initiative*, i enportan ki nou annan en nide, en konsep, en vizyon ki mannyer nou le vwar devlopman lo nou bann zil. E ki fason Lepep Seselwa i ava kapab partisip e benefisyen atraver sa plan.

Pou sit rapor Komite Zil sizyenm Lasanble ankor enn fwa, sa rapor i dir klerman, ki

bann zil i merit aksesib pou Seselwa ganny loportinite divertisman, lenvestisman e lagrikiltir.

Pareyman Manifesto LDS i koz lo en plan Nasyonal pou devlopman lagrikiltir, a kote devlopman dan Sekter Tourizm e Lapes. E i sit nou bann zil elwanye koman en landrwa pou eksplwat sa lide.

I enportan ki Gouvernman i *design* en sistenm ki garanti *checks and balances* pou anpes manipilasyon politik, ouswa loportinite pou tantasyon pou koripsyon dan bann tranzaksyon *lease* lo nou bann zil.

Fodre ki dan Sesel nou aboli net sa posibilite pou en endividi ouswa Departman Gouvernman tous lo li tousel deside san okenn *oversight* pou desid lo metod e kan pou partaz byen Leta sirtou later.

I enportan ki Gouvernman i aplik strikteman bann regleman tel ki fodre i donn laprouvasyon si endividi ouswa en lakonpanyen i oule transfer son *lease*.

Dan sa menm laliny, fodre ki Gouvernman i rekonforte. Ki an akor avek son prop Lalwa. Setadir i okouran par egzanp, lekel bann *beneficial owners* sa bann lakonpanyen ki annan bann *lease* later dan nou pei.

Dan lespri latransparans kot Lepep Seselwa i okouran ki pe pase dan son pei atraver lenformasyon kredib e a zour, i enportan ki *IDC* i devwal dan son rapor finansyel anyel, konbyen reveni sak zil anba son zesyon pe zenere sak lannen.

I annan en legzanp koumsa. Si nou regard rapor finansyel anyel Lakonpanyen *SEPEC*, nou a vwar konbyen sak sa 4 *Tankers*;- *Seychelles Pride* in vann li. *Seychelles Pioneer, Prelude, Progress*. Dan rapor anyel *SEPEC* i dir ou konbyen sak sa bann *Tanker* ki pou Leta i fer an term profi anyelman an Dolar.

Alor mon pa vwar naryen mal, pou *IDC* fer parey vizavi bann zil ki i pe zere. Koumsa nou ava kapab satisfere nou lekor ki *dividends* ki pey Gouvernman anyelman i zistifyab.

Mwan personnelman en legzanp mon ti ava kontan konnen poudir Desroches ler mon war sa ta *villa*, mon war *Four Seasons* laba, mon konnen poudir Desroches pe zer tan larzan. E letan mon get dan son rapor anyel. Mon kapab vwar ki mannyer sa larzan pe rantre e pou retourn lo largiman Mosyon.

Se ki mannyer Lepep Seselwa e lekonomi i benefisyen an traver sa bann laranzman.

Mr Speaker, dan sa menm loptik ozordi si nou oule konnen - bomaten mon'n fer sa pti resers - si nou le konnen konbyen larzan Gouvernman Morisyen i ranmase spesifikman an traver *lease* later Leta lo en baz anyel. Sa lenformasyon i publiye publikman. Ki i pa ditou le ka Sesel.

Nou bezwen avoue sa koman en Lasanble. I en pratik ki fodre nou sanze si nou koman en Lasanble serye nou le anvoy en mesaz deor, pou dir nou bezwen promouvwar latransparans.

Mr Speaker, sa Mosyon pa pe dir nou swazir ant vann later *freehold* ouswa *leasehold* lo nou bann zil.

Akoz napa en model zesyon later Leta ki perfe. E toultan i pou annan *polemic* otour sa size parey mon'n dir lo komansman mon Mosyon.

Sa Mosyon p senpleman demann Gouvernman, pou met bann lotorite konpetan ansanm pou etablir sa bann pwen swivan ;

Ki siperfisi later Leta ki pe ganny *lease*? Ki prosedir in ganny servi pou determinen lekel ki ti ganny sa bann later?

konbyen lezot aplikan ki'n ganny refize e akoz? Konbyen kare ki'n transfer e sorti dan en lanmen lekel e in al pou lekel?

Lekel egzaktman ki annan sa bann *lease* ozordi? e finalman me pli enportan eski lepep Seselwa ou lekonomi pei pe benefisyé an traver sa bann laranzman?

Mersi Mr Speaker mon remersi tou dimoun pou zot latansyon.

MR SPEAKER

Mersi Onorab pou ou prezantasyon. Eski segonder Mosyon Onorab Porice i pare pou adrese la? Onorab ou annan laparol.

HON DOYACE PORICE

Mersi Mr Speaker. Mr Speaker, sa Mosyon anmennen par Onorab Henrie i en Mosyon tre enteresan kot i pe demann Gouvernman pou fer en lanket dan *lease* bann zil. Mon dakor ek sa Mosyon, akoz Sesel i annan bokou zil ki'n ganny *lease* ek serten endividi. E bokou nou pa konnen. Wi, bokou nou pa konnen si lekonomi pei pe benefisyé avek sa bann *lease*.

Alors sa Mosyon pe anmenn sa demann e nou pare pou siporte, pou nou kapab ganny plis konesans lo la e pou

lenformasyon nou pep Seselwa osi.

In annan bokou labi avek later e zil ki'n ganny *lease* dan lepase ek sa ansyen Gouvernman ki'n donn bokou bal ladan. E la Mr Speaker, lefe ki mwan en Zilwa, leksperyans in montre mwan lo Ile Eve. Eski i annan transparan? Eski i annord sa bann *lease* ki ti ganny donner. Gouvernman pe benefisyé lo sa bann *lease*? Praslinoise e Seselwa i bezwen konnen, akoz Gouvernman oparavan pa ti enform nou lo sa bann travay ki ti pe pase, ti napa latransparans Mr Speaker.

I fer mwan mazin osi zil Felicite, li osi ti ganny *lease* par en prive. Me nou Seselwa ki enkli Praslinoise e Zil Pros pa ti konnen konbyen ti koute, konbyen ki Gouvernman pe benefisyé.

Pa zis sa Mr Speaker, in annan osi zil o bor Praslin e Zil Pros ki'n ganny *lease*. Tousala nou pep i bezwen konnen. Gouvernman aktyel i bezwen rode e donn nou lenformasyon vi ki nou annan bokou travay, bokou keksoz pou fer lo nou zil e Sesel an zeneral. Pe enport nou pe koz lo byen pep Seselwa.

Alor Mr Speaker, avek sa de mo mon pou siport sa Mosyon, Akoz Praslinoise, Zil

Pros e Seselwa, i anvi ganny lenformasyon lo sa bann later e zil ki'n ganny *lease*. E mon demann tou nou koleg MNAs pou siport sa Mosyon. Mersi.

MR SPEAKER

Mersi Onorab, nou a pran deba lo sa Mosyon par bann Manm. Eski nou annan okenn Manm ki pou entervenir lo sa Mosyon? Onorab Larue.

HON FLORY LARUE

Mersi Mr Speaker. Bonn apre midi Mr Speaker. Mr Speaker sa Mosyon i koz lo zil, e lefe ki Sesel i plito ganny, i en pei avek plizyer zil, plis ki en santenn de zil ki antoure par lanmer.

Me par kont avek en gran siperfisi ki nou annan dan nou pei, nou vwar ki nou annan zis en total 460km kare later. E ladan nou vwar ki preski 45 pousan i bann later avek en restriksyon a la baz konservasyon e pa kapab ganny eksplwate.

Sa i fer ki avek en popilasyon ki pe grandi, nou Gouvernman e bann ki zer nou resours i bezwen fer sir ki tou desizyon ki ganny pran i donn en benefis tanzib nou lekonomi e nou popilasyon.

Nou bann zil prensipal ki pli gran, i kot mazorite nou

sitwayen i viv. Me larestan i bann zil ki pli pti. Me sa bann zil i fer nou e bokou nou bann viziter reve, e zot ganny dekrir koman paradi lo later.

Menm si bokou nou sitwayen pa pou kapab vizit tou sa bann zil, zot in annan konfyans ki ler sa bann zil i ganny devlope i pou annan en retonbe lo zot atraver en benefis ekonomik pour nou pei.

Nou napa Mr Speaker, bokou zil prive, kot se en endividi ki son propriyeter iltim, kot li i pa pey e bay ouswa en *lease* - savedir i pa lwe ni en bout, ouswa antye sa zil. Napa bokou bann zil koumsa.

Me par kont Mr Speaker, nou annan plizyer zil ki propriyete Gouvernman, kot pour en rezon ou en lot in ganny *lease*, savedir in ganny lwe swa antye swa an morso.

Mosyon i koz lo bann endividi prive. Me nou'n vwar atraver prezantasyon par Onorab Henrie ki sa i kapab en antite legal, pa neseserman en dimoun, idantite en dimoun spesifik.

Pou nou kapab swiv sa prosedir nou bezwen souvan fer bann referans avek bann nimerlo lo bann later sa bann zil, savedir bann *plot number*, pou nou kapab swiv ki nou pe

koz lo la letan nou koz lo en morso later.

Sa bann later ki ganny *lease* i kapab bann pti, pti bout later, ouswa bann tre, tre gran later. Mon pou komans direktman avek zil Sainte Anne, ki en zil ki son propriyeter i Gouvernman e i annan en *lease* lo la.

Sa zil avek en siperfisi 2milyon, 186 mil e 911 met kare, i annan 2 morso later e sa se, CA 117 ek C120 ki fer bann *plot* prensipal.

Lakonpanyen privilezye pour ganny sa *lease* ti *Indian Ocean Resorts Limited*, ki ti formen an Zilyet 1998 e li son propriyeter ler i ti formen ti Mr Francis Savy e Mr Graham Beggs avek sakenn 50poursan par.

E la, mon pa'n ganny sans regard bann dernyen *shareholders* pou vwar si in annan en sanzman dan *shares*. Nou pa konnen ki prosedir ki Gouvernman ti servi pour swazir sa lakonpanyen parmi lezot.

Lease lo zil Sainte Anne ti ganny anrezistre an Zilyet 2001 apre plizyer diferan laranzman e apre ki dokiman ti'n sipoze fini ganny rektifye, e ti an akor avek lagreman ki Gouvernman ti'n fer ki date depi 1998, nou vwar ki zil ti ganny azout en lot

bout avek. E li i ti fer en skandal, akoz sa valer ti vin pou R1.

Sa ki mon'n vwar i ki lakonpanyen Mr Savy *Indian Ocean Resorts* in lwe sa 2 morso later ki li in gannyen, ki fer zil antye, avek en lot lakonpanyen ki apel *Sainte Anne Resort* ki li son propriyeter final i *New Mauritius Hotels Limited* ki avan nou ti konn li koman *Beach Comber*.

Lagreman i fer ki Gouvernman ti ganny \$1 milyon an gro e apre i ti ganny \$250mil ki sipoze ganny peye premye 3an e ti pou annan en logmantasyon 10 poursan lo la tou le 3an avek lakonpanyen Mr Savy.

Premye lanket Mr Speaker, ki mon ti a kontan demann Minister Finans, se verifye si tou larzan ki lo *lease* in ganny peye? Sa i enkli sa \$1 milyon ki ti ganny peye premye.

E pou regarde si sa \$250 mil par an in ganny peye pour premye 3an. E eski sa 10 poursan logmantasyon tou le 3an lo sa \$250 mil in ganny aplike?

Sa Mr Speaker, i nou retonbe direk ki pei pour gannyen ziska lannen 2100, alor ti a bon verifye ki tou i annord kan i ankor boner.

Sa i osi aplik pour tou lezot *lease* pou fer sir ki pei i ganny tou son benefis dan mannyer ki sa bann *lease* in ganny negosye. Akoz nou'n erit sa koumsa.

Annou konpran byen ki en lakonpanyen i ganny en zil avek Gouvernman, e li i son tour Mr Speaker, i al rod investiser, e la sa investiser i investir lo son later e non pa lo nou later pou sa peryod 99an ki bokou letan.

Premye lotel ki ti ouver son laport Sainte Anne an 2001 ti fermen an 2019 e propriyeter later ki li i pe lwe sa 2 bout avek Mr Savy, i komans fer promosyon pour en nouvo devlopman.

Lanons sa devlopman dan bann piblikasyon i dir ki sa proze pour devlop sa propriyete ti pou kout €70milyon ouswa SR1.1 bilyon.

Dan mon resers mon vwar ki lakonpanyen *Sainte Anne Resort Limited*, ki en *subsidiary* en lot lakonpanyen apele *King Fisher Limited*, ki li i en *subsidiary* ansyen *Beach Comber*.

Ki prezan apele *New Mauritius Hotels Limited* i al pran en *charge*, ouswa sa ki nou apel en ipotek avek en Labank lo sa 2 morso later

ansanm, savedir zil antye, ki plis ki 2 milyon met kare.

E i ganny en *loan* pour lavalier €68 milyon an Desanm 2020 pour zot rekonstrir zot nouvo lotel, ki apre zot ti anonse ki i pou ganny lwe avek *Club Med* pour 12 an.

Sa Mr Speaker, in fini arrive. Me mon pa okouran konbyen ki *Club Med* pe pey *New Mauritius Hotels Limited* pou li servi sa lotel.

In deza dan lepase annan en promosyon par Mr Savy lo sa later ki pa ankor devlope, ki lo lot kote zil ki apepre 1.8 milyon met kare, pour en proze apele Zilwa an 2007, avek en valer \$450 milyon ki ti pou en lotel ek bann rezidans *Lux* e en marina.

I ti'n fini ganny en partner sorti *Kuwait* me apre sa pa'n materyalize. La ki i annan en lipotek an 2020, eski sa avek sa lipotek lo sa morso ki mezir 1.8 milyon met kare, eski i vedir ki napa loportinite pour devlop sa pli gro morso lo Sainte Anne pour en serten peryod letan?

Mosyon i demann nou ki retonbe ekonomik? Annou kalkil byen, en devloper in servi nou later pour mont en *loan* pour fer son devlopman prensipal.

E li i pey zis \$250 mil par an pour sa later e i kapab ganny

en *loan* €68 milyon zis avek nou later.

Ou ki dan lakour, ler ou pe rod en *loan* lo ou later ou bezwen al rod 20poursan ouswa plis ki valer sa devlopman avan ou kapab demare.

Eski se koumsa ki bann ki oule investir i mont zot kapital pou fer lenvestisman isi Sesel? Eski se sa ki nou pe rode Mr Speaker?

Mon'n osi vwar dan mon lanket ki atraver sa *lease* lo Sainte Anne, sa lakonpanyen *Sainte Anne Resort* ti ganny vann *Reef Hotel* pour soutenir son lenvestisman lo Sainte Anne an 2001 pour en valer \$3 milyon.

Sa ti sipoze pour li fer bann lofis, en sant lantrennman e pour osi fer akomodasyon pour son travayer pandan konstriksyon son devlopman, avek en plan pour li vin en sant lantrennman lotelri ouswa kapab fer en lot devlopman.

Be Mr Speaker, avek sa ta later ki ti annan Sainte Anne, eski sa lakonpanyen ti bezwen ganny vann en lot bout later ankor avek en lotel lo la?

Akoz pa ti lwe li? Sa lenfrastruktir in deteryore depi 2001, e in vin en landrwa

deplorab san okenn sa bann plan vin en realite.

An 2019 zot in revann sa propriyete pour en valer \$6 milyon, alor zot in fer en profi \$3milyon lo nou ledo Mr Speaker e nou pep pa'n benefisye atraver sa laranzman.

E se la ki nou pe tann en devlopman, plis ki 20an apre. Ki mannyer lekonomi in benefisyé Mr, par sa karkas *Reef Hotel* tou sa leta?

Sa i bann sityasyon ki Mosyon pe koz lo la. En lanket i bezwen ganny fer pour vwar bann desizyon ki ganny pran par bann zofisyé Gouvernman, e bann kontra pli serye i bezwen ganny met an plas pour ki bann devloper i delivre lo zot bann promes e pa zis benefisyé avek nou bann propriyete.

Mr Speaker, mon ti a kontan ki Gouvernman osi i fer bann lenvestigasyon pou regarde ki si ti annan bann *tender*, eski ti annan bann lof pou nou kominote biznes benefisyé sa bann letan?

Nou'n deza ganny dir ki sa bann zil ouswa bann gran morso later, ti ganny donner akoz ti napa lenvestiser ki ti enterese sa bann letan.

Me i evidan sa pa ti le ka, akoz sa bann endividi ki souvan avek bann bon koneksyon ti toultan ganny sa bann

loportinite e letan zot siny zot *lease* zot, Mr Speaker, zot lenvestiser i la o bor zot.

Sa i montre ti napa okenn zefor pour ankouraz investiser pour antre dan komunikasyon direk avek Gouvernman, pour diskrit bann investisman pli atiran pour benefis nou pei premye.

Menm si *SIB* ti ganny formen an 2005, nou vwar plizyer ka apre kot mon pa konnen ki rol *SIB* ti zwe pour asiste pei pou trouv pli bon investiser ki bann ki nou'n gannyen pour devlop nou later.

Bann lot lensidan ki nou'n souvan tande avek ansyen Gouvernman ler pe zer later, i ki zot ti *acquire* bann later Mr Speaker, pour en rezon spesifik, ki souvan ti lentere nasyonal.

E zot ti pran later prive e met li anba Gouvernman. Sa i anmenn mwan en pti pe pli lwen avek Mahé lo zil Félicité ki mezir 2 milyon 600 mil 913 met kare.

Sa zil ti ganny *acquire* an 1987. I ti ganny vann avek *L'Union Estate Company Limited*, ki osi en lakonpanyen Gouvernman pour R1 par Mr Albert Rene.

E apre en *lease* ti ganny pase avek lakonpanyen *Gregoire Management Company*

pour 70an pour R8000 par mwan.

Sa *lease* Mr Speaker ti ganny kase 20an apre, an Zilyet 2007, e *L'Union Estate* ti retourn sa zil avek Gouvernman Sesel e 1 mwan apre an Out 2007 en *lease* ti ganny fer avek en lakonpanyen devlopman, avek en *lease* pou 99an depi Out 2007.

E in dir nou ki sa lakonpanyen ti pey \$50mil pou son *premium* avek en peyman \$175 mil par an.

Sa lakonpanyen Mr Speaker, ti ganny kree an Novanm 2006 e son de kreater ti Mr Francis Savy avek 35 par e Mr Tom Mc Loughlin avek 65 par.

Sa premye *lease* an Out 2007 ti pour zis en sel bout later ki fer zil antye.

Mr Speaker, nou vwar sa *lease* i ganny *surrender* an May 2008. Nouvo *Lease* i ganny fer en pti pe pli tar 2008, li prezan i annan 3 *plot* later ki fer zil antye menm.

En lakonpanyen ki fer lakaz rezidansyel *deluxe* avek bann teknoloji pli modern ki egziste ti ganny sa *lease* li, ti ganny *sublease* li en bout later pour \$1 pour 98an ki li i en *subsidiary* lakonpanyen numero 1.

Li i ganny en morso later ki ganny koupe an plizyer morso pour kree 29 morso later *FL5* ziska *FL33*. Ladan Mr Speaker, 28 morso i bann morso ant 2500 a 5000 met kare, ki ganny trouve antoure par morso *FL33* ki li i mezir 198 mil met kare.

Lo sa 28 *plot* mon'n vwar ki zis 4 sa bann *plot* ki'n ganny devlope. E ladan mon vwar lavant pour zis 3 *plot* e sa 3 *plot* in ganny lwe par lotel *Six Senses*.

Premye lavant i pour en later ki mezir 2522 met kare ki ti ganny vann an Desanm 2008 pour €3.8 milyon.

Dezyenm an Out 2009 ki mezir 5969 met kare pour €5 milyon. Trwazyenm an Fevriye 2012, 2614 met kare pour €2.5 milyon e sa dimoun li ki aste sa bout later i en direkter dan sa lakonpanyen.

Sa bann pri Mr Speaker, i enkli son later e konstriksiyon son *villa* avek en *lease* 95an. Sa i fer ki i reste nou 24 morso later ki ankor vid ziska prezan.

Mr Speaker, oli promes sa developer pour develop sa bann later avek bann *villa deluxe* depi 2008, si i fer ki 24 i ankor vid?

Ladan menm en *plot* i ganny pran pour *secure* en *loan* pour en lakonpanyen kominikasyon pour \$2 milyon e

€1.4 milyon, enn dan sa bann *plot* ki'n ganny *lease* pou fer *villa luxurious*, li i ganny servi pou pey en *loan*.

Eski sa i anmenn en retour ekonomik pour nou pei avek zis sa *rent* ki pe peye pour sa *lease*?

Sa lakonpanyen spesifik Mr Speaker, ki'n fer sa 4 *villa*, me zis 3 ki i annan papye, pa ankor fer okenn *financial returns* depi son formasyon depi 2008.

Alor ek son plis ki €10 ekek milyon li i pa ankor fer okenn *financial returns* li. Sa i en ka mon krwar ki *SRC* i kapab gete, i kapab komans son lanket toudswit.

Enn parmi bann premye *plot* ki mezir 468mil 533 met kare i pour en lakonpanyen ki zer en *resort* ki li i ganny en *sublease* an 2008.

Lo en sit *web* mon'n vwar referans ki en lakonpanyen Sengapouryen ti *take over* sa developman Mr Speaker, an 2013. Mon prezimen ki sa propriyete i kot *Six Senses Zil Pasyon Resort* i ete.

Mon pa'n vwar okenn dokimantasyon pour konnen konbyen ki *Six Senses* pe lwe sa propriyete depi ler zot ti ouver an 2016.

Me solman sa propriyete i annan 30 *villa* ki lwe depi SR 20

mil par nwit e i osi lwe sa 3 rezidans endividyel lo sa lot propriyete, ki enn sa bann propriyete zot, zot komans lwe SR 250mil par nwit.

Sa dernyen morso ki reste lo zil *Félicité* Mr Speaker, i mezir 1milyon, 881mil e 856 met kare. Li i reste pour sa lakonpanyen devlopman orizinal.

Me i pa paret annan okenn devlopman lo sa later Mr Speaker, depi 2008 i pe asize vid.

Atraver resers Mr Speaker, mon'n dekouver ki sa premye lakonpanyen ki annan *lease* ek Gouvernman li in transfer tou son par avek en lakonpanyen apele *Zeal Investments PRC Company* ki en lakonpanyen *offshore*.

Alor mwan koman en Seselwa mon pa konnen lekel propriyeter later Gouvernman, lekel ki pe *lease* nou later.

Mr Speaker, sa sityasyon i fer ki ler Oditer Zeneral ti pe asiste Gouvernman avek lenvestigasyon *COSPROH* atraver son rapor zot ti dir e mon *quote*.

"The commission could not ascertain the actual beneficial ownership of this company during the material times." Fen kotasyon. Sa i aplikab avek zis

bann later *COSPROH*, pa sa ka la.

Me la nou vwar kot Oditer i dir ki zot pa kapab *ascertain* lekel ki bann *actual, beneficial owners* sa bann lakonpanyen ki sa saga *COSPROH*.

E ladan i fer en rekomandasyon spesifik pour sa ka, pou demann Gouvernman pour servi tou son resours, bann lotorite, bann misyon *diplomatic* e bann Lazans *Law Enforcement* pour kapab rode lekel benefisyer final sa bann lakonpanyen.

E telman sa in pas bokou letan pase, sa in kree en difikilte enorm e en kou enorm pour pei.

Mr Speaker sa bann lanket ki'n deza ganny fer e pe ganny fer, i montre ki Gouvernman i bezwen imedyatman fer en *update* lo sa bann *lease* pour idantifye propriyeter iltim.

Si en dimoun i anvi fer biznes avek Gouvernman Sesel, i bezwen pare pour devwale lekel li.

Sa i devret vin en barenm pour Gouvernman protez kredibilite e repitasyon pei, e fer en vre distribisyon ekitab larises sa pep letan nou konnen kwa e, e ki nou pe fer biznes.

Akoz ler nou a tann bann sipoze persepsyon koripsyon,

nou a kapab eklersi sityasyon dan en letan pli vit e met sityasyon drwat avan okenn zofisye pa abiz son pozisyon. Fodre annan en latransparans total dan tou sa tranzaksyon.

Lefe ki Mosyon pe koz lo *lease* lo zil, nou bezwen eksplor en lakonpanyen Gouvernman, apele *IDC* ki en lakonpanyen parastatal ki li i ti ganny kree an 1980, pou zer bann zil elwanye avek en manda promot devlopman lo nou bann zil sirtou dan domenn prodiksyon.

Ozordi nou vwar ki sa lakonpanyen i plito fer promosyon devlopman touristik e konservasyon.

Mr Speaker, 14an apre son kreasyon an 1994 *IDC*, ti ganny *lease* avek Gouvernman pour zer serten zil direktman. Kwa ki ti arive an 1994 ki fer ki bann zil ti ganny anmennen anba *IDC* 10an apre son kreasyon?

Pardon, 14an Mr Speaker son kreasyon. Premye i ti annan 10 zil, apre 3 ti ganny azoute e finalman *Silhouette*, ki li i pa en zil elwanye, ti osi ganny azoute.

Lefe ki Mosyon pe demann en lanket lo bann *lease* e lefe ki lo bann zil ki *IDC* pe *manage*, i annan bann *lease* ki ganny donneren avek bann lakonpanyen *management*

groups pour zer bann *resorts*, nou bezwen regard bann zil ki osi anba son zerans.

Enn bann legzanp ki Onorab Henrie in deza koz lo la se zil *Desroches*. Mon'n vwar ki i annan 28 morso later pour *Star Seychelles*, me dapre mon konpran sa ti an relasyon avek en serten kantite det ki ti'n akimile an deviz etranzer anver sa lakonpanyen par Gouvernman.

E sa det ti ganny peye atraver donn sa lakonpanyen *Star* sa bann propriyete. Mon pa'n vwar ki mannyer sa bann later pe ganny servi.

Me ti a enteresan pour Gouvernman antre dan en konversasyon pour konpran, si zot annan nide fer devlopman lo zot bann later.

Parey mon'n dir i pa kler ki pe arive lo sa bann propriyete. E mon pa kapab dir ou lo plan *Desroches* kote egzaktman sa bann *plot* i ete.

Akoz koman en sitwayen nou napa akse avek okenn sit pour vizyelman vwar plan *Desroches*, pou vwar demarkasyon kote sa bann *plot* i ete.

Nou'n ganny dir ki premye lotel ti ganny fer an 87, plis ki 35an pase. Mon prezimen ki sa ti lotel ti *Desroches Island Lodge*.

Mon pa'n vwar dokiman pour sa lakonpanyen pour sa later kot sa lotel i fer son tranzaksyon, e finalman nou pa konnen ki morso ki sa lotel i lo la.

Pandan sa dernyen 35 an ki sa biznes in an egzistans, bann dokiman pa direktman disponib pour swiv tou bann laranzman *lease* ki'n ganny fer.

Resers in montre ki *Collins International LTD* atraver son bann *subsidiary Du Preez LTD*, en lakonpanyen anrezistre dan *Isle of Man*.

E son lot *subsidiary Zabre International Limited* ki li i anrezistre *Maurice* ki ti propriyeter sa lotel ziska ki i ti vann avek *Desroches Island Development Limited*, ki anrezistre dan *British Virgin Islands*, e nou pa konnen lekel son bann propriyeter.

Ankor nou war en ka la kot nou pa konnen lekel ki pe *lease* later. Dan en rapor 2017 i montre ki i ti aste sa lotel ansanm avek en 20 enn group *Villa Residence* pour en valer \$22.5 milyon an 2016.

Dan rapor direkter 2020, sa lakonpanyen i konfirman ki son biznes prensipal se zeran propriyete *Desroches Island Resort* ki zot pe lwe avek *Four Seasons*.

Mr Speaker, ankor la keksoz i opak, nou pa konnen konbyen *villa* rezidansyel i annan egzakteman lo sa zil e ki manner i pe ganny zere anba son *lease*.

Me par kont nou vwar lo en sit *web* apele *Desrochesvillasales.com* kot promosyon lavant sa bann *villa* pe ganny fer ansanm avek en *plot number* depi nimeron AM157 ziska AM166.

Me par kont mon'n fer en demann spesifik pou sa bann *file*, napa sa bann *file* kot Biro Later. Zot in konfirman ki sa bann *plot* i egziste, me napa en *file*.

La mon pa konpran si later i ganny nimeron e apre i ganny vann, me selman pou mwan sa i parey ou pe met bef devan saret Mr Speaker.

Akoz si ou'n annan en *plot number* pou en later i bezwen annan son, *file* i al avek. Alor mon ti a kontan ki nou fer en lanket pou nou regarde si sa proses fer lavant *online* par en lakonpanyen prive, i en formalite legal.

Parey mon'n dir ou, nou krwar ki i vremen difisil pou en Seselwa avek Desroches ki sitan lwen, e deza nou napa en plan, nou pa konnen ki kantite later ki pe ganny zere e i opak.

Par kont Mr Speaker Desroches i pa en zil etranze, i en zil elwanye, me i en zil elwanye Sesel ki reste dan teritwar Sesel.

E letan i annan tranzaksyon later, sa bann tranzaksyon i bezwen ganny fer dan en fason kler. *IDC* Mr Speaker, i zeran bokou zil ki annan devlopman tel ki *Alphonse, Farquhar, Ile Platte, Silhouette* bann pli gran e bann ki pli pti lo lezot zil.

I osi propriyeter plizyer lezot lakonpanyen me par kont ler nou regard *5 year average* lo *consolidated net profit*, nou tonm lo en sif ki zis apepre SR 17 milyon.

Mr Speaker sa i pou tou son *subsidiary* ansanm, e sa i son profi. Avek sa bann kantite lotel, bann gran, gran sif ki nou pe nonmen la, letan nou pe nonm 3 milyon, 4 milyon, bann gran, gran non dan lotelri, i en pe difisil pou on pran ki mannyer zot fer zot *filings*. Sa nou'n erite depi sepa konbyen letan pase, depi 80 sepa ki lannen. I pa kler ki mannyer nou pe ganny sa retonbe ekonomi.

Mr Speaker, dan lepase nou'n vwar kot *lease* in ganny par egzanp pour *prawn farm* par *SMB* ek *IDC*.

E en *loan* \$100 milyon ti ganny pran par pei pou fer sa proze Mr Speaker. E letan ti annan en dezakor ant bann ki ansarz, lakle ti ganny met lo laport e sa ki ti kit dernyen li osi i ti tenny lalimyer Mr Speaker.

E letan zot tik fer sa, Gouvernman, mon pe dir plito pep Seselwa endividuelman ti erit en lot po kase ek en fardo, ek en det ki ti lavaler plis ki \$50 milyon Mr Speaker, ki nou ti bezwen peye pou *prawn farm*, aköz 2 zwer pa ti dakor ek kanmarad.

Mr Speaker, lo komansman mon *speech* mon'n dir ki siperfisi later total i apepre 460 mil met kare.

Tou sa later i bann later Sesel, me zis aköz i lwen i pa mean ki i devret annan *rule of law* ki gid ki mannyer nou devlop later lo sa bann zil.

Mr Speaker, letan mon'n fer mon bann resers, mon'n vwar ki sa bann sa bann resers in pran mwan en kantite letan. Depi Lendi mon'n pas dan bann files e mon'n ganny lasistans Biro *Survey*, Biro Later kot *Registrar*.

E mon ti a kontan felisit, remersi Mrs Wendy Pierre ensi ki bann *staff* laba ki'n asiste mwan.

Mr Speaker avek, Mosyon i demande ki en lanket i ganny

fer pou vwar si pei pe fer en benefis ekonomik? Alor Mon sizere ki en lotorite i ganny kree e pou fer en louvraz an de parti.

Nou'n vwar ki *Industrial Estates* isi i annan, son *Board* e li koman en *entity* i verifye ki pe pase avek bann *lease* dan - avek endistriyel.

Avek sa kantite mouvman ki i annan lo nou bann zil e avek sa leritaz, avek en defi koripsyon ki kole souvan lo bann tranzaksyon, i enportan ki koman en Gouvernman pou nou komans en travay fran, kler e pou fer en transformasyon.

Nou bezwen fer sir ki nou etabli tou *status* bann *lease*. E letan sa in ganny konplete, nou bezwen fer regard lo bann *lease* ki lo bann zil prensipal, ki annan bann devlopman touristik lo la, ki bann later Gouvernman.

Avek sa Mr Speaker, mon ti a kontan siport Mosyon Onorab Gervais Henrie. E mon remersye ou Mr Speaker.

MR SPEAKER

Mersi Onorab. Eski mon annan lezot Manm ki pou entervenir lo sa Mosyon. On Onorab Arissol. Apard Onorab Arissol, eski lezot Manm pou entervenir?

Akoz mon anvi deside si nou pou *postponed* deba la

oubyen si nou pou anvoy li pou en lot zour? Bon, si i annan zis Onorab Arissol, mon a pas li laparol.

HON SANDY ARISSOL

Mersi Mr Speaker. Bonswar tou bann dimoun ki pe ekoute e bonswar tou bann koleg *MNA*.

Mosyon ki Onorab Henrie in anmennen pe koz lo bann zil ki nou annan. Ou konnen size ki reste deor se toultan nou bann zil in ganny gete koman keksoz apar avek nou teritwar Sesel, parske tou keksoz i konsantre lo nou 3, nou 3 *main* zil Mahe, Praslin avek La Digue e osi Silhouette ki o bor nou.

Sa ki Onorab Henrie pe demande atraver son Mosyon, se ki Lepep Seselwa enkli tou dimoun i kapab konnen egzaktaman ki pe pase lo nou ban zil ki nou annan.

Zisteman parey ozordi nenport ki dimoun ti a kontan konnen ki pe pase dan okenn distrik, zot pou konn sa lenformasyon, swa zot a ganny li atraver son *MNA*, swa atraver son *DA*, swa atraver son direktris oubyen sa direkter lekol sa landrwa, swa sa sirentandan ki ansarz sa Kordgard dan sa distrik oubyen menm nenport ki dimoun ki reste dan sa distrik.

Me pou bann zil i en pe diferan, bann zil in ganny konsidere koman bann keksoz ki en pe lwen avek nou, zil dan lekol nou'n tan koz lo la, me nou annan dimoun ozordi ki'n ne ki'n gran e menm in mor pa'n zanmen parey nou dir met lipye konn nou bann zil ki nou annan.

Ler nou ti lekol nou ti ganny dir nou annan 114, 115 zil, la in vin bokou plis avek bann lezot zil ankor ki nou'n gannyen parey nou'n tann koz lo la, be le pwen se ki i enportan Mr Speaker pour ki lenformasyon i ganny donner avek Lepep Seselwa, an relasyon avek fonksyonman nou bann zil.

Ki pe arive lo bann zil ? Eki ki nou'n *lease*? Konbyen *chalet* nou annan? Ki popilasyon nou annan laba ? Ki bann demars ki bann tranzaksyon ki annan atraver sa bann zil ki apel pou Sesel?

Tou sa bann pti lenformasyon atraver sa Mosyon mon krwar ozordi i enportan pou tou dimoun konnen poudir Desroches i annan 20 - sepa 21 *villa* prive i annan en lotel i annan en bout Desroches kot zot plante zisteman pou donn lotel. I annan en bout Desroches ki fer

meb atraver ban pye dibwa sed, pou anvoy Mahe pou vann.

Ler nou a fini avek Desroches nou ava kapab konnen ki pe arive lo Silhouette. Nou ava kapab konnen ki pe arive lo Ile Platte, nou ava kapab konnen ki pe arive lo Remire e i pou enportan pou tou sa bann lenformasyon ki nou pe dir, sa i ava ede dan sa travay pour ki i ava napa spekilasyon an relasyon avek frod, koripsyon.

Me ler sa bann lenformasyon i ganny anmenn devan, Lepep Seselwa i konn bann Manm Lasanble, nou ganny met zour nou osi nou ava kapab ede dan sa demars pou partaz bann lenformasyon ki korek avek Lepep Seselwa.

Alor Mosyon pe demande ki zil ava kapab partaz sa bann lenformasyon atraver zot bann Lotorite ki zot annan, pour ki tou dimoun Mr Speaker i ava azour avek bann devlopman, bann demars, bann konstruksyon ki pe pase lo nou zil.

Mon krwar i enportan. Parske ozordi nou annan e nou en nouvo zenerasyon, nou annan nou en nouvo group zenn la relev i la pour ki zot osi zot kapab zisteman ganny sa posibilite, sans, pou zot kapab rantre lo bann zil pou al vizite,

al en vakans en wikenn par egzanp Desroches.

Bann dimoun ki enterese lagrikiltir, zot a ganny sa posibilite atraver bann demars, atraver bann koze ki ava arive pour ki bann loportinite a ganny mete a zot dispozisyon pour ki Lepep Seselwa a ganny vwar pou dir bann zil ki nou annan i form par nou teritwar.

Me bann zil pa zis ganny konotasyon parey nou'n tande dan bann prezantasyon ki i pou Sidafriken, oubyen i pou sa, son dalon Arab oubyen i pou en lot dalon entel. Me zil omwen premye lye i ava en landrwa kot i teritwar Sesel e bann lenformasyon apropiye ki nou bezwen i ava kapab ganny met nou dispozisyon.

Akoz mwan letan mon pe koze mon pa ava koz zis lo La Digue, me mon ava kapab osi koz lo lezot zil ki form par teritwar Sesel.

Me selman Mr Speaker mon krwar sa Mosyon i en Mosyon enportan ki Onorab Henrie pe demande ozordi atraver Onorab Flory Larue e pa bliye sa ki Onorab Doyace Porice in fer resorti an relasyon ek Zil Eve Praslin, mon krwar i bann lenformasyon enportan ki bann dimoun deor i enportan pou konnen.

Par egzanp Bel Ombre nou annan bann *lease*. Mwan osi Bel Ombre mon annan *lease* kot ban dimoun in *lease* pou 30an lo later Gouvernman. Me i enportan pou ou osi revwar konbyen zot pe peye pou sa bann *lease*, konpare avek bann lezot biznes ki pey en *rental* avek Gouvernman.

Tousala i bann lenformasyon, i bann deba ki nou ava kapab ansanm koman en Lasanble, rod sa bann lenformasyon e anmenn bann dimoun konsernen par egzanp isi, kot nou a kapab nou menm nou demann en pe kestyon oubyen ganny sa bann lenformasyon atraver bann Lotorite konsernen, pour ki bann lenformasyon, kestyon, klarifikasyon ki pe ganny demande atraver kestyon Onorab Henrie, i a kapab vin o kler.

Parske pa bliye nou annan en gran teritwar an term delo, me nou osi annan bann zil e bann zil i apel pou Lepep Seselwa e si i apel pou Lepep Seselwa, Lepep Seselwa i ava kapab ganny lenformasyon e konnen ki mannyer nou bann zil pe ganny mannye, lekel ki lo la, e ki bann kondisyon ki antase avek zisteman parey Mosyon in dir.

E alor pour sa Mr Speaker, mon ti pou kontan siport Mosyon Onorab Henrie. Mon santi poudir i en Mosyon enportan e in vin a en moman apropiye kot tou keksoz pe ouver, lekonomi pe ouver.

E letan nou pe koz lo la bonn transparans, mon krwar i enportan pou sa Mosyon kapab li osi zwe son plas dan sa demars ki Sesel i lo la, an relasyon avek tou bann devlopman sirtou devlopman touristik e osi pou byennet nou bann travayer ek Lepep Seselwa.

Avek sa detrwa pti mo Mr Speaker mon ti a kontan reasir Onorab Henrie, enkli Onorab Flory Larue avek Onorab Doyace ki'n koz lo sa Mosyon poudir i en Mosyon enteresan e i ava enportan pou nou kapab donn sa sipor, pou ki sa bann lenformasyon Lasanble Nasyonal e Lepep Seselwa i ava kapab gannyen.

E parey mon'n dir olye koz zis lo La Digue toultan, i a permet mwan kapab koz osi lo lezot zil ki form par teritwar Sesel. Mersi bokou Mr Speaker.

MR SPEAKER

Mersi Onorab. Mon ava envit loter Mosyon pou fer son repons lo deba. Onorab Henrie.

HON GERVAIS HENRIE

Mersi Mr Speaker. E dabor mon ava remerci tou bann koleg LDS spesifikman e inikman ki'n partisip dan sa deba ozordi apre midi.

Nou ti pe koz lo bann zil ki fom parti nou larsipel, nou teritwar, nou pei. E ozordi i annan kantite Seselwa in voyaz atraver lemonn depi *Sud Afrique* ziska *Egypte* ouswa depi *Australie* ziska *New York* e la si oule al okenn par dan lemonn ou annan ou larzan demen bomaten ou al dan en Lazans voyaz ouswa ou'n aste ou tiket *Airline* ou anbarke ou ale.

Demen bomaten dir ou pe al Desroches gete si ou kapab zis ale. I difisil pou nou akse nou prop pei kontrerman avek vwar lemonn. E alor tousala i sa transformasyon ki nou pe koz lo la, ki nou pe *press government for action* pou fer akoz letan nou ti asiz lo sa lot kote latab nou'n koz bokou.

Nou ti kre Komite Zil dan sizyenm Lasanble. Sa Komite ti propoz bann diferan rekomandasyon e ti annan Manm Lopozisyon Onorab *Leader* Lopozisyon ti en Manm sa Komite.

E alor sa kote latab nou anvi kontiny sa konversasyon, nou'n ganny akize konmkwa

nou pa kapab *challenge* nou Gouvernman.

E sa i bann size ki kapab kontroversyal me nou, nou pare pou nou koz lo la, e nou pare pou nou al pas en apre midi dan en lofis Gouvernman rod bann dosye. Onorab Larue in remersye Lofis Rezistrar Zeneral mon ava zwenn li mon osi pour remersi bann *staff* ki'n asiste nou.

E i vremen enteresan pou war sa bann keksoz dan ou lanmen, pou ou kapab konpran e pou vwar poudir be i neserer ki nou demann sa keston pou ki nou asire i annan en transparans dan tou bann tranzaksyon konsernan later lo bann zil ant Leta Sesel avek bann endividi ouswa bann lakonpanyen pou asire ki Lepep Seselwa e lekonomi Sesel i benefisyer.

Mr Speaker akoz bann sif ki nou'n koz lo la, i letan en *villa* pe vann ant €2.5milyon a €5milyon, ou bezwen demann ou lekor be ki mannyer i ariv kot mwan? I sa si sa prosedir sa retonbe ti desann Lopoziyon pe koz bokou la lo difikilte ki nou pep pe fer fas avek, lo zanfan ki pa pe ganny manze, lo dimoun ki pa pe ganny lasistans *welfare*.

Lala nou larises nou - nou pei, nou later e nou pe demande

ki i ganny regarde byen, i ganny zer e byen. I ava annan loportinite lenvestisman, lagrikiltir i en posibilite lapes i en posibilite, landrwa pou nou bann zenn ale defoule diverti kontan, sa ki nou pe rod pou amelyor standar e nivo lavi Lepep Seselwa.

E nou, nou pou kontinyen fer - nou tousel pa nou tousel nou pa pou *give up*. E parey mon'n dir sa Mosyon i pa ti pou dir annou pran en model aret tranzakt later swa lo *freehold* ouswa lo *leasehold*, me ki ou oule dir se ki i annan transparans dan sa bann demars.

E Mosyon e senpleman demande pou Gouvernman met bann Lotorite konpetan ansanm pou etabli ki siperfisi later a pe ganny *lease*.

Ki prosedir in ganny servi pou determinen lekel ki'n ganny bann later konbyen lezot aplikan ki'n ganny refize e akoz?

Konbyen kare ki'n ganny transfer e sorti dan lanmen lekel pou al kot lekel?

Lekel egzaktman ki annan sa bann *lease*? E finalman pli enportan se Lepep Seselwa e lekonomi pei pe benefisyer.

Mr Speaker ozordi letan nou pe koze i annan en gran

defi pou pei konnen ki kantite later ki dan lanmen Gouvernman.

E letan nou pe koze la i annan en legzersis ki pe deza fer par Biro Rezistrar Zeneral, e lenformasyon ki mon gannyen i annan en travay ki *it's ongoing* me solman zot in fini war poudir i annan plis ki 5mil *plot*.

I posib bokou pa kapab konstrir ou fer naryen, akoz kekfwa i son topografi mannyer i été, ouswa i dan bann landrwa prezerve kot i annan bann plant andemik ouswa delo.

Me si keksoz ki nou koman en Lasanble kirye - demann *the right question* e demande ki *the right action* i ganny pran pou ki Lepep Seselwa e pei i benefisyé.

Alor ankor enn fwa tou bann dimoun ki'n partisip dan sa deba, mersi bokou. E mon swete ki bann Lotorite konsernen in tann nou e i annan en keksoz ki ganny fer apropro demann ki nou'n fer ozordi sa Merkrede apre midi. Mersi Mr Speaker.

MR SPEAKER

Mersi Onorab. Mon ava apel bann Manm pou vot lo Mosyon ki lo latab e sa se;

Sa lasanble i demann Gouvernman pou fer lanket dan lease bann zil avek bann

endividi prive pou etabli si Lepep Seselwa e lekonomi pei pe benefisyé atraver sa bann laranzman.

Manm ki an faver lev lanmen silvouple? Mersi. Manm ki vot kont? Mersi Madanm Clerk. Vot lo Mosyon ki mon fek lir, 16 Manm in vot pour, 0 kont in annan 8 abstansyon. Alor Mosyon in pase par Lasanble.

Avek sa mon a remerisi bann Manm pou zot partisipasyon e zot travay. Nou'n ariv a lafen nou travay pou ozordi e Lasanble i ava *adjourn* e a rebran travay 9er bomaten Mardi prosen.

Bonn restan lasemenn e mon konnen zot pou angaze dab lezot travay bann Manm Lasanble sirtou pou zot distrik e Komite. Nou a *adjourn*.

(ADJOURNMENT)

